

# Zaburi

*korwa ase*

# Ebilia

*chiroisirie  
ase ogotera*

Agasti 2013

Free Presbyterian Church of Scotland  
Kenya Mission  
P. O. Box 3403  
Kisii  
Kenya

fpmision@swifakisumu.com





**Zaburi 1**

8.6.8.6. (C.M.)

- 1 Nasesenirie omonto  
otarigotaara  
as' obosemia bw'ababe,  
batari ba Nyasae.  
  
Nasesenirie omonto  
'tari gotenena  
as' enchera eyio ere  
ey'abanyabibe;  
  
Otari go-ikaransa  
as' egeikaranso  
ki'abachecheria na ase  
ekerogo kiabo.
- 2 Korend' omogoko oye  
nigo ore ase  
amachiko y'Omonene  
n'amariko aye.  
  
Nigo akorengereria  
'goro y'amachiko  
aye 'kerokia mobaso  
na botuko boigo.
- 3 Naboigo omonto oria  
nabe buna 'mote  
osimekire ang'e ne  
chindooche chi'amache,  
  
Oyio 'korenta okwama  
kwaye as' engaki  
yaye; naboigo amato  
aye tari kwoma.  
  
Na kera egento keria  
agokora nigo  
gekogenderera buya  
na giasesenigwa.
- 4 Abatari aba Nyasae  
mbari bo, ko nigo  
banga omoiriro 'mwaga  
oyokoirurukia.

**5 Igo abatari aba**Nyasae tibakoba  
bagotenena ekero  
ekina kerache,Gose abakori 'mabe  
tibagotenena  
aaria ase omoganda  
bw'abanyaboronge.

- 6 Naki Omonene ere  
namanyete 'nchera  
y'abaronge, ko enchera  
y'ababe nesire.

**Zaburi 2**

8.8.8.8. (L.M.)

- 1 Nase ki abanto baria  
b'ebisaku bagokora  
riroroche na abanto  
bakorengereria bosa?
- 2 Abaruoti b'Ense nigo  
bateneine amo ase  
okwanga Omonene na  
Omoakw' Amaguta oye.  
  
Abagambi b'Ense nigo  
barobeirie amo koba  
mamincha y'Omonene na  
Omoakw' Amaguta oye.
- 3 Bagoteba: Tobutore  
ebisibo biabo, tiga  
tochitugute chingori  
chiabo korwa asetore.
- 4 Ere oyoikaransete  
aaria Igoro, naseke;  
Omonene omonyene  
nabachecherie kegima.
- 5 Erio nakwane 'sebare  
ase endamwamu yaye  
na nabagose barabwo  
as' ekeririanda kiaye.

- 6 Ko nigo namobegete  
Omoruoti one 'goro  
ase egetunwa kiane  
egechenu gia Sayoni.
- 7 Inche nindarie eganga:  
Omonene nakwanete  
asende: Aye n'Omwana  
one; rero nakoiboire.
- 8 Mborie na ninkoe 'banto  
b'ebisaku babe 'mwando  
oo, ne chinsinyo chi'Ense  
yonsi inchibe echiao.
- 9 Norababune n'eniyimbo  
y'ekioma; nobabune 'se  
ebing'ese buna 'nyongo  
y'omoroisia yategete.
- 10 Ase igo bono, inwe  
abaruoti, mong'ainie; na  
boigo orokererigwa,  
inwe abagambi b'Ense.
- 11 Inwe abanto, korera  
Omonene n'okiroka,  
na ekero mokogoka  
inwe kabe n'okoiguswa,
- 12 Nyunyunta Omwana gose  
nabee na mokwe 'se 'nchera  
ekero 'ndamwamu yaye  
egochaka gwoka ake.  
  
Mbasesenirie abanto  
bonsi bakomosemeria;  
mbasesenirie abanto  
bonsi bakomotamera.

- Zaburi 3** 8.8.8. (L.M.)
- Zaburi ya Daudi, ekero atamete korwa  
ase Abisalomu omwana oye.
- 1 Naki baria bagonchanda  
bamentekire! Yehova,  
abakoimoka igoro  
mamincha yane nabange.
  - 2 Abange ngokwana bare  
igoro y'omoyo one:  
Ogotooreka tikoio  
asare korwa 'se Nyasae.
  - 3 Ko Yehova, naye 'nguba  
yane, n'obonene bwane  
na oyokoimokereria  
omotwe one igoro.
  - 4 Nkarangeria Omonene  
n'eriogi riane; na korwa  
ase egetunwa kiaye  
egechenu akanyigwa.
  - 5 Inche ngetoora inse na  
igo nkarara; naende  
inkaboka, ekiagera  
Omonene nansiirete.
  - 6 Tinkobairoka abanto  
chiribu chinyinge, abwo  
batenenire mamincha  
yane na kong'etanana.
  - 7 Aye Yehova, imoka;  
ntoorie, aye Nyasae one;  
ekiagera nkwabaagete  
ababisa baane bonsi.  
  
Nigo kwabaagete ase  
amauga ye chinsea;  
nkwayabunete amaino  
y'abatari aba Nyasae.
  - 8 Ogotooreka nokwao,  
aye Yehova, naboigo  
ogoseseneka kwao  
nkore as' abanto bao.

- Zaburi 4** 8.6.8.6. (C.M.)  
 Ase omoteri omonene buna Neginoti,  
 Zaburi ya Daudi.
- 1 Nyasae bw'oboronge bwane,  
 inyigwe ekero  
 inkorangeria; kwang'ete  
 ribaga rigare.  
 Inche inachandegete  
 na ngwansiborete;  
 ndorere 'mabera, oigwe  
 ogosaba kwane.
- 2 Abana ba mwanyabanto,  
 ngoika ririri  
 morarentere 'bosooku  
 obonene bwane?  
 Ngoika ririri inwe  
 moranche obosa  
 na korigia oborimo?  
 Ngoika ririri?
- 3 Ko manya ng'a Omonene  
 o-atananire  
 oria ore omochenu  
 ase omonyene.  
 Omonene naigwe 'kero  
 inkomorangeria.
- 4 Iguswa, na timokora  
 ebibe naende.  
 Inwe kwanera chinkoro  
 chialino chinyene 'se  
 amarere aino, boigo  
 inwe toerera.
- 5 Karue ebing'wanso bire  
 ebi'oboronge na  
 beka 'gosemeria kwaino  
 ase Omonene.
- 6 Mbare abanto abange  
 bagokwana: Ning'o  
 oratworokie obuya  
 bw'ayare amaya?
- Yehova, imokereria  
 oborabu bore  
 korwa as' obosio bwao  
 gocha asetore.
- 7 Kwang'eire omasasoko  
 as' enkoro yane  
 kobua oyo abanto  
 bande bakonyora,  
 Nonya nekero engaki  
 y'endagera yabo  
 yamentekanire mono,  
 na edivai yabo.
- 8 Inche ning'etoore inse  
 ase omorembe,  
 na inche nindare ase  
 obotoereru.  
 Naki naye Omonene  
 okogera inche  
 imenye as' oborendi  
 obuya botambe.
- Zaburi 5** 8.6.8.6. (C.M.)  
 Ase omoteri omonene buna Nehiloti,  
 Zaburi ya Daudi.
- 1 Omonene, tegerera  
 amang'ana aane;  
 manya okorengereria  
 kore ime yane.
- 2 Tegerera as' eriogi  
 ri'okorera kwane,  
 aye Omoruoti one,  
 boigo Nyasae one,  
 Ekiagera ngocha 'sore  
 3 ndasabe. Noriigwe  
 'riogi riane as' emambia,  
 aye Omonene.  
 Ase emambia nimbeke  
 ogosaba kwane

- ase obosio bwao, na ninganye ndendete.
- 4 Naki aye tori Nyasae okwegokia ase obosareku, n'obobe mbokomenya naye.
- 5 Nogechete abakori amabe bonsi, na bosio bwao aberori tibagotenena.
- 6 Yehova ere nageche omong'ainereria n'omoiti; ee, nosirie abanyaborimo.
- 7 Korende inche ninchiche as' enyomba yao; ee, ninchiche as' obonge bw'amabera ao;  
Ase okoiroka kwao inche ninsasime.  
Nindigererie Hekalu y'obochenu bwao.
- 8 Omonene, ndaae ase oboronge bwao as' engencho y'abwo bare ababisa baane;  
Na roisia enhera yao ase ngoetera ebe endonge botambe as' obosio bwane.
- 9 Naki bwegenwa tibori as' emenwa yabo; chinsemo chiabo chia ime nchire chinsareku.  
Emiyo yabo noboina bwasie; mbakwanete amang'ana 'mansu bosa ne chimeme chiabo.
- 10 Aye Nyasae, bararie ng'a nabamochi bare; igo tiga bagwe ase obosemia bwabo.  
Batugute as' obonge bw'agosaria kwabo, naki barabwo bangire gokoigwera aye.
- 11 Ko tiga abanto bonsi bagosemeretie bagoke mono na tiga barabwo bachenge;  
Na bagenderere goaka 'riogi ri'omogoko, ekiagera aye nigo okobakengera.  
Naboigo tiga abanto banchete erieta riao bagoke asore, ee, tiga bachenge.
- 12 Naki aye, Omonene Nyasae, nosesenie oyio ore omoronge; ee, nomosesenie.  
Aye nomoetanane n'ogwancherwa kwao; ee, buna enguba aye nomoetanane.

### **Zaburi 6      8.6.8.6. (C.M.)**

Ase omoteri omonene buna Neginoti, ase Sheminiti. Zaburi ya Daudi.

- 1 Yehova, tontogonyera n'endamwamu yao, gose tondongeyia ase 'keririanda kiao.
- 2 Aye Yehova, ndorere amabera, naki

- inde omonyanyuru na  
ntanyare gwekonya.
- Yehova, ingwenie, naki  
amauga aane  
anyegerigwe n'obwoba  
na achandekire.
- 3 N'omoyo 'he ondookire.  
Aye Omonene,  
ngoika ririri aya  
aragenderere?
- 4 Aye Yehova, irana,  
tooria omoyo 'ne;  
intoorie ase engencho  
y'amabera ao.
- 5 Naki ase amakweri  
okoinyorwa kwao  
tikoio; na as' embeera  
ning'o 'ragotogie?
- 6 Narosire n'okweumia  
kwane; boigo nigo  
nkobonyiyia oborere  
bwane n'amariga.
- Ee, botuko bwonsi inche  
nigo ngoteremia  
oborere bwane bwonsi  
n'amariga aane.
- 7 Na amaiso aane nigo  
omire pa ase  
engencho y'obororo na  
ogoichana kwane.
- Amaiso aane abeire  
amagotu ase  
'ngencho y'abwo bonsi bare  
ababisa baane.
- 8 Karwe 'sende, inwe mwensi  
more abakori  
amabe, naki Yehova  
ere onyigure;
- Ere oigure eriogi  
ri'okorera kwane.
- 9 Yehova ere oigure  
'gosorora kwane.
- Yehova boigo nanchere  
ogosaba kwane.
- 10 Tiga ababisa baane  
bonsi basookigwe;  
Tiga ababisa baane  
bagoseke mono;  
tiga bairane nyuma na  
basookigwe bwango.

**Zaburi 7** 8.8.8.8. (L.M.)

Sigayoni ya Daudi, eyio aterete ase  
Omonene, igoro y'amang'ana a Kusi  
Omoberjamin.

- 1 Omonene Nyasae one,  
nimbegete 'gosemeria  
kw'omoyo one asore;  
ee, nasore nsemertie.
- Koranche ntoorie korwa 'se  
baria bonsi bagontesa,
- 2 na ntaborie. Onye taibo,  
nabune omoyo one;
- Buna endo ere nigo  
aratandorane 'moyo  
one ebing'ese, agwo  
as' omotooria ataiyo.
- 3 Omonene Nyasae one,  
onye nakorire aya,  
na onye obobe bore  
ase amaboko aane,
- 4 Onye inche naakanire  
amabe gochia 'se oria  
ore n'obotoereru  
na omorembe asende,

- Ee, onye namosakoire  
oria ore omobisa  
mamincha yane ekero  
atabwati ngencho ende,
- 5 Rirorio tiga 'mobisa  
abeke 'gosikwa kwane  
as' orotu, na atese  
omoy' one na ayoire;  
  
Ee, tiga atiringere  
inse obogima bwane  
aaria ase amaroba;  
tiga ere akore bo.
- 6 Omonene, imoka 'se  
ekeririanda kiao, 'se  
engencho ye riroroche  
ri'ababisa baane bonsi;  
  
Eimokererie igoro,  
na bokia ekina ekio  
gwachigete as' engencho  
yane, ee, kebokie bwango.
- 7 Igo 'moganda bw'abanto  
nogoetanane aye;  
irana na obe aaria  
igoro igoro y'oro.
- 8 Omonene nanachere  
abanto bonsi ekina;  
aye Omonene Nyasae,  
inachere inche 'kina.  
  
Inachere koreng'ana  
n'oboronge bwane, boigo  
koreng'ana n'oboene  
bwane bore ime yane.
- 9 Na tiga obosareku  
bw'abasareku boere,  
korende kong'ia omonto  
ore omonyaboronge;  
  
Naki Nyasae omoronge  
nere oria ogoteema
- na korenga chinkoro ne  
chinyigo chia mwanyabanto.
- 10 Na enguba yane neya  
Nyasae, oyokobatooria  
abanyaboronge bonsi  
'se chinkoro chiabo ime.
- 11 Nyasae nomonachi 'kina  
omoronge; Nyasae nigo  
are n'ekeririanda 'se  
ababe kera rituko.
- 12 Onye ere tagoonchoka,  
natierie omoro oye;  
okumbire 'bota bwaye  
na obobekire ang'e.
- 13 Oroisirie 'megwe yaye  
mamincha y'abatesi; na  
boigo omwariganeirie  
'birwanero bi'amakweri.
- 14 Rora, nigo akobina  
n'obobe, boigo obeire  
morito n'obosareku  
na oiboire oborimo.
- 15 Akarema engoro na  
koyekunya; na ogure  
as' eirimma eyio ere  
aroisetie as' oyonde.
- 16 Amaene ebitina  
biaye n'okwomana kwaye  
mbiirane naende ase  
omotwe oye igoro;  
  
Boigo obotindi bwaye  
mboche inse as' omotwe  
oye igoro 'monyene;  
ee, mboche igoro yaye.
- 17 Inche nintogie Yehova  
koreng'ana n'oboronge  
bwaye; boigo nimoakere  
Yehova ng'a mbuya mono.

Nintere kogenderera  
ogotera kw'ogotogia  
as' erieta ria Yehova,  
Oyore Igoro Mono.

**Zaburi 8**

8.6.8.6. (C.M.)

Ase omoteri omonene buna Gititi, Zaburi ya Daudi.

- 1 Omونene Nyasae oito,  
'rieta riao naki  
rire n'obonene 'bonge  
ase Ense yonsi!

Omonene Nyasae oito,  
aye nkabegete  
obonene bwao 'bonge  
goetania 'goro.

- 2 Omونene, ngwachorete  
chinguru korwa 'se  
emenwa y'abana 'bake  
ney'abakogonka,

As' engencho y'ababisa  
bao abatindi,  
ngwachigete okobua 'se  
emenwa y'abana,

Erinde otoererie  
omobisa oo,  
boigo noria okorusia  
egesiomba ekio.

- 3 Ekeronkogereria  
erioba riao na  
egasi eyio ebiara  
biao biakorete,

- 4 Erio nachaka gokwana:  
Mwanyabanto ninki  
aye ogendererete  
komorengereria?

Omwana o mwanyabanto  
ninki ere are

okomorengereria na  
okomotaarerera?

- 5 'Kiagera nkamokorete  
koba inse ake  
kobua abamalaika  
abwo gwatongete;

Nkwamobekerete 'gutwa  
y'obonene mono;  
nkwanmoberete 'gutwa  
y'ogosikwa boigo.

- 6 Ngwakorete mwanyabanto  
koba omogambi  
bw'emeremo eyio yonsi  
y'amaboko ao.

Ekeene, nkabegete  
ebinto bionsi 'nse

- 7 y'amagoro aye: chiombe  
ne ching'ondi chionsi,

Ne ching'iti chi'emegondo  
na ech'i'orosana,

- 8 chinyoni chikoiruruka  
echio chia igoro,

Ne chinswe chionsi chi'enyantha,  
boigo kende gionsi  
kegoeta 'se chinchora  
chi'enyantha enene.

- 9 Omونene Nyasae oito,  
'rieta riao naki  
rire n'obonene 'bonge  
ase Ense yonsi!

**Zaburi 11**

8.8.8.8. (L.M.)

Ase omoteri omonene, Zaburi ya Daudi.

- 1 Nase Omونene inche  
nkobeka ogosemeria  
kwane kogenderera, ee,  
nasemeretie Yehova.

- Inee, naki mogokwana  
as' omoyo one igo:  
Tamera 'getunwa kiao  
buna 'nyoni egotama?
- 2 Naki rora, abakori  
amabe barabwo nigo  
bagokumba 'mata abo,  
nigo bakoyakumba bo;
- Babeka chinsara ase  
chingori, erio barase  
bobisi 'banyaboronge  
ime ye chinkoro chiabo.
- 3 Onye amaroso aro  
agotagorwa kegima,  
inee, omonyaboronge  
nanyare gokora kende?
- 4 Nyasae nare as' Hekalu  
yaye enchenu; 'kerogo  
ki'obonene ki'Omonene  
nkere aaria as' Igoro.  
  
Na amaiso aye nigo  
akorora, na ebioge  
biaye nigo bigoteema,  
abana ba mwanyabanto.
- 5 Nyasae nigo agoteema  
omonto 'monyaboronge,  
ko omoyo oye nigo  
okomogecha omobe;  
  
Ee, nigo okomogecha  
omosareku naboiigo  
omonto oyobwanchete  
obotindi na obobe.
- 6 Natwerie abasareku  
amareba, omorero  
n'amakara, na omwaga  
bwe riberera ritindi.
- Nigo birabe 'getari  
7 ki' egekombe kiabo. Naki
- Omonene omoronge  
nigo anchete 'boronge.  
  
Na obosio bwaye nigo  
bokorora oria ore  
omoronge, nonya noria  
ore omoronge borì.
- Zaburi 12** 8.8.8.8. (L.M.)  
Ase omoteri omonene buna Sheminiti.  
Zaburi ya Daudi.
- 1 Aye Omonene, konya!  
Naki omonto 'mochenu  
oerire; amaene  
omwegenwa onde taiyo;  
  
Ekiagera abegenwa  
tibari kororekana  
nonya ng'ake as' egati  
y'abana ba mwanyabanto.
- 2 Na kera oyomo nigo  
agokwana bosa amo  
n'omoamate oye; nigo  
bagokwana oborimo;  
  
Na nigo bagokwana ne  
chinkoro ara kabere;  
nigo bare n'ebikoba  
bi'amang'ana y'okweansia.
- 3 Nyasae nanache 'bikoba  
bionsi bi'okweansia, boigo  
oromeme rogokwana  
amang'ana y'obwerori.
- 4 Mbatebete: Ne chimeme  
chiaito ntobu-e; 'bikoba  
biaito nebiaito; na ning'o  
ere ore 'goro yaito?
- 5 As' engencho y'ogochandwa  
kw'abataka, n'okorera  
kw'abaremerwa, Yehova  
okwanire: Ninyimoke;

- Bono inche nimobek  
as' oborendi obuya  
korwa ase oria ore  
n'okoeyana kw'obobe.
- 6 Amang'ana y'Omonene  
namang'ana amachenu,  
na anga buna efeta  
egoteemwa as' eriko;  
  
Aro nigo achenirwe  
mono ara gatano na  
kabere buna efeta  
as' eriko ime y'ense.
- 7 Omonene, nobarende,  
nobarwanerere korwa  
ase ekegori eke  
goika kare na kare.
- 8 Ekeru abasareku  
baimokereirie igoro,  
erio ababe mbataare  
bagoetanana agwo.
- rituko ase rituko.  
Ngoika ririri?
- Omobisa one ere  
oimokererigwe  
igoro mamincha yane.  
Ngoika ririri?
- 3 Omonene Nyasae one,  
rora na inyigwe;  
boigo karue oborabu  
as' amaiso aane.
- Erio tindara chitoro  
chi'amakweri, gose
- 4 'mobisa one tateba:  
Inche namobuire;
- Erinde abagonchanda  
tibagoka ase  
'ngaki y'okonyegerigwa  
n'emechando yane.
- 5 Korende nasemeirie 'se  
amabera ao;  
'nkoro yane negokere  
'gotooreka kwao.
- 6 Nintere ase Yehova,  
ekiagera ere  
onkoreire ayio are  
amaya amange.

### Zaburi 13

8.6.8.6. (C.M.)

Ase omoteri omonene, Zaburi ya Daudi.

- 1 Aye Yehova, ngoika  
ririri orabe  
gokonyeba? Omonene,  
inkare na kare?

Ngoika ririri, aye  
oragenderere  
kobisa obosio bwao  
korwa 'sende inche?

- 2 Ngoika ririri ndabe  
ngotigwa kobeka  
obosemia as' omoyo  
one omonyene?

Nigo inde n'obororo  
as' enkoro yane

### Zaburi 14

8.6.8.6. (C.M.)

Ase omoteri omonene, Zaburi ya Daudi.

- 1 'Monto ore omoriri  
nigo agoteba  
as' enkoro yaye ime  
buna Nyasae tari.

Barabwo basarekire;  
bakorire 'gasi  
y'okogechia; onde taiyo  
ogokora 'maya.

2 Korwa Igoro Yehova  
narigereretie  
inse arore 'bana ba  
mwanyabanto bonsi,

Erinde arore gose  
'moto 'nde nareo  
omomanyete Yehova  
na okomorigia.

3 Bonsi bachiire ensembo;  
bagundire; onde  
taiyo ogokora 'maya;  
yaya, onde taiyo.

4 Inee, 'bakori amabe  
bonsi, imbabwate  
obomanyi bonde gose  
obong'aini bonde?

Bakoria abanto baane  
buna omogati,  
na tibari korangeria  
Omonene Nyasae.

5 Agwo mbairogete mono,  
naki Nyasae nigo  
are amo n'ekgori  
ki'omonyaboronge.

6 Mwasookirie obosemia  
bw'omotaka, ase  
engencho Yehova are  
'botamero bwaye.

7 Naki yare koba ing'a  
ogotooreka gwa  
Israeli ngoche korwa  
as' aaria Sayoni!

Ekeru Yehova are  
koirania 'bosibwa  
bw'abanto baye, Yakobo  
nagoke kegima.

Na Israeli nechenge  
ekero Yehova

arairanerie abanto  
baye 'maya abo.

### Zaburi 15 8.6.8.6. (C.M.)

Zaburi ya Daudi.

1 Aye Omonene, ning'o  
orameny'e ase  
obomenyo bwao? Ning'o  
orameny'e agwo?

Ning'o oramenye ase  
egetunwa kiao

2 'gechenu? Noyogotaara  
as' oboikeranu;

Noyogokora boronge;  
na ime y'enkoru  
yaye nigo agokwana  
ekeene gioka.

3 Noyotari omogenki  
n'oromeme rwaye;  
noyotari komochera  
omoamate oye;

Noyotari gwancherana  
ogochaywa konde  
gwonsi okore mamincha  
y'omoamate oye.

4 Omonto omosareku  
nigo agochaywa  
ase amaiso aye; ee,  
nigo agochaywa;

Korende omonto oyo  
nigo agosika  
abanto bamoirogete  
Omonene Nyasae;

Na nigo akoria eira  
na tari goonchoka  
nonya ekomorentera  
ere obokong'u.

- 5 Ere tari gokabesia  
chibesa chiaye 'se  
okonyora ebitoki  
as' enhera embe.  
  
Na omonto oyo tari  
gwancha riaaki rinde  
mamincha y'oria otari  
na komocha kondé.  
  
Ere oria ogokora  
amang'ana aya  
takonyegerigwa rinde  
rionsi nonya ng'ake.
- tingokorua nonya ng'ake;  
inche tingokoumora;  
  
Inche tingwatora gose  
tingokwana amarieta  
abo n'ebikoba biane  
as' engaki ende yonsi.
- 5 Omonene negetari  
ki'omwando one; naboigo  
nere ore egetari  
ki'egekombe kiane inche.
- 6 Aye nigo okorenda  
ensemo entungetie; ne  
chimbebe chiangwereire 'nche  
aase y'okwegokia mono.

## Zaburi 16 8.8.8.8. (L.M.)

Mikitamu ya Daudi.

- 1 Ondende 'nche, aye Nyasae,  
ekiagera 'sore nao  
mbegete ogosemeria  
kwane; naye ngotamera.
- 2 Aye omoyo 'ne, aye  
nigo gwakwanete ase  
Omonene: Aye nigo  
ore Omonene one.  
  
Obuya bwane tibori
- 3 gokoa ebitoki, ko  
nigo bokoa 'bachenu  
bare as' Ense 'bitoki.  
  
Nigo bokorua 'bitoki  
as' abachenu abare  
ab'amasiskani, abwo  
nabwo bangogetie mono.
- 4 Ase baria bakogenda  
bwango as' enyasae ende,  
obororo bwabo mbobe  
bokomenta mono mono;  
  
Okoruegwa okwo kwabo  
gw'ekenyugwa ki'amanyinga
- 7 Bori, nimbwate omwando  
omuya. Na inche nimbe  
ngosesenia Omonene  
oyokong'a obosemia.  
  
Ne chinyigo chiane nigo  
chikonyorokereria 'se  
chingaki chia botuko; ee,  
nchinyorokererie inche.
- 8 Botambe nigo nkobeka  
Omonene bosio bwane.  
Inche tinkonyegerigwa  
'kiagera nare na-inche.
- Ere nigo are ase  
ensemo yane y'okorio.
- 9 Na ase igo enkoro  
yane nigo egogete;  
  
Obonene bwane nigo  
bogogete; ne chinyama  
chiane boigo nchitimoke  
as' oborendi obuya.
- 10 Naki togotiga 'moyo  
one ime ya she-oli,  
gose Omochenu oo  
arore ogosareka.

- 11 Aye nong'orokie 'nchera  
y'obogima; bosio bwao  
'boikeranu obwo bore  
obw'omogoko mboreo  
  
As' ensem o y'okoboko  
kwao gw'okorio, 'mogoko  
na omochengo mbireo  
go-ika kare na kare.
- eema koba obomenyo  
bw'aase ye risase.
- 5 Ne risase nigo ringa  
buna omonyuomi  
oyio ogosoka korwa  
as' enyomba yaye;  
  
Nigo rikogoka buna  
omonto 'mokong'u  
okominyoka chimbero  
as' amaminyoko.
- Zaburi 19** 8.6.8.6. (C.M.)  
Ase omoteri omonene, Zaburi ya Daudi.
- 1 Botambe igoro chionsi  
nigo chikoorokia  
obonene bwa Nyasae, ee,  
nkoboraria chire.  
  
Na eaanga ya igoro  
nigo ekoraria  
emeremo y'amakumia  
y'amaboko aye.
- 6 Nigo rigosoka korwa  
ensem eyemo  
ya igoro na riekumba  
gochia 'nsemo ende.  
  
Na gento kende tikeri  
gekobisekana  
korwa ase riberera  
rie risase erio.
- 2 Rituko erimo nigo  
rigokwana ase  
rituko rinde igoro  
y'obonene bwaye.  
  
Na obotuko obomo  
nigo bokoorokia  
obomanyi gochia ase  
obotuko bonde.
- 7 Amachiko y'Omonene  
namaikeranu na  
nigo agoonchora 'moyo  
korwa as' ebibe.  
  
Oborori bw'Omonene  
nobw'ekeene; na  
nigo bokomong'ainiyia  
omonto 'moriri.
- 3 Chinkwana chinde tichiri  
gose monwa onde  
agwo as' eriogi riabo  
ritari koigugwa.
- 8 Amachiko y'Omonene  
namaronge are;  
aro nigo akogokia  
enkoro n'omoyo.  
  
Amachiko y'Omonene  
namachenu are;  
nigo akorua 'borabu  
as' amaiso aito.
- 4 Elaini yabo yachiire  
Ense engima na  
'mang'ana abo achiire  
'se chinsinyo chi'Ense.  
  
Aaria, ime ya igoro,  
Nyasae obekire
- 9 Okomoiroka Yehova  
nokorabu kore;  
nigo kogendererete  
kobao botambe;

- Na ebina bi' Omonene  
nebi'ekeene, na  
boigo bionsi amo nigo  
bire ebironge.
- 10 Bikoganigwa kobua  
etahabu ere  
enyinge na etahabu  
echenire bori;  
  
Na nigo bire ebiantsu  
kobua obooke,  
obwo bokonyororoka  
korwa as' eriana.
- 11 As' okobirenda ebio  
eng'eria enene  
nero; 'mosomba oo  
okureirwe nabio.
- 12 Ere ning'o omanyete  
amamocho aye?  
Nchene korwa as' ebibe  
bibisekanete.
- 13 Aye Nyasae, tanga boigo  
omosomba oo  
korwa as' ebibe bire  
ebia moeneno,  
  
Na tobitiga bitware  
chinguru n'okobua  
igoro yane; na erio  
nimbe omoronge,  
  
Na nimbe omoikeranu  
na omosibore  
korwa ase ogosaria  
kore okonene.
- 14 Tiga okorengereria  
gw'enkoro yane na  
'mang'ana y'omonwa one  
biancherwe asore.  
  
Tiga biancherwe 'se 'bosio  
bwao, aye Nyasae,
- oyore chinguru chiane  
n'omobooria one.
- Zaburi 22** 8.6.8.6. (C.M.)  
Ase omoteri omonene buna Aicheleti  
Shahari, Zaburi ya Daudi.
- 1 Nyasae one, Nyasae one,  
nase ki ere ng'a  
gwantigire? na ng'a nore  
aare korwa 'sende?  
  
Naki ore aare korwa  
ase ogonkonya  
na korwa as' amang'ana  
y'okoruma kwane?
- 2 Aye Nyasae one, nigo  
nkorera ekero  
ere mobaso, korennde  
tori konyigwa 'nche;  
  
Na ekero kia botuko  
nigo ngokorera  
nyore obokonyi bwao;  
inche tinkireti.
- 3 Korend' aye nomochenu,  
nigo omenyete  
as' ogotogia gwonsi gwa  
Israeli yao.
- 4 Chisokororia chiaito 'ntwe  
nchiagosemeretie;  
nigo chiagosemeretie  
na ogachitooria.
- 5 Ee, chikarera asore  
na chigatoorigwa;  
nigo chiagosemeretie,  
tichiasoogetigwe.
- 6 Ko inche nerikonde na  
tindi monto; inche  
nobosooku bw'abantu na  
nachayirwe nabwo.

- 7 Baria bonsi bakondora  
na kondigereria  
nigo bagonsekerera  
as' ogonchecheria;  
  
Baria nigo bagosinga-  
singisia emetwe  
yabo; nigo bakoigora  
ebikoba biabo:
- 8 Nasemeretie Yehova  
ing'a namotoorie;  
tiga amotoorie, naki  
nagokirie nere.
- 9 Ko naye kwandusetie 'se  
enda; okagera  
nkagosemeria korwa 'se  
'robeere rwa mama.
- 10 Inche nigo narutetwe  
asore korwa 'se  
engaki inche narenge  
as' enda ya mama.  
  
Korwa as' omochakano,  
nonya nkorwa ase  
enda ya mama ominto,  
naye Nyasae one.
- 11 Toba aare korwa 'sende,  
naki emechando  
nigo ere ang'e; naki  
omokonyi taiyo.
- 12 Chieri chinyinge chinkong'u  
chiang'etananire;  
chieri echo chia Basani  
chiang'etananire.
- 13 Chiaasamirie 'menwa yabo  
mamincha yane 'nche,  
buna endo ekorum  
egotandorana.
- 14 Naumoirwe buna 'mache,  
naiteirwe kegima;
- n'amauga aane onsi  
achoga-chogire;  
  
Na enkoro yane nigo  
enga obochoe;  
nigo yanyititokire  
chinsemo chia ime.
- 15 Chinguru chiane chiomire  
buna 'kegionkorio  
ekiom pa; ee, okobua  
kwane kwang'ereire.  
  
Boigo oromeme rwane  
rwabwatanire 'se  
amang'ang'ura aane; na  
kwandentire inse.  
  
As' orotu rw'amakweri  
nao kwandentire.
- 16 Naki chisese chinyinge  
chiang'etananire.  
  
Omobanda omonene  
bw'abakori 'mabe  
ong'onchokananire na  
ong'etananire.  
  
Babetire ebisanyi  
bi'amaboko aane  
na babetire 'bisanyi  
bi'amagoro aane.
- 17 Inche ninyare kobara  
amauga aane  
onsi: nigo bakondora  
na kondigereria.
- 18 Nkogabana bare chianga  
chiene gati yabo  
na ngoaka bare 'bomera  
as' eanga yane.
- 19 Ko, aye Yehova, toba  
aare korwa 'sende;  
ay' ore chinguru chiane,  
ayerera, nkonye.

ZABURI 22

- 20 Tooria omoyo 'ne korwa  
ase omoyio o  
birende, naboiigo tooria  
obogima bwane.  
  
Tooria obogima bwane  
korwa as' okobua
- 21 gw'esese; ontoorie korwa  
as' omonwa bw'endo,  
  
Ekiagera kwanyigure,  
aye kwanyigure  
korwa ase chingunchara  
chie chieri chintindi.
- 22 Nindarie erieta riao  
ase abaminto;  
'se 'mosangererekano  
gati ningotogie.
- 23 Inwe abamoirogete  
Yehova, motogie;  
mwensi ab'ororeria rwa  
Yakobo, mosike,  
  
Moe obonene; mwensi  
ab'ororeria rwa  
Israeli, momoiroke  
Omonene Nyasae.
- 24 Ekiagera Omonene  
tarachaya gose  
taragecha emechando  
y'yochohandegeete,  
  
Gose tarabisa 'bosio  
bwaye korwa 'sare;  
ko ekero arerete  
asare, naigwete.
- 25 Ogotogia kwane nkobe  
korwa 'sore ase  
omosangererekano  
omonene ime;  
  
Na ning'ikeranie chiira  
chiane as' obosio
- bwa baria bamoirogete  
na bamosigete.
- 26 'Banto abaitongo mbarie  
na baisaneke; na  
abakorigia Yehova  
mbamotogie ere.  
  
Chinkoro chiaino nchimenye  
go-ika kare na
- 27 kare; ne chinsinyo chionsi  
chi'Ense inchiiinyore;  
  
Na nchiirane 'se Yehova,  
ne chiamate chionsi  
chi'ebisaku nchisasime  
as' obosio bwao.
- 28 Ekiagera oboruoti  
nobwa Yehova; na  
nere ore omogambi  
gati y'ebisaku.
- 29 'Banto bonsi abwo bare  
abanoru ase  
Ense, barabwo mbarie na  
boigo basasime.  
  
Baria bonsi bakogenda  
inse as' orotu  
mbatung'ame bosio bwaye  
na bamosasime.  
  
Onde taiyo okonyara  
korenda omoyo  
oye erio obe moyo;  
yaya, onde taiyo.
- 30 Ororeria indorabe  
rokomokorera;  
ndobarwe as' Omonene  
buna ekegori.
- 31 Erio mbache na bararie  
'boronge bwaye 'se  
abanto baraiborwe ng'a  
okorire aya.

**Zaburi 23** 8.6.8.6. (C.M.)

Zaburi ya Daudi.

- 1 Omonene nomorisia  
one; tindemeiri.
- 2 Nigo akong'areria 'se  
'bonyansi 'bobese;  
  
Ondaa-ire as' amache  
akwongora ng'ora.
- 3 Nigo agokora 'moyo  
one koba 'moyia.  
  
Ase engencho y'erieta  
riaye rioka, nigo  
akondaa as' oboeto  
bwaye bwa boronge.
- 4 Tinkoiroka bobe bonde,  
ee, ninsa gotaara  
as' omwenya bw'omosunte  
oyio bw'amakweri,  
  
Ekiagera nore amo  
na-inche botambe;  
enyimbo yao n'enungu  
yao nabindemie.
- 5 Bosio bw'babisa baane  
kwang'ariganeirie  
emesa, na kwang'akire  
'maguta 'se 'motwe;  
  
'Gekombe kiane giaichoire,  
na ngoiteka kere.
- 6 Amaene obwanchani  
n'obuya mbimbwatie,  
  
Ase amatuko onsi  
y'obogima bwane;  
na nimenye as' enyomba  
ya Nyasae botambe.

**Zaburi 24** 8.8.8.8. (L.M.)

Zaburi ya Daudi.

- 1 Ense neya Yehova na  
ebinto bionsi bireo;  
Ense yonsi na abanto  
bareo nebi'Omonene.
- 2 Naki nigo akong'etie  
Ense yonsi igoro 'se  
chinyancha, akayekong'ia  
igoro ase chindooche.
- 3 Ning'o orariine ase  
egetunwa ki'Omonene?  
Na ning'o oratenene  
aase aye y'obochenu?
- 4 Noyobwate amaboko  
atari na komocha, na  
nomonto oria obwate  
enkoro ere enchenu;  
  
Naboigo nomonto oria  
otari koimokereria  
omoyo oye igoro  
as' ebinto bire bosa,
- 5 Gose otari gotiana  
ase obong'ainerereria.
- 5 Nanyore 'goseseneka  
korwa ase Omonene;  
  
Na nanyore oboronge  
korwa ase Nyasae ore  
ogotooreka kwaye na  
ore omotooria oye.
- 6 Eke nakio ekegori  
keria ki'abakomorigia;  
ee, buna Yakobo, baria  
bakorigia 'bosio bwao.
- 7 Ebiita, imokereria  
emetwe yaino igoro;  
na ebisieri bia kare  
na kare, eimokererie;

- Omoruoti bw'obonene  
erio nasoe imeo.
- 8 Inee, Omoruoti oyo  
bw'obonene, ere ning'o?  
  
Nere Omonene ore  
omonyanguru na nere  
Omonene omobui,  
omobui bwe chisegi.
- 9 Ebiita, imokereria  
emetwe yaino igoro;  
na ebisieri bia kare  
na kare, eimokereria;  
  
Omoruoti bw'obonene  
erio nasoe imeo.
- 10 Inee, Omoruoti oyo  
bw'obonene, ere ning'o?  
  
Omoruoti oyo nere  
Omonene bw'Emeganda;  
amaene nigo are  
Omoruoti bw'obonene.
- boigo inyorokererie  
oboeto bwao.
- 5 Yehova, ondaae ase  
ekeene kiao;  
onyorokererie inche  
ase oboene,  
  
Ekiagera Nyasae naye  
'gotooreka kwane;  
nasore nganyererete  
rituko rigima.
- 6 Aye Yehova, inyora  
amabera ao  
n'obwanchani bwao; nao  
biare korwa kare.
- 7 Korend' aye Omonene,  
tobaisa koinyora  
'bibe bi'obosae bwane  
n'ogosaria kwane.  
  
Omonene, as' engencho  
y'amabera ao,  
boigo ney'obuya bwao,  
ong'inyore inche.

**Zaburi 25** 8.6.8.6. (C.M.)  
*Zaburi ya Daudi.*

- 1 Aye Yehova, nasore  
nkoyoimokereria
- 2 omoyo 'ne. Nyasae one,  
naye nsemeryetie:  
  
Aye tontiga nsookigwe;  
totiga 'babisa  
abwo baane bagokere  
okobugwa kwane.
- 3 Ee, totiga asookigwe  
'yogosemeretie;  
tiga 'banto bagosaria  
bosa basookigwe.
- 4 Imanyie chinchera chiao,  
aye Omonene;
- 8 Nyasae nomuya; ee, ere  
nomoronge: ase  
igo nigo akworokia  
'banyabibe 'nchera.
- 9 Nigo akoraa 'baitongo  
as' oboronge, na  
a-orokia 'nchera yaye  
abaitongo abwo.
- 10 Chinchera chionsi chia Nyasae  
oito nigo chire  
amabera n'amaene  
as' abanto baye;  
  
Ee, aba nabwo abanto  
abwo barendete  
okobwatana kwaye na  
oborori bwaye.

- 11 Ase engencho y'erieta riao, Omonene, onyabere 'bobe bwane bore obonene.
- 12 Monto ki omoirogete Omonene Nyasae? Namworokererie 'nchera eyio arachore.
- 13 Omoyo oye nomenye ase obuya, na boigo oroiboro rwaye ndoche koira Ense.
- 14 Obobisi bw'Omonene Nyasae nigo bore n'abantu bamoirogete n'abamwegenete;  
Na nigo akobamanyia 'kobwatana kwaye.
- 15 Amaiso aane botambe nare 'se Yehova,  
Ekiagera Omonene nere orarusie amagoro aane korwa ase oboreba.
- 16 Ondorere amabera na ong'iranere, naki ninche bweka inde; nigo nchandegete.
- 17 'Mechando y'enkoroyane yamentire mono; koranche ondusie ase obokong'u bwane.
- 18 Rora emechando yane n'obororo bwane, aye koranche ondusie 'bibe biane bionsi.
- 19 Rora ababisa baane, naki mbare 'bange;
- mbangechete n'okogecha kore ogotindi.
- 20 Orende omoyo 'ne na ontoorie. Tindora obosooku ekiagera naye nsemeretie.
- 21 Obwegenwa n'oboronge tiga bindende 'nche, ekiagera inche nigo nkoganyete aye.
- 22 Aye Omonene Nyasae, booria Israeli korwa ase emechando eye yaye yonsi.

**Zaburi 26** 8.6.8.6. (C.M.)  
Zaburi ya Daudi.

- 1 Onachere inche 'kina, aye Omonene, naki nataarire ase oboene bwane.  
Inche nasemeirie ase Omonene Nyasae; igo tingotererigwa naboiigo tinkogwa.
- 2 Indenge, aye Yehova, boigo ing'enekie. Oteeme chinyigo chiane na enkoro yane.
- 3 Ekiagera obwanchani bwao na obuya bwao nigo bire bosio bw'amaiso aane 'nche.  
Na inche nataarire 'se ekeene kiao.
- 4 Inche tinda-ikaransa n'abwo bare bosa,

- Gose tingosoa ime  
nabwo bakwebisa  
gose tinkogenda nabwo  
bakong'ainereria.
- 5 Nagechire omoganda  
bw'abakori 'mabe;  
tingo-ikaransa amo  
n'abare ababe.
- 6 Ninsibie 'maboko aane  
ase obochenu;  
inche nigo indesabe  
amaboko aane,  
  
Erinde ing'etanane  
egesasimero  
kiao, aye Omonene,  
ee, ningetanane.
- 7 Igo nindarie n'eriogi  
ri'ogotogia; boigo  
nindarie 'meremo yao  
yonsi y'amakumia.
- 8 Nyasae, nanchire 'bomenyo  
bw'enyomba yao na  
aase agwo ogosikwa  
kwao komenyete.
- 9 Tosangereria omoyo  
one n'abasaria  
gose obogima bwane  
amo n'abaiti.
- 10 Amabe nigo are 'se  
amaboko abo;  
'maboko abo a borio  
naichire n'amaaki
- 11 Korend' asende, nintaare  
ase oboene  
bwane; mboorie, ondorere  
amabera boigo.
- 12 Okogoro kwane nigo  
goteneine aase
- aateremu, na korokwo  
tigokogwa inse.
- Ninsesenie Yehova na  
nimotogie ase  
emesangererekano  
emenene ime.
- Zaburi 27** 8.6.8.6. (C.M.)  
*Zaburi ya Daudi.*
- 1 Omonene nere ore  
oborabu bwane  
na ogotooreka kwane.  
Ning'o indairoke?
- Yehova nere chinguru  
chi'obogima bwane,  
ase igo ning'o ndabe  
inkwoboa rende?
- 2 Ekero abasareku  
bang'umokerete  
ase okoria chinyama  
chiane, mbagochetwe.
- Ee, ekero ababisa  
baane n'abachandi  
baane bang'umokerete,  
barabwo mbagwete.
- 3 Neba omoganda oro  
oetananire  
mamincha yane, enkoro  
yane tekiroka.
- Esegi neimokerera  
igoro mamincha  
yane, ase aya inche  
nimbe n'oboremu.
- 4 Egento ekemo inche  
naganirie korwa  
'se Yehova, na egento  
ekio ninkerigie:

- Ng'a imenye as' enyomba  
y'Omonene Nyasae  
ase amatuko onsi  
y'obogima bwane;
- Ng'a indore oboseera  
bw'Omonene Nyasae,  
na egere imorigie  
as' Hekalu yaye.
- 5 Naki nambise as' eema  
yaye ime ase  
engaki y'emechando, ee,  
nambise imeo.  
  
Nambise as' obobisi  
bw'obomenyo bwaye;  
ere nambeke igoro  
ase egetare.
- 6 Na bono omotwe one  
noimokererigwe  
'goro 'se 'babisa baane  
bang'etanaine 'nche.  
  
Ase igo inche nindue  
ebing'wanso bire  
ebi'omogoko as' eema  
yaye, na nintere.
- Ee, nintere ogotogia  
ase Omonene.
- 7 Aye Omonene, igwa  
ekero nkorera.  
  
Igwa ekero nkorera  
n'eriogi riane, na  
ondorere amabera,  
na ong'iranerie.
- 8 Aye nigo gwantebetie:  
Rigia 'bosio bwane.  
Na erio enkoro yane  
egakoiraneria:  
  
Nindigie obosio bwao,  
aye Omonene.
- Inche ninkorigie mono  
goetania bionsi.
- 9 Tobisa obosio bwao  
korwa 'sende, gose  
toseria 'mosomba oo  
as' ekeririanda.  
  
Kwabeire 'bokonyi bwane;  
tontuguta gose  
tontiga 'nche, aye naye  
Nyasae ogontooria.
- 10 Ekero tata ominto  
na mama ominto  
bagontiga inche, erio  
Yehova nang'ire.  
  
11 Yehova, nyorokererie  
enchera yao na  
ondaae as' oboeto  
bore oboronge.  
  
Ondaae ase engencho  
y'ababisa baane.
- 12 Tondua gochia as' ogwancha  
kw'ababisa baane;  
  
Naki abanyaborimo  
banyimokeire 'nche,  
na nigo bakoeiana  
n'obotindi mono.
- 13 Nanga inche nagoyete,  
onye ntegenete  
ng'a nindore obuya bwa  
Yehova as' ense,  
  
Agwo as' ense y'abantu  
abwo bare moyo.
- 14 Moganyerere Yehova,  
kabe omokong'u;  
  
Na nae enkoro yao  
chinguru naboiigo  
nayekong'ie. Natebire:  
Oganye Yehova.

- |                  |  |  |
|------------------|--|--|
| <b>Zaburi 29</b> | 8.8.8.8 (L.M.)   |  |
| Zaburi ya Daudi. |  |  |
| 1                | Inwe 'bana b'ababui,<br>karue ase Omonene,<br>karue ase Omonene<br>obonene ne chinguru.  | 'Riogi ri'Omonene nigo<br>rikonyegeria erooro;<br>aaria Kadeshi Yehova<br>nigo akoyenyegeria.  |
| 2                | Karue ase Omonene<br>'bonene bw'erieta riaye;<br>sasima Yehova ase<br>oboseera bw'obocheinu.   | 'Riogi ri'Omonene nigo<br>rikorentera chingabi<br>chia-ibora; boigo nigo<br>rigochobora 'manani;   |
| 3                | 'Riogi ri'Omonene nigo<br>rire igoro y'amache;<br>Nyasaе bw'obonene nigo<br>agoaka enkoba mono;<br><br>Omonene nigo are<br>igoro ase amache<br>amange; ee, nigo are<br>igoro ase chinyancha. | Ime ye Hekalu yaye<br>kera oyomo aroro<br>nigo agokwana aya:<br>Obonene, obonene!  |
| 4                | 'Riogi ri'Omonene nigo<br>rire n'okobua; eriogi<br>ri'Omonene nigo rire<br>n'obonene ne chinguru.  | 10 Omonene ere nigo<br>aikaranseteo ase<br>ekerogo ki'obonene<br>igoro ase etoigo.<br><br>Ee, Yehova ere nigo<br>aikaransete igoro<br>aaria; ere n'Omoruoti<br>goika kare na kare. |
| 5                | 'Riogi ri'Omonene nigo<br>rikoyebuna emete<br>emecharake 'menene;<br>ee, nigo rikoyebuna.<br><br>Ee, Yehova ere nigo<br>akoyebuna emete<br>emecharake aaria 'se<br>Lebanoni ebing'ese.       | 11 Omonene ere nae<br>abanto baye chinguru;<br>Omonene nasesenie<br>'banto baye n'omorembe.  |
| 6                | Nigo akoyecharokia-<br>charokia buna emori,<br>na buna eeri ensae<br>Lebanoni na Sirioni.  | <b>Zaburi 31</b> 8.8.8.8. (L.M.)<br>Ase omoteri omonene, Zaburi ya Daudi.  |
| 7                | 'Riogi ri'Omonene nigo<br>rigwatanana chimeme<br>chi'omorero; 'riogi riaye<br>nigo rigochiatanana.   | 1 Aye Yehova, nasore<br>insemeretie; tontiga<br>nsookigwe; aye intoorie<br>ase oboronge bwao.  |
|                  |  | 2 Na tegereria ogoto<br>kwao gocha 'sende; ntoorie<br>bwango; kabe egetare<br>kiane kere egekong'u.<br><br>Naboigo kabe enyomba<br>y'okorwanerera ase                              |

- 3 ogontooria, ekiagera  
naye egetare kiane,  
  
Na naye eburi yane.  
Ase igo, as' engencho  
y'erjeta riao, ondaae  
boigo onyorokererie.
- 4 Ng'use inche korwa ase  
oboreba bantegeire  
bobisi bombwate, naki  
naye chinguru chiane 'nche.
- 5 Nase okoboko kwao  
nkobeka omoika one;  
kwambooririe, Omonene,  
aye Nyasae bw'ekeene.
- 6 Inche nagechire abwo  
bagwancherana 'borimo  
bwa bosa; korende nigo  
nsemeretie Omonene.
- 7 Ninchenge na ngoke ase  
amabera ao, naki  
nigo kwarigereretie  
ogochandwa kwane gwonsi;  
  
Amaene nkamanyete  
omoyo one ekero  
orenge n'emechando na  
as' engaki y'obokong'u.
- 8 Na toransiekera ase  
okoboko kw'omobisa;  
ngwatenenetie 'magoro  
aane aase aagare pi.
- 9 Aye Omonene Nyasae,  
indorere amabera,  
naki inche nigo inde  
n'emechando emenene;  
  
Amaiso aane n'omoyo  
one, amo n'enda yane,  
bia-erire as' engencho  
y'omoichano n'obororo.
- 10 Ekiagera obogima  
bwane bwaetire ase  
obororo na emiaka  
yane ase egekoe.  
  
Amauga aane aro  
omire pa, ne chinguru  
chiane chia-erire ase  
engencho y'obobe bwane.
- 11 Nkaba obosooku gati  
y'ababisa baane bonsi,  
korende mono kegima  
gati y'abaamate baane.  
  
Boigo nabeire obwoba  
as' abamanyete inche;  
abanto abakondora  
as' enchera bagantama.
- 12 Buna omonto okwete,  
nigo nebirwe korwa 'se  
ebirengererio; nigo  
inga 'nyongo yatekire.
- 13 Naki naigwete 'kong'acha  
kw'abanto abange; ase  
kera ensembo obwoba  
nigo bwang'etananete.  
  
Ekero basemanetie  
amo mamincha yane 'nche,  
mbaroberetie korusia  
obogima bwane bwonsi.
- 14 Korende, aye Yehova,  
inche nagosemeretie;  
inche nigo nakwanete:  
Aye naye Nyasae one.
- 15 Chingaki chiane nchire 'se  
okoboko kwao; ntoorie  
korwa ase okoboko  
kw'ababisa baane bonsi.  
  
Koranche intoorie korwa  
ase abagontesa, ee,

- nonya nkorwa ase baria  
bagonchanda na komiga.
- 16 Na kora obosio bwao  
bomese igoro ase  
omosomba oo. Ntoorie  
ase amabera ao.
- 17 Aye Yehova, tontiga  
insookigwe, ekiagera  
nakorangerie; ko tiga  
'basareku basookigwe.  
  
Tiga basookigwe mono,  
tiga babe amamama  
na bakire-kiri agwo  
as' oboina bwabo ime.
- 18 Tiga ebikoba bionsi  
bi'oborimo bikirigwe;  
nonya nebio bigokwana  
amang'ana amakong'u,  
  
Ebio nigo bigokwana  
mamincha y'omonto ore  
omoronge n'amang'ana  
y'obwerori n'obochayi.
- 19 Inaki obuya bwao  
bore obonene mono!  
obwo kwagachire ase  
abanto bakoirogete,  
  
Obwo gwakorete maiso  
marore gochia 'se baria  
bagosemeretie bosio  
bw'abana ba mwanyabanto.
- 20 Nobabise bosio bwao  
aase are a bobisi  
korwa as' emeroberio  
emebe ya mwanyabanto.  
  
Boigo aye nobarende  
bobisi as' ekegutu,  
nonya nkorwa as' esegi  
n'okwomana gwe chimeme.
- 21 Asesenigwe Yehova,  
'kiagera nanyorogetie  
'buya bwaye bw'ogokumia  
as' omochie omokong'u.
- 22 Naki nigo nakwanete  
as' okwayerera kwane:  
Inche nigo nanachirwe  
korwa as' amaiso ao.  
  
Korende aye nkwaigwete  
eriogi ri'ogosorora  
kwane n'ogosaba kwane  
ekero nakorerete.
- 23 Mwanche Omونene, inwe  
mwensi abachenu baye;  
naki Omونene nigo  
akorenda abegenwa.  
  
Na ere nigo akoa  
omokori obwerori  
eng'eria enene embe;  
namoe egesusuro.
- 24 Aba momosemeretie  
Omonene, inwe mwensi  
kabe n'oboremu; nae  
chinkoro chiaino chinguru.

**Zaburi 32** 8.6.8.6. (C.M.)*Zaburi ya Daudi, Masikili.*

- 1 Nasesenirie omonto  
oria ogosaria  
kwaye kwabeirwe n'ebibe  
biaye biatubirwe.
- 2 Nasesenirie omonto  
oria Omونene  
Nyasaе atabarereti  
'bobe bonde bwonsi;  
  
Omonto oria otari  
n'obong'ainereria

- gose oborimo ase  
'moika oye ime.
- 3 Ekeri intakwanete  
na nkirete-kiri,  
amauga aane onsi  
akaba 'magotu.  
  
As' engencho y'okoruma  
kwane omobaso  
boira, amauga aane  
onsi akagota.
- 4 Naki ase omobaso  
n'obotuko boigo,  
okoboko kwao nigo  
kwanditoerete.  
  
Buna 'mache agokama  
as' eguru-gura  
as' engaki y'omobaso,  
inche nomire bo.
- 5 Nka-orokia 'bibe biane  
asore, n'obobe  
bwane tinabobisete;  
nigo nakwanete:  
  
Ning'orokie ase Nyasae  
ogosaria kwane.  
Obobe bw'ebibe biane  
nkwaborusetieo.
- 6 As' ayio kera omonto  
ore n'obonyasae  
nagosabe as' engaki  
okonyorekana,  
  
Na amaene etoigo  
y'amache amange  
tekonyara gocha ang'e  
nere nonya ng'ake.
- 7 Aye nobotamero na  
obwebiso bwane;  
aye nondende korwa 'se  
emechando yane.
- Yehova, nong'etanane  
inche n'amatera  
y'omogoko bw'ogotooria  
na bw'ogotooreka.
- 8 Ninkworokererie 'nchera  
oragende; boigo  
ninkwegerie; ningosemie  
n'amaiso aane 'nche.
- 9 Inwe abanto, timoba  
buna chibarasi  
ne chiyombo chitabwati  
obomanyi bonde:  
  
Nigo mokobwata 'menwa  
yabo n'ebiokio na  
ebigobanio erinde  
chiche asemore.
- 10 Obororo 'bonge mbobe  
ase omobe, ko  
oyosemeretie Nyasae  
nabwate obuya,  
  
N'amabera y'Omonene  
namoetanane.
- 11 Inwe abanyaboronge,  
goka ase Nyasae.  
  
Chenga na mo-ake 'riogi  
ri'omogoko, inwe  
mwensi abanyaboronge  
'se chinkoro chiaino.

**Zaburi 33**

8.8.8.8. (L.M.)

- 1 Inwe abanyaboronge,  
tera n'omogoko ase  
Omonene; ogotogia  
nigo kore ogoseera.
- Ee, nigo ere boronge  
ase abanyaboronge  
goterera Omonene.
- 2 Togia Nyasae n'obokano;

- Mo-akere Yehova ng'a  
mbuya mono n'obokano  
bore ne chinga ikomi  
na ase ebirigisa.
- 3 Moterere ogotera  
okoyia; inwe bibugie  
as' enchera y'obomanyi  
na as' eriogi rinene.
- 4 Naki ring'ana ria Nyasae  
nigo rire rironge na  
ogokora kwaye gwonsi  
nokw'obwegenwa botambe.
- 5 Yehova nigo anchete  
oboronge na ebina;  
na Ense nigo eichire  
n'amabera y'Omonene.
- 6 Erioba rire igoro  
y'Ense rikaroisigwa, na  
boigo emeganda yonsi  
eyio ere ime yabo,  
  
Birobio bikaroisigwa  
ne ring'ana ri'Omonene  
na ase okoeyana  
gokorwa omonwa oye.
- 7 Agasangereria 'mache  
y'enyancha buna etui,  
na akabeka chindiba  
chi'enyancha ase chikungo.
- 8 Tiga Ense yonsi ebe  
ekoiroka Omonene,  
n'abamenyi bonsi b'Ense  
baoboe bosio bwaye.
- 9 Naki nigo akwanete,  
na ayio agakoreka;  
ee, agachika, na ayio  
agatenena bokong'u.
- 10 Nyasae nigo agosiria  
obosemia bw'ebisaku;
- ere nigo agotanga  
emeroberio y'abantu.
- 11 Goika kare na kare  
obosemia bw'Omonene  
Nyasae nigo boteneine  
bokong'u na tibokogwa;  
  
Boigo ebirengererio  
bi'enkoro yaye, birobio  
nigo bigendererete  
ase ebigori bionsi.
- 12 Ngesesenirie botambe  
egesaku ekio Nyasae  
oye are Omonene;  
ee, ngesesenirie bori.  
  
Mbasesenirie abanto  
abwo Nyasae achorete  
koba omwando oye, ee,  
imbasesenirie bori.
- 13 Korwa Igoro, Yehova  
nigo arigereretie  
na korora abana ba  
mwanyabanto bonsi b'Ense.
- 14 Korwa aaria obomenyo  
bwaye Omonene nigo  
arigereretie bonsi  
abamenyete as' Ense.
- 15 Ere nigo akoroisia  
chinkoro chi'abantu bonsi;  
na namanyete korenga  
ogokora kwabo gwonsi.
- 16 Omobui onde tari  
gotoorigwa ne chinguru  
chinene, gose 'moruoti  
n'omoganda bw'abawani.
- 17 Gosemeria ebarasi  
mbosa ase ogotooria;  
tegotooria monto ase  
chinguru chiaye chinyinge.

- 18 Inwe, rora ng'a amaiso  
y'Omonene nigo are  
gochia as' abanto baria  
bare n'okiroka 'sare,  
Ase abagosemeria
- 19 obuya bwaye, erinde  
'mioyo yabo etoorigwe  
korwa ase amakweri,  
Na egere abarende  
babe moyo as' engaki  
endagera ere enke,  
n'ekero enchara ere.
- 20 'Mioyo yaito ero nigo  
emoganyete Yehova;  
nere ogokonywa gwaito  
na nere enguba yaito.
- 21 Ee, chinkoro chiaito nigo  
chikogoka 'sare, naki  
ntwasemeretie erieta  
riaye erire richenu.
- 22 Aye Omonene, tiga  
amabera ao abe  
asetore, koreng'ana  
buna togosemeretie.
- amo toriimokererie  
erieta riaye igoro.
- 4 Inkarigia Omonene,  
na ere akanyigwa, na  
akandusia korwa ase  
okiroka kwane gwonsi.
- 5 Bakamrigereria na  
barabwo bakameserwa,  
naboigo amasio abo  
tabete agosookigwa.
- 6 Omotaka oyo ere  
akarera, na Yehova  
akaigwa; akamotooria  
korwa 'se 'mechando yonsi.
- 7 Omomalaika o Nyasae  
nigo a-etanaine na  
korenda 'bamoirogete,  
na nigo akobatooria.
- 8 Teema na oncha na rora  
ng'a Omonene nomuya.  
Nasesenirie omonto  
oria omosemeretie.
- 9 Iroka Yehova, inwe  
abachenu baye, naki  
okoremerwa tikoiyo  
as' abwo bamoirogete.
- 10 Chindo chinsae nchibwati,  
boigo nchire n'enchara; ko  
abakorigia Yehova  
tibakoremerwa 'maya.
- 11 Inwe abana, inchuo na  
boigo ntegerere inche,  
na nimbaorokererie  
okomoiroka Yehova.
- 12 Inee, ning'o organetie  
obogima na bwanchete  
amatuko amange na  
erio arore amaya?

**Zaburi 34** 8.8.8. (L.M.)  
Zaburi ya Daudi, ekero aonchoreretie  
chingencho chiaye bosio bw'Abimeleki,  
oyio omoseretie, na akagenda.

- 1 Ninsesenie Omonene  
chingaki chionsi; 'gotogia  
kwaye nkogendererete  
koba as' omonwa one.
- 2 Omoyo one mbwerore  
ase Omonene Nyasae;  
abaitongo imbaigwe na  
boigo barabwo mbagoke.
- 3 Neneiyia Yehova, inwe  
na-inche, na tiga twensi

- 13 Renda oromeme rwao korwa ase obobe na ebikoba biao korwa as' ogokwana 'borimo.
- 14 Karwe korwa as' obobe, okore amaya; rigia ayare ay'omorembe na oyobwatie botambe.
- 15 Amaiso a Nyasae nare ase abanyaboronge, na amato aye nigo akoigwa 'korera kwabo.
- 16 Obosio bwa Nyasae mbore mamincha y'ababe ase ogoesiria okoinyorwa kwabo korwa ase Ense.
- 17 Yehova nigo akoigwa abwo bakomorera, na abatooria korwa ase emechando yabo yonsi.
- 18 Omone nare ang'e nabwo bare ne chinkoro chibunirwe, na gotooria abwo b'omoika 'bunirwe.
- 19 'Mechando emenge nere ase omonyaboronge, ko Yehova amotooria korwa ase eyio yonsi.
- 20 Ere nigo akorenda amauga aye onsi; ee, nonya nerimo riabo tirikoba rikobunwa.
- 21 Obobe mboite omonto omosareku, na baria bagechete omoronge mbabe abamochi mono.
- 22 Nyasae nigo akobooria 'mioyo y'abasomba baye,
- na onde omosemeirie takorokwa omomochi.
- Zaburi 36** 8.8.8. (L.M.)  
Ase omoteri omonene, *Zaburi ya Daudi*, omosomba bw'OMONENE.
- 1 Ebibe na ogosaria kw'omonto omosareku nigo bikoorokia buna tamoirogeti Yehova.  
Ee, okomoiroka Nyasae tikori bosio bw'amaiso aye; na enkoro yane neyamanyete kegima.
  - 2 Naki nigo akweansia ase amaiso aye ng'a 'bobe bwaye mbokogechwa gose mbokomanyekana.
  - 3 'Mang'ana y'omonwa oye nare n'obong'ainereria n'obobe; na otigire koba omonto 'mong'aini;  
Na otigire gokora
  - 4 ayare amaya. Ase oborere bwaye nigo akoroberia obosa.  
Ere nigo akwebeka ase enchera etari ngiya; tagecheti bobo; ee, ere tabogecheti.
  - 5 Yehova, 'mabera ao nigo aigete erioba; obwegenwa bwao nigo boigete ase amare.
  - 6 Oborange bwao nigo bore buna ebitunwa ebinene; na ebina biao nebitambe bire.

Nigo bire ebitambe  
buna endiba. Yehova,  
aye nigo okorenda  
mwanyabanto ne ching'iti.

7 Aye Omonene Nyasae,  
amaene obwanchani  
bwao inaki bore bwe  
rigori rire rinene!

Ase igo abana ba  
mwanyabanto mbatamere  
ekiriri gie chimbaba  
chiao na mbagosemerie.

8 Mbaisaneke kegima 'se  
'bonoru bw'enyomba yao;  
nobae banywe korwa 'se  
'rooche rw'omogoko oo.

9 Naki nobwate ensoko  
n'entuboka y'obogima.  
Ase oborabu bwao  
intorore oborabu.

10 Omonene, genderera  
koorokia 'mabera ao  
amo n'obwanchani bwao  
as' abwo bakomanyete.

Na genderera koorokia  
oboronge bwao ase  
'banto bare abaronge  
ime ye chinkoro chiabo.

11 Okogoro kw'obwerori  
totiga goche mamincha  
yane, gose okoboko  
kw'omonto 'mobe gonsukie.

12 Agwo nao abakori  
amabe bagure inse;  
barabwo barutirwe 'nse;  
tibakonyara koimoka.

### Zaburi 37 8.6.8.6. (C.M.)

Zaburi ya Daudi.

- 1 Togechigwa as' engencho  
y'abakori 'mabe,  
gose toba neribero  
as' abanyabibe.
- 2 'Kiagera bwango mbanachwe  
buna obonyansi;  
boigo basusane buna  
'bimeri 'bibese.
- 3 Semeria Omonene na  
okore amaya;  
noragerigwe bori na  
nomenye as' ense.
- 4 Naboigo egokie aye  
ase Omonene,  
na okogania gw'enkoro  
yao nagokoe.
- 5 Aye beka 'nchera yao  
gochia 'se Yehova;  
boigo aye mosemerie,  
na nayeikeranie.
- 6 Na Yehova naorokie  
oboronge bwao  
buna ere akoorokia  
oborabu bwaye,  
  
Na naorokie ekina  
kiao n'ekeene  
kiao buna amasase  
a mobaso gati.
- 7 Timoka na toerera  
ase Omonene,  
na moganyerere ase  
oboremereria.  
  
Tokumia na togechigwa  
as' engencho y'oria  
okogenderera buya  
as' enchera yaye.

- Togechigwa as' omonto  
oyio okorenta  
emeroberio emebe  
na koyeikerania.
- 8 Tanga ekeririanda na  
tiga endamwamu.  
Togechigwa nchera ende  
okore obobe.
- 9 Naki 'bakori amabe  
mbanachwe, korenende  
abamoganyete Nyasae  
mbaire 'mwando bw'Ense.
- 10 Ekiagera as' engaki  
enke omokori  
'mabe takoba aroro;  
takoba aroro;  
  
Na origererie mono  
aase arenge na  
ere takonyorekana;  
takoba aroro.
- 11 Korend' abaitongo mbaire  
omwando bw'Ense na  
begokie as' omorembe  
omonge botambe.
- 12 Omonto omosareku  
nkoroberia are  
mamincha y'omonto oria  
ore omoronge;  
  
Na nigo agotumeka  
amaino aye, ee,  
erinde ariananerie  
omonyaboronge.
- 13 Nyasae namosekerere,  
naki naroche ng'a  
rituko riaye ndichiche,  
ee, ndichiche bori.
- 14 'Basareku bang'usire  
omoyio obo o
- birende, boigo obota  
bwabo bakumbire;
- Erinde baite abare  
n'enchora endonge,  
na go-it a omotaka  
na omoremerwa.
- 15 Ko emeyio ya birende  
yabo nesoe 'se  
chinkoro chiabo; n'amata  
abo nasenyentwe.
- 16 Ebike biria 'moronge  
abwate nebiya  
kobua obonda 'babe  
abange babwate.
- 17 Naki bori amaboko  
y'abantu ababe  
nabunwe, ko abaronge  
Nyasae nabasiire.
- 18 Omonene namanyete  
amatuko onsi  
y'abantu bare boronge,  
ee, nayamanyete.  
  
Naboigo omwando obo  
nobeo botambe  
goika kare na kare,  
ee, nogenderere.
- 19 Tibagosookigwa ase  
engaki y'amabe;  
boigo ase amatuko  
y'enchora mbaigote.
- 20 Korende abasareku  
imbasirigwe, na  
ababisa b'Omonene  
mbasire kegima;  
  
Buna erioki mbasire;  
buna obonoru  
bwe chimanwa chie ching'ondi  
mbasire kegima.

- 21 Omonto omosareku  
ere nere oria  
ogokobesa na tari  
koirania naende;  
  
Ko omonto omoronge  
nigo akoorokia  
amabera, boigo nigo  
akorua n'ogwancha.
- 22 Na baria agosesenia  
mbaire 'mwando bw'Ense;  
ko baria aragereirie  
imbarusigweo.
- 23 Amatambokero y'oria  
ore omoronge  
nakong'etigwe na Nyasae  
ore Omonene;  
  
Na nigo akogokigwa  
as' enchera yaye.
- 24 Onye okogwa, takogwa  
inse kejima pi,  
  
Naki Omonene nigo  
akomosiira, ee,  
Omonene namosiire  
n'okoboko kwaye.
- 25 Narenge omosae na  
bono nagotire,  
ko tinaroche 'moronge  
ogotigwa bosa;  
  
Gose tinana korora  
oroiboro rwaye  
rokorigia omogati  
obo nonya ng'ake.
- 26 Nigo agokobesia na  
nare n'amabera  
botambe; n'abana baye  
imbasesenigwe.
- 27 Aye karue as' amabe  
na kora amaya;
- goika kare na kare  
menya as' obuya.
- 28 Naki Omonene nigo  
anchete ekina;  
na ere tari gotiga  
abachenu baye;  
  
Nigo bakorendwa kare  
na kare; korende  
'roiboro rw'abasareku  
indorusigweo.
- 29 Abanyaboronge mbaire  
omwando bw'ense na  
goika kare na kare  
mbamenye aroro.
- 30 Omonwa bw'omonto ore  
omoronge nigo  
ogokwana as' enchera  
y'obong'aini bori.  
  
Boigo oromeme rwaye  
nigo rogokwana  
igoro y'ekina ekio  
kere ekeronge.
- 31 Na amachiko a Nyasae  
oye nigo are  
as' enkoro yaye ime,  
ee, nare aroro.  
  
Amatambokero aye  
tagotererigwa;  
ee, tari gotererigwa  
ase agoeta.
- 32 Na omosareku nigo  
akomotengera  
omonto omoronge na  
korigia amoite.
- 33 Yehova takomotiga  
omonyaboronge  
as' okobua gw'okoboko  
kw'omonto omobe.

- Ekero akogambigwa,  
Yehova takorua  
ekina mamincha yaye;  
ee, tagokora bo.
- 34 Ganyerera Yehova na  
renda 'nchera yaye;  
nakoiokererie 'goro  
oire 'mwando bw'ense.
- Ekero abasareku  
bararusigweo  
na konachwa, noyarore  
amang'ana ayio.
- 35 Namororire omonto  
omosareku 'se  
okobua okonene na  
ore n'obotindi.
- Ere nigo akoranda  
buna omote, ee,  
buna 'mote ogokina  
as' okoreereta.
- 36 Korende akarwao na  
rora, tarengoe;  
ee, nkamorigia korende  
tanyorekanete.
- 37 Rora omoikeranu, ee,  
rora omoronge;  
naki omoerio oye  
nobe n'omorembe.
- 38 Ko abanto abasaria  
mbasirigwe amo;  
na omoerio bw'ababe  
norarusigweo.
- 39 Korende ogotooreka  
kw'abanyaboronge  
nigo gokorwa 'se Nyasae  
ore Omonene.
- Amaene ere nere  
chinguru chiabo na
- obotamero bwabo 'se  
'ngaki y'emechando.
- 40 Na Yehova nabakonye,  
boigo abatoorie;  
ere nabatoorie korwa  
as' abasareku.
- Omonene Nyasae ere  
nabatoorie, naki  
mbamatamerete boigo  
mbamosemeretie.
- Zaburi 38** 8.6.8.6. (C.M.)  
Zaburi ya Daudi ase okoinyoria.
- 1 Yehova, tontogonyera  
n'endamwamu yao,  
gose tondongeyia ase  
'keririanda kiao,
- 2 Ekiagera 'megwe yao  
yansoire inche; na  
kwamigire gochia inse  
n'okoboko kwao.
- 3 Oboikeranu tiboiyo  
ime ye chinyama  
chiane chionsi as' engencho  
y'endamwamu yao.  
  
Ase engencho y'ebibe  
biane, omorembe  
toyo nonya ng'ake ime  
y'amauga aane.
- 4 Ekiagera 'bibe biane  
biantubire nonya  
ngo-ika omotwe one;  
biayoetanirie,  
  
Ebio nigo bire buna  
egurube 'ndito;  
nigo bire ebirito  
kegima asende.

- 5 Amaote aane nigo  
agotioka bobe;  
agundire as' engencho  
y'oboriri bwane.
- 6 Na-umamire mono na  
ning'umaime; nigo  
ngendererete korera  
rituko rigima.
- 7 Naki ekebono kiane  
ne chibachwa chiane  
nigo biichire n'okoyia  
buna omorero,  
N'oboikeranu tiboiyo  
'se chinyama chiane.
- 8 Inche nomonyanyuru na  
nasenyentekire.  
Nigo nkona-kweumia 'se  
'ngenchu y'obororo  
bw'enkoro yane, naboigo  
inche narumire.
- 9 Omonene, okogania  
kwane gwonsi okwo  
kore ime yane nigo  
kore bosio bwao;  
Na ogochandeka kwane  
n'okweumia kwane  
tibibisiri asore,  
aye Omonene.
- 10 Na enkoro yane nigo  
egotiesana, ne  
chinguru chiane chirochio  
chiantigire inche,  
Naboigo oborabu na  
okomesa ebio  
bire ebi'amaiso aane  
biarure asende.
- 11 Abanchi baane naboigo  
abasani baane
- nigo bateneine aare  
as' amaakwa aane.  
Boigo abaminto amo  
n'abaamate baane  
nigo bateneine aare  
mono korwa 'sende.
- 12 Na barabwo bakorigia  
obogima bwane  
nigo bagotega 'sende  
oboreba bwabo;  
N'abakorigia amabe  
asende ngokwana  
bare ogosarigwa na  
omoerio one;  
Na nigo bakoroberia  
obong'ainereria  
omobaso boira, nigo  
bagokora igo.
- 13 Korende inche nabeire  
buna omotino,  
tindi koigwa; ee, nabeire  
buna omotino;  
Narenge buna rimama  
oyotanyarete  
koigora omonwa oye  
ase ogokwana;
- 14 Na nigo narenge buna  
oyotari koigwa  
n'ogotogonyera nkoiyo  
as' omonwa oye.
- 15 Aye Omonene Nyasae  
one, noigwe, naki  
inche nigo nsemeretie  
asore, Yehova.
- 16 Ekiagera nakwanete:  
Inyigwe erinde  
ababisa tibagoka  
mamincha yane 'nche;

- Eker 'kogoro kwane  
gokogwa, barabwo  
mbeimokereria igoro  
mamincha yane 'nche.
- 17 Naki ninde ang'e kogwa,  
n'borororo bwane  
nigo bogendererete  
as' obosio bwane.
- 18 Naki nindarie obobe  
bwane; na ning'eitie  
ase engencho y'obobe  
bwane na ebibe.
- 19 Korende abanto bare  
ababisa baane  
nigo bare abagima;  
mbabwate chinguru;
- Na abangechete bosa,  
batabwati ngencho,  
bamentekire mono; ee,  
barabwo nabange.
- 20 Abagoakana amabe  
as' amaya mbare  
mamincha yane, 'kiagera  
nkobwatia amaya.
- 21 Aye Yehova, tontiga;  
aye Nyasae one,  
toba aare korwa 'sende;  
ayerera nkonye.
- 22 Aye Omonene one,  
ayerera nkonye;  
ekiagera aye naye  
'gotooreka kwane.
- inche tinkora ebibe  
binde n'oromeme rwane;
- Nindende omonwa one,  
ninyobek egeokio  
ekero omosareku  
are as' obosio bwane.
- 2 Nigo narenge rimama;  
inche tinare gokwana;  
na ngakira-kiri korwa  
as' ogokwana amaya.
- Boigo obororo bwane  
bokaba bokomenteka;  
omoichano one noro  
omentekanire mono.
- 3 Riberera rikaba 'se  
enkoro yane ime na  
'kero narengereretie  
omorero okamenta.
- Ingakwana n'oromeme  
rwane as' enchera eye:
- 4 Yehova, nkore imanye  
omoerio one ninki,
- N'ekerengo kiamatuko  
aane, inaki keng'ana,  
erio imanye obweng'e  
bw'obogima bwane inche.
- 5 Rora, naye kwaroisirie  
amatuko aane aro  
abe buna obogare  
bw'egesanyi gi'okoboko.
- Na emiaka y'obogima  
bwane nigo ere buna  
teri gento as' obosio  
bwao. Ero teri gento.
- Ekeene kera 'monte  
ase okogenderera  
kwaye okuya botambe  
ere nigo are bosa.
- Zaburi 39**      8.8.8.8. (L.M.)  
Ase omoteri omonene, ase Yedutuni.  
Zaburi ya Daudi.
- 1 Ngateba: Inche nindende  
chinchera chiane erinde

- 6 Ekeene kera 'monto  
nigo agotaara ase  
okororekana bosa;  
ekeene, ere mbosa.  
  
Bori nigo bagwechanda  
bosa; na asangereria  
enibo ko tamanyeti  
ng'a ning'o orayetware.
- 7 Na bono, aye Yehova,  
ninki inganyererete?  
Asore nao mbegete  
ogosemeria kwane 'nche.
- 8 Ontoorie inche korwa 'se  
ogosaria kwane gwonsi;  
tobaisa gonkora imbe  
obosooku bw'omoriri.
- 9 Nigo narenge rimama,  
tinaigorete omonwa  
one, ekiagera aye  
naye gwakorete ayio.
- 10 Aye orusie ogoaka  
kwao korwa 'sende, naki  
naerire as' ogoakwa  
okwo gw'okoboko kwao.
- 11 Ekeri okorongeyia  
na okomotogonyera  
omonto ase engencho  
y'obobe na ogosaria,  
  
Aye nigo ogokora  
obwari bwaye bwasira  
buna ekegwankwa. Bori  
kera omonto imbosa.
- 12 Igwa ogosaba kwane,  
aye Omonene Nyasae,  
naboigo otegerere  
ase okorera kwane.  
  
Tokira-kiri ekero  
inkooyeria amariga
- aane, ekiagera inche  
nomoeti inde naye.  
  
Inche nomogeni inde  
buna chisokoro chiane  
13 chionsi chiarenge. Intige  
erio inyore chinguru.  
  
Ndende egere inyore  
chinguru naende, nyuma  
ntaragenda na ntararwa  
korwa aiga na timbaio.

**Zaburi 40** 8.8.8.8. (L.M.)  
Ase omoteri omonene, Zaburi ya Daudi.

- 1 Nkamoganyerera Nyasae  
ase okoremereria:  
akanyeonchorera na  
akaigwa 'kerero kiane.
- 2 Ere akandusia korwa  
ase engoro y'eriogi  
ri'obobe na korwa ase  
etintira na esike,  
  
Agatenenia 'magoro  
aane ase egetare  
igoro, na agakong'ia  
amatambokero aane.
- 3 Akang'a ase omonwa  
one 'gotera okoyia,  
'gotera gw'okomotogia  
Omonene Nyasae oito.  
  
Erio abanto abange  
imbarore na bairoke,  
naboigo abanto abwo  
mbasemerie Omonene.
- 4 Nasesenirie omonto  
oria okorire Nyasae  
koba 'gosemeria kwaye  
na obotamero bwaye.

- Na tari goonchoka gochia  
ase aberori gose  
'se baria bakogwa gochia  
ase oborimo bosa.
- 5 Aye Omonene Nyasae  
one, emeremo yao  
y'amakumia gwakorire  
nigo ere 'menge mono;  
  
N'ebirengererio biao  
gocha 'setore nebinge.  
Tibikoroberigwa 'se  
omoroberio asore.  
  
Onye nkobiraria nare  
na kobikwana birobio,  
nigo bire 'binge mono  
bitanyare kobareka.
- 6 Ebing'wanso n'ebirugwa  
tikwagogetigwe nabio,  
korende kwayabochoire  
amato aane, Yehova.  
  
Ekeng'wanso ki'ogosambwa  
aye tigwakeganetie  
na ekeng'wanso ki'ebibe  
aye tigwakeganetie.
- 7 Erio ngateba: Nachire,  
ime ase egetabu  
keringire, rora, nigo  
erikire 'goro yane.
- 8 Nyasae one, ningokirie  
gokora ogwancha kwao:  
amachiko ao nare  
as' enkoro yane ime.
- 9 Narandirie oboronge  
'se 'mosangererekano  
omonene ime; rora,  
Omonene, nomanyete,  
  
Tindatanga ebikoba
- 10 biane, gose timbiseti
- oboronge bwao aaria  
ime as' enkoro yane.
- Nararirie obwegenwa  
bwao; inche narandirie  
ogotooreka kwao 'se  
omosangererekano.
- Tindabisa obwanchani  
bwao n'ekeene kiao  
korwa ase omoganda  
omonene, aye Nyasae.
- 11 Totanga 'mabera ao  
korwa asende, Yehova;  
obwanchani n'ekeene  
biao bindende botambe.
- 12 Amabe nang'etanaine,  
tari kobareka; boigo  
ebibe biane ebinge  
biambwatereire kegima;
- Na igo tindi konyara  
korigereria igoro.  
Biabeire 'binge kobua  
chitukia chi'omotwe one.
- As' ayio enkoro yane
- 13 yantigire. Omonene,  
koranche ontoorie; Nyasae,  
ochiche bwango onkonye.
- 14 Baria bonsi bakorigia  
omoyo 'ne bayosarie,  
tiga abwo basookigwe  
na batantanigwe amo.
- Baria bonsi baganetie  
amabe asende, tiga  
abwo bairanigwe nyuma  
na barore obosooku.
- 15 Tiga batang'ang'e bosa  
ase obosooku bwabo  
abwo bagonsiereria na  
bagontebia: Aha, Aha.

- 16 Abagokorigia, aye  
Omonene, tiga bonsi  
bakogokere na tiga  
babe bakogochengera.  
  
Tiga 'banto bonsi abwo  
banchete ogotooreka  
kwao batebe botambe:  
Omonene aneneigwe.
- 17 Nigo inde omotaka  
na inde omoremerwa,  
korende Yehova, ere  
nigo akondengereria.  
  
Aye nogokonywa kwane,  
naye omotooria one.  
Ase igo, Omonene  
Nyasae one, totebana.
- 5 Nase ki gwetugutire  
inse, aye omoyo 'ne,  
na ime yane otari  
n'obotoereru bonde?  
  
Omoyo 'ne, osemerie  
Nyasae, naki nimotogie  
naende, naki obosio  
bwaye nogokonya kwane.
- 6 Nyasae one, omoyo 'ne  
nigo orutirwe inse  
ime yane; ase igo  
ninkoinyore, aye Nyasae.  
  
Ninkoinyore korwa ense  
ya Yorodani, na korwa  
ebitunwa bi'Erimoni  
n' egetunwa kia Misari.
- 7 Endiba y'amache nigo  
ekorangeria endiba  
ende, ase eriogi rie  
chintuboka chiao aye.  
  
Emerindo yao yonsi,  
ero yantubire inche;  
etoigo yao y'amache,  
ero yantubire inche.
- 8 Korende Yehova nigo  
arachike obwanchani  
bwaye na obuya bwaye  
ekero ere mobaso.

**Zaburi 42** 8.8.8. (L.M.)

Ase omoteri omonene, Masikili, ase  
basinto ba Kora.

- 1 Buna engabi eigwete  
'rang'o y'amache a rooche,  
omoyo 'ne nabo ore  
n'erang'o asore, Nyasae.
- 2 Omoyo 'ne nigo ore  
n'erang'o enene mono  
ase Nyasae, ase Nyasae  
ere oria ore moyo.
- 3 Amariga aane, aro  
abeire 'ndagera yane.  
  
Abeire bo mobaso na  
botuko; ekero 'banto  
bakomboria 'nche botambe:  
Ng'ai Nyasae oo are?
- 4 Ekero inche nkoinyora  
amang'ana a-etire,

- Botuko 'gotera kwaye  
nkobe na-inche; 'gosaba  
kwane nkore gochia ase  
Nyasae bw'obogima bwane.
- 9 Na inche ninkwane ase  
Nyasae ore egetare  
kiane egekong'u mono:  
Nase ki kwanyebire 'nche?
- Ekeru 'babisa baane  
bagonchanda na komiga  
botambe, nase ki inche  
nkogenderera korera?
- 10 Ekeru 'babisa baane  
bagonchecheria 'nche, nigo  
enga omoyio oyore  
ime y'amauga aane.
- Amaene, nigo enga  
omoyio ekero kera  
rituko bakomboria 'nche:  
Ng'ai Nyasae oo are?
- 11 Nase ki gwtugutire  
inse, aye omoyo 'ne,  
na ime yane otari  
n'obotoereru bonde?
- Osemerie Nyasae, naki  
naende inche nintogie  
Nyasae one na oyore  
obuya bw'obosio bwane.
- 2 Ekiagera naye ore  
Nyasae bwe chinguru chiane.  
Nase ki gwantugutire  
gochia aase are aare?
- Ekeru 'babisa baane  
bagonchanda na komiga  
botambe, nase ki inche  
nkogenderera korera?
- 3 Toma bosio oborabu  
bwao amo n'ekteene  
kiao, na tiga birobio  
bibe bikondaa botambe.
- Tiga birobio bindente  
ase egetunwa kiao  
egechenu, na bindente  
ase obomenyo bwao.
- 4 Erio inche ngende ase  
'gesasimero kia Nyasae,  
ase Nyasae oyio ore  
omogoko 'ne omonge.
- Ee, inche ningosasime,  
boigo inche ningotogie  
n'obokano; ningotogie,  
aye Nyasae, Nyasae one.
- 5 Nase ki gwtugutire  
inse, aye omoyo 'ne,  
na ime yane otari  
n'obotoereru bonde?
- Osemerie Nyasae, naki  
naende inche nintogie  
Nyasae one na oyore  
obuya bw'obosio bwane.

### **Zaburi 43**      8.8.8.8. (L.M.)

- 1 Aye Nyasae, inachere  
ekina, na rwanerera  
ekina kiane mamincha  
y'abatari aba Nyasae.
- Ntoorie korwa as' omonto  
ore omong'ainereria;  
ere nomonto otari  
omonyene oboronge.

### **Zaburi 44**      8.8.8.8. (L.M.)

Ase omoteri omonene, ase basinto ba  
Kora, Masikili.

- 1 Nigo twaigwete n'amato  
aito, aye Nyasae oito,

- emeremo gwakorete  
as' amatuko a kare.
- Boigo chisokoro chiaito  
nchiatotebetie igoro  
y'emeremo gwakorete  
ase amatuko abo.
- 2 Aye ogaseria 'banto  
b'ebisaku n'okoboko  
kwao okonene, erio  
ogachisimeka agwo.  
  
Ee, ogachanda abanto  
b'ebisaku n'okoboko  
kwao; na ogatuguta  
isiko abanto abwo.
- 3 Naki tichiairete ense  
n'emeyio yabo y'esegi,  
gose okoboko kwabo  
okwo tigwachitooretie.  
  
Ko okoboko kwao kwa  
borio, n'okoboko kwao,  
na oborabu bw'obosio  
bwao imbiachitooretie,  
'Kiagera ngwanchiancherete.
- 4 Aye Nyasae, aye naye  
omoruoti one; chika  
ogotooria 'se Yakobo.
- 5 Goetera 'sore intwe  
ntowome 'babisa baito;  
goetera 'rieta riao  
ntobatache gochia inse,  
  
Ee, goetera erieta  
riao intobatiringe  
abwo bakoimokerera  
igoro mamincha yaito.
- 6 Naki tingosemeria 'se  
obota bore obwane.  
Gose omoyio one o  
birende togontooria 'nche.
- 7 Ko ngwatotooretie korwa  
ase ababisa baito;  
naboigo nkwabasoogetie  
'banto abatogechete.
- 8 Nigo togwetogia ase  
Nyasae rituko rigima;  
Na ntogtie 'rieta riao  
goika kare na kare.
- 9 Ko ingwatotugutete  
aare, na ngwatososoogetie;  
na aye tori kogenda  
bosio n'abarwani baito.
- 10 Ngwatokorire gotama  
korwa ase omobisa;  
na abwo batogechete  
bagatosakora intwe.
- 11 Aye ngwatoruete buna  
ching'ondi as' endagera;  
na ngwatoserebanetie  
as' egati y'ebisaku.
- 12 Nigo okoonia abanto  
bao ase bosa; boigo  
tori komenta obonda  
bwao 'se rigori riabo.
- 13 Nigo ogotobeka 'se  
obosooku n'abaamate  
baito, na ogochecheria  
as' abatoetanaine;  
  
Boigo ogosekererwa.
- 14 Na gwatokorire koba  
omorabaaro aaria 'se  
'gati y'ebisaku bionsi;  
  
Na boigo gwatokorire  
ogosingisia omotwe  
ase egati y'abanto,  
ee, gwatokoreire aya.
- 15 Botambe 'gochwaya kwane  
nigo kore bosio bwane;

- na obosooku bw'obosio  
bwane bwantubire bori.
- 16 As' engencho y'omobisa  
n'omorusia egesiomba;  
na ase eriogi ri'oria  
ogosookia na korama.
- 17 Amang'ana aya onsi  
nigo achire igoro  
yaito na atonyorire,  
korende intorakweba.  
  
Ntorakora oborimo  
as' okobwatana kwao.
- 18 Chinkoro chiaito chirochio  
tichia-iranete nyuma.  
  
Gose amatambokero  
aito tachiete ensembo  
korwa as' enhera  
yao nonya ng'ake.
- 19 Nonya gwatosenyentire  
aase ye chinchoka chire  
chinene na gototuba  
n'ekiriri ki'amakweri.
- 20 Onye twebire 'rieta ria  
Nyasae oito, gose intwe  
twaramboire amaboko  
aito as' enyasae 'ngeni,
- 21 Inee, Nyasae takonyora  
aya? Naki ere nere  
omanyete obobisi  
bwonsi as' enkoro ime.
- 22 As' engencho yao nigo  
togoitwa 'mobaso boira;  
ee, intwe tobarwa buna  
ching'ondi as' okonyenywa.
- 23 Aye Omonene, boka,  
nase ki okorara? Ee,  
imoka, tototuguta  
goika kare na kare.
- 24 Aye Yehova, nase ki  
okobisa 'bosio bwao  
na kweba 'mechando yaito  
boigo okomigwa gwaito?
- 25 Naki emiyo yaito ne  
chinda nigo bigokumbwa  
na kobwatana gochia 'se  
riroba na as' orotu.
- 26 Imoka as' ogokonya  
gwaito, boigo otoboorie  
as' engencho y'amabera  
ao n'obwanchani bwao.

**Zaburi 45** 8.6.8.6. (C.M.)

Ase omoteri omonene buna Shoshanimu,  
ase basinto ba Kora, Masikili, Ogotera  
kw'obwanchani ao ao.

- 1 Ebinto ebiya mbire  
as' enkoro yane;  
ee, nigo egotuboka  
n'amang'ana 'maya.  
  
Nigo ngokwana igoro  
y'ebinto ebinge  
ebio inche nakorire  
'goro y'omoruoti.
- Oromeme rwane ndore  
n'obomanyi buna  
ekaramu y'omoriki  
omwango n'omuya.
- 2 Aye nomoseera ore  
kobua abana  
ba mwanyabanto, na nigo  
obwate obwari.  
  
Obuya bwabekirwe 'se  
ebikoba biao;  
eneema ya-umoirwe 'se  
ebikoba biao.

- Ase igo Nyasae oo  
ogosesenirie  
go-ika kare na kare  
kobua 'bamino.
- 3 Eboeranie omoyio  
oo o birende  
as' ebachwa yao, aye  
ore Omobui,
- Amo n'obonene bwao  
n'ogosikwa kwao.
- 4 Genda bosio n'obobui  
n'ogosikwa kwao.
- Riina na ogende ase  
'ngencho y'ekeene  
naboigo ney'oboitongo  
na ey'oboronge.
- Erio okoboko kwao  
gw'okorio gw'okobua  
ngokworokererie aye  
ebinto bi'obwoba.
- 5 'Megwe yao nemioge 'se  
'nkoro y'ababisa  
b'omoruoti; 'banto nigo  
bakogwa 'nse yao.
- 6 Nyasae, ekerogo kiao  
ki'obonene negia  
kare na kare, na nigo  
kereo botambe;  
  
Na enyimbo y'okogamba  
y'oboruoti bwao,  
aye Nyasae, nigo ere  
enyimbo endonge.
- 7 Omونene, imbwanchete  
oboronge; aye  
nogechete aria are  
ay'obosareku.  
  
Igo Nyasae, Nyasae oo,  
ogoakire aye
- amaguta y'omochengo  
kobua 'bamino.
- 8 Ne chiganchwa chiao chionsi  
nchibwate rimisu  
rigiya ria manemane  
na uudi na kasia,  
  
Echo chikorwa chinyomba  
chi'abaruoti, echo  
chiroiseirie amaino ye  
chinchogu chinene.
- 9 Abaiseke b'abaruoti  
nigo bare ase  
egati ya baria bao  
ba amasikani.  
  
As' okoboko kwao kwa  
borio, enting'ana  
neteneine n'etahabu  
ekorwa Ofiri.
- 10 Aye omoiseke, igwa  
na origererie,  
na tegereria ogoto  
kwao as' okoigwa.  
  
Aye omoiseke, eba  
abanto bao na  
abamino abwo bare  
ab'enka ya iso.
- 11 Erio nario omoruoti  
araganie mono  
oboseera bwao; nere  
Omonene oo;  
  
Mosasime, naki nere  
Omonene oo.
- 12 Na omoiseke o Turo  
nabeo n'ekeegwa;  
  
Abanda abare ase  
egati y'abantu  
mbarigie obosio bwao  
n'ogwancherwa kwao.

- 13 Omoiseke bw'omoruoti,  
ere nigo are  
n'obonene bwonsi ase  
chiero chi'omoruoti.  
  
Chianga chiaye chionsi nigo  
chirosirie buya  
n'etahabu echenire,  
echenire bori.
- 14 Narairwe as' omoruoti  
kabegete chianga  
chiaye chionsi chichanchire  
ne chiusi chingiya.  
  
Abekungi abwo bare  
'bagisangio baye  
bakomobwatia; barabwo  
mbarentwe asore.
- 15 Mbarentwe n'omogoko na  
boigo n'omochengo;  
mbasoe ase enyomba  
y'omoruoti obo.
- 16 Abana 'bamura bao  
mbabe ribaga rie  
chisokororia chiao ne  
chisokoro chiao.  
  
Aye nobakore babe  
'bana b'omoruoti;  
ee, basinto b'omoruoti  
ase Ense yonsi.
- 17 Ninkore erieta riao  
ri'obonene ribe  
rikoinyorwa botambe 'se  
ebiaare n'ebiaare.  
  
Ase igo 'banto bonsi  
mbagotogie aye  
go-ika kare na kare;  
mbakobake bori.
- Zaburi 46** 8.6.8.6. (C.M.)  
Ase omoteri omonene, ase basinto ba  
Kora, Ogotera buna Alamoti.
- 1 Yehova nobotamero  
ne chinguru chiaito;  
ere nomokonyi bori  
'kero ki'emechando.
- 2 Ense neisa goonchorwa na  
'bitunwa birutwe  
ase egati y'enyantha,  
titokoiroka 'ntwe.
- 3 Na intwe titokoiroka,  
ee, nonya namache  
amange akoruma na  
goturubanigwa,  
  
Boigo nonya nebitunwa  
bigotengechigwa  
ase okoimokerera  
igoro kw'amache.
- 4 Orooce ndore aroro  
ne chindooche chiaye  
inchiyogokie omochie  
bw'omonene Nyasae.  
  
'Mochie oria nobomenyo  
bore obochenu  
bw'Oyore Igoro Mono,  
oyio ore Nyasae.
- 5 Nyasae nigo are ase  
egati yaye, na  
tokonyegerigwa. Nyasae  
nayokonye bwango.
- 6 Ebisaku mbiakorete  
riroroche mono;  
amaruoti onsi nigo  
anyegeretigwe;  
  
Yehova nigo aagete  
eriogi riaye, na  
Ense ekanyititoka  
ase okoiroka.

- 7 Nyasae bw'Emeganda nare  
amo na-intwe, na  
Nyasae o Yakobo nere  
'botamero bwaito.
- 8 Inchuo morore 'meremo  
y'Omonene; rora  
'gosirigwa arentire  
ase Ense ime.
- 9 Go-ika ensinyo y'Ense  
nigo agotigia  
chisegi koba, na nigo  
akobun' amata;  
  
Boigo nigo akobuna  
amatimo; nigo  
agosamba chigari 'se  
omorero ime.
- 10 To-erera, momanye ng'a  
ninche Nyasae; nigo  
ndaimokererigwe 'goro  
ase ebisaku.  
  
Nigo ndaimokererigwe  
igoro kegima  
ime ase Ense yonsi;  
ee, nimbe igoro.
- 11 Nyasae bw'Emeganda nare  
amo na-intwe, na  
Nyasae o Yakobo nere  
'botamero bwaito.
- 3 Nakeiyie abanto babe  
inse yaito, na nabeke  
ebisaku bi'Ense bibe  
inse y'amagoro aito.
- 4 Ere naratochorere  
omwando oito oyore  
bw'obonene bwa Yakobo  
oyio anchete botambe.
- 5 Nyasae otiirire gochia  
'goro n'eriogi rinene;  
ee, Yehova otiirire  
n'eriogi ri'egetureri.
- 6 Tera ogotogia ase  
Nyasae, tera ogotogia;  
inwe tera ogotogia  
ase Omoruoti oito;
- 7 Inwe tera ogotogia,  
naki Nyasae nomoruoti  
bw'Ense yonsi; inwe tera  
ogotogia n'obomanyi.
- 8 Nyasae naikaransete 'se  
ekerogo ki'obonene  
bw'obochenu bwaye; Nyasae  
nomoruoti bw'ebisaku.
- 9 Na abanene b'abanto  
basangererekarekanire  
egere babe n'abanto  
ba Nyasae o Ibrahim,

**Zaburi 47** 8.8.8. (L.M.)  
Ase omoteri omonene, Zaburi ase basinto  
ba Kora.

- 1 Inwe 'banto bonsi, aka  
chinkobi, aka eriogi  
ase Yehova n'eriogi  
ri'ogotera kw'obobui.
- 2 Naki Nyasae o Igoro  
Mono noyobw'okoirokia;

ase Ense yonsi nere  
Omoruoti omonene.

- 3 Nakeiyie abanto babe  
inse yaito, na nabeke  
ebisaku bi'Ense bibe  
inse y'amagoro aito.
- 4 Ere naratochorere  
omwando oito oyore  
bw'obonene bwa Yakobo  
oyio anchete botambe.
- 5 Nyasae otiirire gochia  
'goro n'eriogi rinene;  
ee, Yehova otiirire  
n'eriogi ri'egetureri.

- 6 Tera ogotogia ase  
Nyasae, tera ogotogia;  
inwe tera ogotogia  
ase Omoruoti oito;
- 7 Inwe tera ogotogia,  
naki Nyasae nomoruoti  
bw'Ense yonsi; inwe tera  
ogotogia n'obomanyi.
- 8 Nyasae naikaransete 'se  
ekerogo ki'obonene  
bw'obochenu bwaye; Nyasae  
nomoruoti bw'ebisaku.
- 9 Na abanene b'abanto  
basangererekarekanire  
egere babe n'abanto  
ba Nyasae o Ibrahim,
- Naki chinguba chi'abanto  
b'Ense nchire echia Nyasae,  
na nigo aimokereirie  
igoro mono kegima.

**Zaburi 48**

8.8.8.8. (L.M.)

Ogotera na Zaburi ase basinto ba Kora.

- 1 Omونene nomonene,  
atogigwe mono ime  
y'omochie o Nyasae oito,  
'se 'getunwa ki'obochenu.
- 2 Egetunwa gia Sayoni  
nigo kere egeseera  
as' obotambe bwaye na  
okororekana kwaye.  
  
Nigo kere omogoko  
bw'Ense yonsi, 'se chinsemo  
chia sugusu, ee, nomochie  
bw'Omoruoti omonene.
- 3 Nyasae namanyekanete  
aaria ime ye chiburi  
chi'omochie oyio, ng'a ere  
nobotamero 'bokong'u.
- 4 Naki rora, abaruoti  
basangererekane,  
bagaeta agwo amo,  
ee, bagaeta aroro.
- 5 Barabwo bakayorora,  
na igo bagakumia na  
bakaondoka, barabwo  
bakarwao as' obwango.
- 6 Obwoba bokababwata  
aroro, na obororo,  
buna obw'omosubati  
oyokobina aibore.
- 7 Aye nigo okobuna  
chimeeri chia Tarisisi  
n'omwaga omonene na  
okogusa korwa moocha.
- 8 Buna twaigete, naboigo  
twarorire aaria ime  
as' omochie bw'Omone  
bw'Emeganda emenene.
- 9 Aye Nyasae, intwe nigo  
twarengereirie igoro  
y'obwanchani bwao, ase  
'gati ye Hekalu yao.
- 10 Aye Nyasae, koreng'ana  
n'erieta riao, naboigo  
ogotogia kwao kore  
gochia 'se chinsinyo chi'Ense.
- 11 Boigo okoboko kwao  
gw'okorio nigo goichire  
n'oboronge, aye Nyasae,  
goika kare na kare.
- 12 Moetanane Sayoni,  
boigo moyeonchokane;  
na bara omobaro bwe  
chindwaki chiaye chintambe.
- 13 Inwe rigereria buya  
chindwaki chiaye, na rora  
chiburi chiaye; egere  
motebie 'kegori kende.
- 14 Naki Nyasae oyo nere  
Nyasae oito botambe na  
ere nabe omoraai  
oito go-ika 'makweri.

**Zaburi 50**

8.8.8.8. (L.M.)

Zaburi y'Asafu.

- 1 Nyasae Omobui ore  
Omonene okwanire;

- orangeirie Ense korwa  
moocha na gochia bosongo.
- Ere orangeirie Ense  
korwa 'se ogosoka kwe  
risase gochia ensembo  
risase rikorimera.
- 2 Korwa 'se egetunwa gia  
Sayoni, oboikeranu  
bw'oboseera 'buya, Nyasae  
omorekire korwao.
- 3 Nyasae oito, ere nache,  
ere tagokira-kiri;  
na omorero okoria  
notang'aine bosio bwaye.  
  
Bori ekembugu-mbugu  
nkemoetanane ere  
kera ensembo, n'omwaga  
nomoetanane boigo.
- 4 Narangerie erioba na  
Ense korwa igoro ng'a  
chibe birori ekero  
aragambie 'banto baye.
- 5 Sangereria abachenu  
baane gocha 'sende, baria  
bakorire 'kobwatana  
na-inche as' ekeng'wanso.
- 6 Boigo igoro nchirarie  
oboronge bwaye, naki  
Nyasae omonyene nigo  
are Omonachi 'kina.
- 7 'Banto baane, Israeli,  
igwa na ninkwane. Nimbe  
kirori mamincha yao.  
Ninche Nyasae, Nyasae oo.
- 8 Tinkogotogonyera 'se  
ebing'wanso biao gose  
ebing'wanso bi'ogosambwa  
bire asende botambe.
- 9 Tinkoira eeri ekorwa  
ase obomenyo bwao  
gose chigoree korwa 'se  
chigoora chi'amaicho ao.
- 10 Naki kera eng'iti ye  
rinani neyane; chiombe  
chire ase ebigoro  
eribu nechiane boigo.
- 11 Ninchimanyete chinyoni  
chionsi chi'ebitunwa bionsi;  
n'ebitongwa ebio bire  
aase aarabu nebiane.
- 12 Onye narenge nenchara,  
tinarenge kogotelia,  
naki Ense na ebinto  
bionsi bireo nebiane.
- 13 Inee! Inche ne chinyama  
chie chieri inkoria? gose  
ninywe amanyinga ayio  
akorwa ase chigoree?
- 14 Ruera Nyasae ekeng'wanso  
ki'ogoaka ng'a mbuya mono,  
akana chiira chiao 'se  
Oyore Igoro Mono.
- 15 Na ndangerie 'se rituko  
ri'emechando; as' engaki  
eyio inche ningotoorie;  
na nong'e amasikani.
- 16 Nyasae nigo agoteba  
as' omokori amabe:  
Aye ning'o okoraria  
'machiko are ayane?  
  
Naende Yehova nigo  
agoteba: Aye ning'o  
ogwatora 'kobwatana  
kwane as' omonwa oo?
- 17 Naki nigo ogechete  
amorokererio aane,

- na gwatuguta 'mang'ana  
aane gochia nyuma yao.
- 18 Ekero 'korora 'monto  
omoibi, gwancherana  
nere; na nigo 'gokora  
ebibe n'abatomani.
- 19 Nigo okorua omonwa  
oo gochia 'se obobe;  
n'oromeme rwao nigo  
rokoroisia oborimo.
- 20 Nigo ogoikaransa na  
gokwana bobe 'yomino;  
na kwagamba-gamba bobe  
'mwana o mama omino.
- 21 Gwakorire 'binto ebi  
na-inche nkirete-kiri;  
na nigo okagete ng'a  
nigo inde buna aye.  
  
Ko ningotogonyere na  
kobeka ebinto ebio  
bionsi as' amaiso ao;  
tindi buna aye ore.
- 22 Renegereria aya, inwe  
'bamokweba Nyasae; onye  
taibo, nimbatandorane  
na motooria takobao.
- 23 Onde bwensi ogontogia  
nigo akong'a 'bonene;  
na ning'orokie asare  
ogotooreka kwa Nyasae.  
  
Ee, ning'orokie enchera  
y'ogotooreka kwa Nyasae  
ase oyokoroberia  
chinchera chiaye boronge.

- Zaburi 51** 8.6.8.6. (C.M.)  
Ase omoteri omonene, Zaburi ya Daudi,  
ekero Nathani omobani achete asare,  
nyuma gachiire ase Batiseba.
- 1 Aye Nyasae, ondorere  
inche amabera  
koreng'ana n'obwanchani  
bwao obonene.  
  
Ase engencho y'obonge  
bw'amabeebe ao  
ntinyie ogosaria kwane  
kore okonene.
- 2 Aye koranche onsibie  
kegima obobe  
bwane; na onchene korwa  
as' ebibe biane.
- 3 Ekiagera nimanyete  
ogosaria kwane;  
botambe ebibe biane  
mbire bosisio bwane.
- 4 Imamincha yao, aye  
bweka, nasaririe;  
na nakorire obobe  
as' amaiso ao.  
  
Igo nomoronge ore  
'kero ogokwana;  
nomochenu ore 'kero  
okonacha 'kina.
- 5 Rora, nigo naiboretwe  
inde n'obobe, na  
nigo narenge n'ebibe  
korwa 'nda ya mama.
- 6 Rigereria, aye nigo  
oganetie imbe  
n'oboene bwoka ase  
chinsemo chia ime;  
  
Na ase ensemo eria  
ebisekanete

- aye nonkore imanye  
obong'aini bwao.
- 7 Onchene 'nche na hisopo  
na inche nindabe;  
nsibie, nimbe omorabu  
kobua esinoo.
- 8 Nkore nyigwe omogoko  
n'omochengo; kora  
amauga kwabunire  
abe n'omogoko.
- 9 Bisa 'bosio bwao korwa  
as' ebibe biane;  
boigo aye obotinyie  
'bobe bwane bwonsi.
- 10 Aye Nyasae, ontongere  
enkoro endabu;  
okore omoika one  
oro obe 'moya.
- 11 Tonseria korwa 'se 'bosio  
bwao; toyorusia  
korwa asende Omoika  
oo Omochenu.
- 12 'Mogoko bw'ogotooreka  
kwao, ng'iranerie;  
onsiire n'Omoika oo  
ore obw'ogwancha.
- 13 Erio ninyorokererie  
'basaria chinchera  
chiao, na abanyabibe  
mbairane asore.
- 14 Aye Nyasae, ntoorie korwa  
ase amamocho  
y'ogoitera amanyinga;  
naye ogontooria.  
  
Erio, aye Omonene,  
oromeme rwane  
ndotere n'eriogi 'goro  
y'oboronge bwao.
- 15 Aye Yehova, oigore  
ebikoba biane,  
n'omonwa one norarie  
'gotogigwa kwao.
- 16 Ekiagera toganeti  
ekeng'wanso, ninsa  
gokoruera; togokiri  
nekie ki'ogosambwa.
- 17 Ebing'wanso bi'Omonene  
nigo bire 'nkoro  
yabunekire n'omoika  
'bunekire boigo.  
  
Aye Nyasae, togochaya  
gose koyeanga  
enkoro yabunekire  
na yasenyentirwe.
- 18 Korera Sayoni 'maya  
as' okogokigwa  
kwao; agacha chindwaki  
chia Yerusalem.
- 19 Ebing'wanso bi'oboronge  
erio mbikogokie;  
n'okorugwa kw'ogosambwa  
ngokogokie aye.  
  
Erio mbarwe chieri ase  
egesasimero  
kiao; mbarwe okorugwa  
kw'ogosambwa boigo.

**Zaburi 54** 8.8.8.8. (L.M.)  
 Ase omoteri omonene buna Neginoti,  
 Masikili, Zaburi ya Daudi, ekero Abasifu  
 bachete na gotebia Saulo: Inee, Daudi  
 tebisa naintwe?

- 1 Aye Nyasae, ntoorie ase  
engencho y'erieta riao,  
na nachere ekina 'se  
engencho y'okobua kwao.

- |  |  |
|--|--|
| <p>2 Aye Omonene Nyasae,<br/>igwa ogosaba kwane;<br/>tegerera amang'ana<br/>ngokwana n'omonwa one.</p> <p>3 Naki imamincha yane<br/>abageni baimokire,<br/>boigo abatesi nigo<br/>bakorigia omoy' one.</p> <p>Barabwo tibarabeka<br/>Omonene Nyasae abe<br/>bosio bwabo, ee, tibari<br/>komobeka bosio bwabo.</p> <p>4 Rigereria, Nyasae nigo<br/>are omokonyi one.<br/>Yehova nare nabaria<br/>bagosiira omoyo 'ne.</p> <p>5 Nairanerie ababisa<br/>baane obobe. Basirie<br/>kegima barue aroro<br/>ase ekeene kiao.</p> <p>6 Yehova, nindue asore<br/>ekeng'wanso as' ogwancha;<br/>nintogie erieta riao,<br/>ekiagera nere buya.</p> <p>7 Naki ontooririe korwa<br/>as' emechando yonsi na<br/>'maiso aane arorire<br/>'babisa baane bakogwa.</p> | <p>Ee, inse y'ekiriri gie<br/>chimbaba chiao nintame<br/>nyebise goika 'mabe<br/>aya onsi a-etire.</p> <p>2 Inche nindangerie Nyasae<br/>Oyore Igoro Mono,<br/>ee, nindere Nyasae oyio<br/>okong'ikeraneria pi.</p> <p>3 Natome korwa Igoro<br/>na nantoorie; narentere<br/>obosooku obonene<br/>as' oyoramere inche.</p> <p>Nyasae ere nayatome<br/>bosio amabera aye<br/>naboigo ere natome<br/>bosio ekeene kiaye.</p> <p>4 Omoy' one nore gati<br/>y'abana ba mwanyabanto<br/>bare buna chindo; ndaire<br/>n'abagoutoka 'morero.</p> <p>Ee, amaino abo nare<br/>amatimo ne chinsara;<br/>naboigo chimeme chiabo<br/>nchire emeyio emioge.</p> <p>5 Aye Nyasae, goetania<br/>igoro eimokererie;<br/>beka obonene bwao<br/>igoro as' Ense yonsi.</p> <p>6 Bantegeire oboreba<br/>ase amatambokero<br/>aane; bori omoy' one<br/>okumbirwe gochia inse.</p> <p>Na baremir engoro<br/>bosio bwane; ko barabwo<br/>abanyene bagure 'se<br/>egati y'engoro eyio.</p> <p>7 Aye Nyasae, 'nkoro yane<br/>nigo ekong'irie; 'nkoro</p> |
|--|--|

**Zaburi 57**

8.8.8. (L.M.)

Ase omoteri omonene, Alitasigit,  
Mikitamu ya Daudi, ekero atamete korwa  
ase Saulo *na gosoaa* rikuruma ime.

- 1 Indorere amabera,  
aye Nyasae, indorere  
amabera; naki 'moyo  
one nogosemeretie.

- yane nigo ekong'irie;  
na nintere na gotogia.
- 8 Boka, obonene bwane;  
boka, ekerigisa na  
obokano; nimboke 'se  
engaki bogokia moka.
- 9 Omonene, ningotogie  
as' egati y'abanto, na  
ningoterere 'gotogia  
as' egati y'ebisaku;
- 10 Naki amabera ao  
nare amanene gochia  
igoro, na ekeene  
kiao nkeigete amare.
- 11 Aye Nyasae, goetania  
igoro eimokererie;  
beka obonene bwao  
igoro as' Ense yonsi.
- Bori nigo bakogenda  
ensemo nonya nkorwa 'se  
'ngaki y'okoiborwa kwabo  
na gokwana oborimo.
- 4 Obosongo bwabo nigo  
bonga obw'eng'iti; nigo  
banga rirubi ritino  
rigoticha 'mato aye.
- 5 Erinde tiriigwa 'riogi  
ri'abatugi be ching'iti  
ekero bagotumeka  
obong'aini mono mono.
- 6 Aye Nyasae, buna 'maino  
abo as' emenwa yabo;  
buna 'magegu ye chindo  
chinsae, aye Yehova.
- 7 Ee, tiga banyititoke  
buna amache amange  
ayio akominyoka, ee,  
akominyoka agenda.
- Zaburi 58** 8.8.8.8. (L.M.)  
Ase omoteri omonene, Alitasigit,  
Mikitamu ya Daudi.
- 1 Inwe omoganda, bori  
ngokwana more boronge?  
Abana ba mwanyabanto,  
nkogamba more boronge?
- 2 Yaya. Ime ye chinkoro  
chiaino nigo mogokora  
ayare y'obosareku;  
nigo mogokora bobe.  
  
Nainwe nigo mokorua  
obotindi bw'amaboko  
aino ase Ense; bori  
nigo mokorua 'botindi.
- 3 Korwa ase okoiborwa  
nonya nkorwa ase enda,  
abanto abasareku  
nigo barusananiarie.
- Na tiga chinsara chiaye  
chibe buna ebing'ese  
biabutoirwe 'kerere  
agokumba 'bota bwaye.
- 8 Na buna rikorominyo  
erio rikonyititoka  
tiga barabwo baete  
ee, kera oyomo obo.  
  
Na tibabaisa korora  
risase, buna 'borito  
bw'omokungu bokogwa na  
botaraika 'ngaki yaye.
- 9 Yehova, as' endamwamu  
yaye eyio ere moyo,  
narusie abasareku  
buna ekerambauti.  
  
Ere nakore bo bwango,  
ee, nyuma chinyongo chiaino

- chitaraigwa riberera  
ri'amagwa ayio akoiyia.
- 10 Omonyaboronge ere  
nagoke mono ekero  
akorora egesiomba  
gekorugwa as' ababe.  
  
Na nasibie amagoro  
aye ase amanyinga  
y'omonto omosareku,  
ee, ere nakore aya.
- 11 Erio omonto natebe:  
Amaene 'ng'eria nere  
ase omonyaboronge;  
nanyore eng'eria yaye.  
  
Amaene Nyasae nigo  
areo as' Ense ime  
as' okonacha ebina  
as' enchera y'oboronge.
- 4 Aye kwaеire abanto  
bakoirogete 'bendera,  
erinde eorokigwe  
as' engencho y'ekeene.
- 5 Tooria n'okoboko kwao  
gw'okorio, naboigo nyigwe,  
erinde abanto bare  
'banchwa bao batoorigwe.
- 6 Nyasae okwanire ase  
obochenu bwaye: Inche  
ningoke, inche ninchenge;  
ninyatanane Sekemu;  
  
Obotambe bw'omwenya o  
Sukoti inche nindenge.
- 7 Gile-adi neyane na  
Manase nero neyane;  
  
Na Efraimu ne chinguru  
chi'omotwe one; na Yuda  
nere omorua 'machiko  
aane as' engencho yane.
- 8 Na Moabu negetaabo  
kiane; na inche nindute  
egekoroto kiane 'nche  
igoro ase Edomu;  
  
Goetera ase ense  
ya Filisti ningende na  
inche ning'ake eriogi  
ri'obobui obonene.
- 9 Ning'o orandete ase  
omochie okong'irie? Na  
ning'o orandaae gochia  
ase ense ya Edomu?
- 10 Inee, tari aye Nyasae  
oyio orandaae? Nonya  
konya gwatotugutire  
as' engaki yaetire.  
  
Inee, tari aye Nyasae  
oyio orandaae? Nonya

**Zaburi 60**

8.8.8. (L.M.)

Ase omoteri omonene buna Shushani-Eduti, Mikitamu ya Daudi, ase okworokereria, ekero arwanete n'Aramu-Naharimu na Aramu-Soba, ekero Yoabu airanete na agaita Abaedomu chiribu ikomi na ibere ase omwenya bw'omonyo.

- 1 Aye Nyasae, nogechirie,  
gwatoserebanirie na  
gwatotugutire intwe;  
irana gocha 'setore.
- 2 Kwayetengechirie Ense  
naboigo kwayebunire;  
gwenia 'matandoku aye  
naki ngotengecha ere.
- 3 Kwaorokirie abanto  
bao obokong'u mono,  
na edivai y'okoiguswa  
gwatokorire twanyure.

- konya aye toragenda  
bosio bw'abbarwani baito.
- 11 Aye tokonye korwa 'se  
emechando, ekiagera  
'gokonywa kwa mwanyabanto  
nigo kore bosa bosa.
- 12 Ntokore as' obobui  
goetera Nyasae, naki  
nere oratiringere  
inse ababisa baito.
- Zaburi 61 (1)** 8.6.8.6. (C.M.)  
Ase omoteri omonene buna Negina,  
*Zaburi ya Daudi.*
- 1 Igwa ekerero kiane,  
aye Omونene  
Nyasae, boigo tegerera  
ogosaba kwane.
- 2 Korwa 'se ensinyo y'Ense  
nigo ngokorera,  
ekero enkoro yane  
yarusirie moyo,
- Ndente ase egetare  
kere egetambe
- 3 Kombu-a. Naki asende  
nore 'botamero,  
Na orwaki orokong'u  
korwa 'se 'mobisa.
- 4 Botambe nimenye ase  
obomenyo bwao.  
Boigo inche ninsemerie  
inse y'ekiriri  
gie chimbaba chiao echio  
nchire obwebiso.
- 5 Aye Yehova, kwaigure  
chiira chiane echio  
narire as' ogotiana;  
aye gwachiigure.
- Boigo kwang'eire omwando  
bw'abwo bairogete  
erieta riao richenu;  
aye kwayong'eire.
- 6 Notambeyie obogima  
bw'omoruoti oo  
na emiaka yaye buna  
ebiaare ebinge.
- 7 Namenyе bosio bwa Nyasae  
botambe. Chikera  
amabera n'ekeene  
bimorende ere.
- 8 Igo nintere 'gotogia  
as' erieta riao  
goika kare na kare.  
Nintere asore.
- Rituko ase rituko  
inche ng'ikeranie  
chiira chiane echio chionsi,  
ee, ninchiikeranie.
- Zaburi 61 (2)** 8.6.8.8.6. (C.M.R.)  
Ase omoteri omonene buna Negina,  
*Zaburi ya Daudi.*
- 1 Omونene Nyasae, igwa  
ekerero kiane;  
tegerera ogosaba  
kwane na ogosorora  
okwo nkogosaba.
- 2 Nigo ndarere asore  
korwa aare mono  
y'ensinyo y'Ense, ekero  
enkoro yane entaka  
yarusirie moyo.
- Aye ondaae gochia 'se  
egetare keria  
kere 'getambe kombua,
- 3 ekiagera 'sende nigo  
ore 'botamero.

- Aye norwaki 'rotambe  
rwe chinguru korwa  
ase omobisa one.
- 4 Botambe nimenye ase  
obomenyo bwao;  
  
Go-ika kare na kare  
nimenye aroro;  
ee, obotamero bwane  
mbobe inse y'ekiriri  
gie chimbaba chiao.
- 5 Ekiagera, aye Nyasae,  
aye gwachiigure  
chiira chiane; na omwando  
bw'abairogete erieta  
riao kwayong'eire.
- 6 Notambeyie obogima  
bw'omoruoti; boigo  
notambeyie amatuko  
na emiaka yaye buna  
ebiaare ebinge.
- 7 Namenye kare na kare  
bosio bwa Yehova;  
aye Nyasae, arigania  
amabera n'ekeene  
bimorende ere.
- 8 Igo nintere 'gotogia  
as' erieta riao  
botambe; rituko ase  
rituko ning'ikeranie  
chiira chiane chionsi.
- Naboigo chinyama chiane  
nchikoganetie as' ense  
y'eguru-gura enyomo  
etari n'amache ande;
- 2 Egere ndore okobua  
kwao n'obonene bwao,  
buna nakoroche ase  
Obomenyo Obochenu.
- 3 Bori ebikoba biane  
mbigotogie, ekiagera  
'bwanchani bwao nobuya  
goetania obogima.
- 4 Igo ningotogie 'kero  
inde moyo; as' erieta  
riao ninyimokererie  
'maboko aane igoro.
- 5 Omoyo 'ne noisaneke  
buna ekero omonto  
aisanekire karire  
emeseto n'obonoru,  
  
Naboigo omonwa one  
nobe okogotogia, ee,  
ebikoba biane mbibe  
n'omogoko, mbigotogie,
- 6 Ekeri ingokoinyora  
inde borere bwane na  
gokorengereria ase  
oborendi bwa botuko.
- 7 Ningoke as' ekiriri  
gie chimbaba chiao, naki  
korwa kare aye nigo  
ore ogokonywa kwane.
- 8 Na omoyo one nigo  
ogokobwatia bokong'u,  
na okoboko kwao kwa  
borio nigo kogonsira.
- 9 Korende abakorigia  
omoyo one egere

**Zaburi 63      8.8.8.8. (L.M.)**

Zaburi ya Daudi, ekero arenge ase erooro  
ya Yuda.

- 1 Aye Nyasae, aye naye  
Nyasae one; ninkorigie  
n'omokia, omoyo one  
nore n'erang'o asore,

- bayosarie, imbagende  
gochia inse mono y'ense.
- 10 Barabwo mbaitwe n'omoyio,  
mbabe 'getari ki'ebibwe.
- 11 Ko omoruoti nagoke  
ase Omonene Nyasae;  
  
Na kera oyogotiana  
asare ere netogie,  
korende 'menwa y'abare  
abarimo nekirigwe.
- Zaburi 65** 8.8.8. (L.M.)  
Ase omoteri omonene, Zaburi na Ogotera  
gwa Daudi.
- 1 Aye Nyasae, ogotogia  
ingokoganyerete  
Sayoni, naboiigo eira  
neikeranigwe asore.
- 2 Aye naye oyokoigwa  
ogosaba; ase igo  
asore nao chinyama  
chionsi chirabe chigocha.
- 3 Nimanyete ng'a ebibe  
biabeire bikombua 'nche,  
korende aye norusie  
ogosaria gwaito gwonsi.
- 4 Nasesenirie omonto  
gwachorire; kwarentire  
asore, erio amenye  
ime ye chigoora chiao.  
  
Intoisaneke botambe  
n'obuya bw'enyomba yao,  
obwo bore as' Hekalu  
yao eyere enchenu.
- 5 Yehova bw'ogotooreka  
gwaito, ase oboronge  
aye notoiranerie 'se  
ogokora gw'okirokia.
- Aye nogosemeria gwe  
chinsinyo chionsi chi' Ense, na  
boigo okwa baria bare  
'se chinyancha chi'aare mono.
- 6 Ere nigo agokong'ia  
ebitunwa as' okobia  
kwaye; nigo eboetie  
chinguru chire chinene.
- 7 Nigo agotoereria  
eriogi rie chinyancha na  
'riogi ri'emerindo yabo,  
ne riroroche ri'abanto.
- 8 Boigo, baria bamenyete  
'se chinsinyo chi'Ense, nigo  
bairogete as' engencho  
y'ebimanyererio biao.  
  
Aye nigo ogokora  
ogokia kwa mambia boigo  
okoira kwa mogoroba  
biba n'omochengo mono.
- 9 Nigo 'gotaarerera Ense  
na kwayebekera 'mache,  
naboiigo kwayetenenka  
mono n'oroche rwa Nyasae.  
  
Orooche orwo rwa Nyasae  
ndoichire n'amache ase  
okoa 'banto engano,  
buna aye gwachigete.
- 10 Aye nigo okonyiyia  
chindwaro n'amache 'mange;  
aye nigo ogokong'ia  
emetaro y'emegondo.  
  
Na nigo okwororobia  
riroba erio n'embura;  
na nigo ogosesenia  
ebigokina aroro.
- 11 Na kwabekeire omwaka  
egutwa y'obuya bwao;

- n'oboeto bwao nigo  
bogotonyia obonoru;
- 12 Nigo bogotonya ase  
amarisio y'erooro, na  
boigo ebigoro nigo  
bieboetie omogoko.
- 13 Amarisio onsi nigo  
atubire n'amaicho ye  
ching'ondi; n'emienya nigo  
etubire n'ebitura.  
  
Na igo birobio nigo  
bigoaka mono eriogi  
ri'omogoko; boigo nigo  
bigotera n'omochengo.
- Zaburi 66** 8.8.8.8. (L.M.)  
Ase omoteri omonene, Ogotera gose  
Zaburi.
- 1 Inwe mwensi abamore  
abanto be chinse chionsi,  
aka 'riogi ri'omogoko  
neri'omochengo 'se Nyasae.
- 2 Inwe tera ogosikwa  
kw'erieta rire eriaye;  
inwe karue obonene  
ase ogotogia kwaye.
- 3 Inwe kwana ase Nyasae:  
Naki ogokora kwao  
kore ogw'okwoboyia! ee,  
korokwo nokw'ogokumia.  
  
Goetera obonene  
bw'okobua kwao 'konene,  
ababisa bao mbabe  
bagwekeyia gocha 'sore.
- 4 Ense yonsi, ero nebe  
ekogosasima, boigo  
negoterere; barabwo  
mbatere erieta riao.
- 5 Inwe inchuo na morore  
emeremo y'Omonene;  
nere oyo bw'okwoboyia  
ase ogokora kwaye.  
  
Ere nobw'okwoboyia 'se  
abana ba mwanyabanto.
- 6 Aga-onchora enyancha  
ekaba ense enyomo.  
  
Na barabwo bakaamboka  
ase etoigo y'amache  
n'amagoro; na aroro  
intwagogete asare.
- 7 Nigo akogamba ase  
okobua kwaye botambe,  
na amaiso aye nigo  
akorora ebisaku.  
  
Igo tobaisa gotiga  
abanto abasareku  
bare mamincha ya Nyasae  
beimokererie igoro.
- 8 Inwe mwanyabanto mwensi,  
mosesenie Nyasae oito;  
na eriogi ri'ogotogia  
kwaye, tiga riigwekane.
- 9 Noyobwatete emiyo  
yaito as' obogima, na  
tagotiga amagoro  
aito aro asukigwe.
- 10 Ekiagera aye Nyasae  
nigo gwatorengire 'ntwe,  
na nigo gvatoteemire  
buna 'feta egoteemwa.
- 11 Ngwatorentete 'keonga  
ime; na ase chibachwa  
chiaito aye nkwapabegete  
emechando emerito.
- 12 Aye nigo kwagerire  
abanto bariinire na

gototacha-tacha ase  
emetwe yaito igoro.

Intwe togaeta ase  
omorerero nase 'mache,  
korende agatobeka  
aase are atenenku.

13 Ningende ase enyomba  
yao ime n'ebing'wanso  
bi'ogosambwa; boigo inche  
ningoakane chiira chiane,

14 Echo ebikoba biane  
biakwanete, na omonwa  
one okwanete 'kero  
narenge as' emechando.

15 Inche nindue gocha 'sore  
ebing'wanso bi'ogosambwa  
bie ching'iti chiakorirwe  
chinoru, inche nimbirue.

Ninkoruere ebing'wanso  
bire ne rimisu rire  
rigiya rie chimingichi.  
Nindue chieri ne chimbori.

16 Inchuo! Moigwe! Inwe mwensi  
abamoirogete Nyasae,  
na erio ninkwane eki  
akoreire omoyo 'ne.

17 Inche nigo narerete  
asare n'omonwa one,  
na akaimokererigwa  
'goro n'oromeme rwane.

18 Onye inche ingwanchera  
obobe ase enkoro  
yane ime, Omonene  
takonyigwa nonya ng'ake.

19 Ekeene Omonene  
Nyasae ontegereire; ee,  
ere oigure eriogi  
riria ri'ogosaba kwane.

20 Nyasae atogigwe, oyo  
otangeti ogosaba  
kwane gose tarusetie  
'mabera aye asende.

### Zaburi 67 6.6.8.6. (S.M.)

Ase omoteri omonene buna Neginoti.  
Zaburi gose Ogotera.

1 Tiga Nyasae oito  
atororere 'ntwe  
amabera; tiga Nyasae  
atosesenie 'ntwe;

Akore obosio  
bw'obwanchani bwaye  
botorabere, na erio  
intoseseneke;

2 Erio 'nchera yao  
n'oboeto bwao  
mbinyare komanyekana  
ase Ense yonsi,

Na ogotooreka  
kwao okonene  
inkomanyekane gati  
y'ebisaku bionsi.

3 Aye Nyasae, tiga  
'banto bagotogie;  
ee, abanto bonsi tiga  
bagotogie mono.

4 Tiga ebisaku  
bigoke na tiga  
bitere as' omochengo  
ase Omonene,

Naki nonachere  
'banto ekina 'se  
boronge na noraae  
ebisaku bi'Ense.

5 Aye Nyasae, tiga  
'banto bagotogie;

- |   |  |
|---|--|
| <p>ee, abanto bonsi tiga<br/>bagotogie mono.</p> <p>6 Erio Ense 'yame<br/>okwama, na Nyasae,<br/>Nyasae oito omonyene,<br/>natosesenie 'ntwe.</p> <p>7 Nyasae omonyene<br/>natosesenie 'ntwe<br/>ne chinsinyo chionsi chi'Ense<br/>nchimoiroke ere.</p> | <p>Moimokererie igoro<br/>oria oriinete<br/>igoro y'amare ase<br/>erjeta riaye Yah.</p> <p>5 Nyasae nigo are ise<br/>bwe chintakana na<br/>omorendi obo ase<br/>obomenyo bwaye.</p> <p>Aaria aase obomenyo<br/>bwaye obochenu<br/>nare omonachi 'bina<br/>as' ababoraka.</p> <p>6 Omونene Nyasae nigo<br/>akobeka baria<br/>batigirwe bosa bosa<br/>'se chinka chi'obomo.</p> <p>Abanto abasibire<br/>n'ebinyuri, ere<br/>nigo akobasokia na<br/>akobasibora.</p> <p>Korende abaenenu<br/>abare mamincha<br/>nigo bakomenya agwo<br/>as' ense enyomo.</p> <p>7 Ekeri gwachiete ase<br/>erooro, ekeri<br/>gwachiete bosio bw'abanto<br/>bao, aye Nyasae,</p> <p>8 Ense ekanyegera na<br/>igoro egatwa<br/>embura enyinge ase<br/>obosio bwa Nyasae;</p> <p>Sina-i enyene nigo<br/>yaigusetwe ase<br/>obosio bwa Nyasae, Nyasae<br/>bw'Abaisraeli.</p> <p>9 Aye Omونene Nyasae,<br/>nigo gwatomete</p> |
|---|--|
- Zaburi 68** 8.6.8.6. (C.M.)  
Ase omoteri omonene, Zaburi gose  
Ogotera gwa Daudi.
- 1 Tiga Omونene Nyasae  
aimoke igoro,  
igo tiga ababisa  
baye basiarerwe.  
  
Na tiga abanto bonsi  
abamogechete  
batame kegima korwa  
as' obosio bwaye.
- 2 Baserie buna erioki  
rikoirwa aare, na  
tiga barabwo basire  
buna obochoe,  
  
Obwo bokonyititoka  
bosio bw'omorero;  
abasareku basire  
bo bosio bwa Nyasae.
- 3 Ko tiga 'banyaboronge  
bachenge na tiga  
bagoke bosio bwa Nyasae,  
ee, bagoke mono.
- 4 Inwe tera ase Nyasae,  
tera ogotogia  
as' erjeta riaye; inwe  
goka bosio bwaye.

- embura enyinge mono,  
ee, nkwayetomete.
- As' embura eyio, aye  
inkwayokong'etie  
omwando oo ekero  
konya orosire.
- 10 Omosangererekano  
oo ogakora  
'bomenyo bwaye bokaba  
ime aase ayio.
- Omonene Nyasae, ase  
engencho y'obuya  
bwao, kwaeire 'bataka  
aya baremeire.
- 11 Nyasae akarua ring'ana.  
Omobanda oria  
oriraretie ring'ana  
nomonene ore.
- 12 Abaruoti b'abarwani  
esegi, barabwo  
bagatama bwango mono,  
bakarwa aroro.
- Erio omokungu oria  
otigarete nka  
akagabana enibo  
na ebisakorwa.
- 13 Nonya inwe mwetoorete  
gati ye chinyongo,  
imobe buna chimbaba  
chi'enyon'i riruma;
- Chitubire n'efeta na  
amarionya aye  
natubire n'etahabu  
ekomeka-meka.
- 14 As' engaki Omonene  
Omobui ere  
asebereranetieo  
abaruoti abwo,
- Ee, ekero akorete  
aya, aya nigo  
arenge buna esinoo  
aaria Salimoni.
- 15 Egetunwa kia Yehova  
nigo kere buna  
egetunwa kia Basani  
ekio negetambe.
- Nigo kere egetunwa  
egetambe mono  
kenga buna egetunwa  
keria kia Basani.
- 16 Inwe ebitunwa ebio  
bire ebitambe,  
nase ki ere ng'a more  
ne ribero igo?
- Eke nakio egetunwa  
Yehova anchete  
komenya; kare na kare  
Nyasae namenyeo.
- 17 Chigari chia Nyasae nchire  
chiribu chinyinge;  
chirochio nchire chiribu  
'merongo ebere;
- Omonene nigo are  
gati yabo, buna  
are ime y'aase Sinai,  
ee, aase aachenu.
- 18 Ogatiira gochia 'goro,  
ogoosa 'bosibwa,  
na okanyora ebiegwa  
ase mwanyabanto,
- Ee, as' abare mamincha,  
ing'a Omonene  
Nyasae namenye aroro  
as' egati yabo.
- 19 Omonene atogigwe,  
oyio rituko 'se

- rituko ogototweka  
ebitoki biaye.
- Na tiga asesenigwe  
Omonene Nyasae  
bw'ogotooreka gwaito, ee,  
tiga atogigwe.
- 20 Nyasae oito nere Nyasae  
bw'ogotooreka; na  
nigo agotooria korwa  
ase amakweri;  
  
Ee, ogotama korwa 'se  
amakweri nigo  
gokorwa as' Omonene  
Nyasae omonyene.
- 21 Amaene Omonene  
Nyasae nasenyente  
emetwe y'abanto bare  
ababisa baye.  
  
Nasenyente ekeore  
kebwate etukia  
ki'oyokogenderera 'se  
ogosaria kwaye.
- 22 Omonene agateba:  
Ning'iranie korwa  
Basani abanto baane,  
inche nimbairanie;  
  
Omonene agateba:  
Inche ning'iranie  
abanto baane korwa 'se  
chindiba chi'enyancha.
- 23 Erio okogoro kwao  
gotobekwe ime  
y'amanyinga 'mabariri  
y'ababisa bao;  
  
Erio boigo oromeme  
rwe chisese chiao  
nchitobekwe ime ase  
amanyinga abo.
- 24 Aye Nyasae, barorire  
okogenda kwao  
aaria ime y'aase are  
aachenu kegima.  
  
Ee, nonya nokogenda kwa  
Nyasae one ore  
omoruoti one, ase  
obomenyo bwaye.
- 25 Abateri mbagendete  
bosio; nyuma yabo  
mbarenge abakobugia  
amakano abo;  
  
Naboigo as' egati ya  
barabwo 'bekungi  
barenguo, bakobugia  
chinchigiri chiabo.
- 26 Inwe more ab'ensoko  
y'Abaisraeli,  
as' emeganda sesenia  
Omonene Nyasae.
- 27 Nareo Benjamin 'moke  
n'omogambi obo;  
abanene ba Yuda na  
omoganda obo;  
  
Na abanto abanene  
b'Abasabuloni,  
na abanto abanene  
b'Abanafutali.
- 28 Nyasae oo 'gochikeire  
chinguru chiao; ee,  
aye Nyasae, kong'ia ayio  
kwayatokoreire.
- 29 Ime ye Hekalu yao  
'se Yerusalem,  
abaruoti mbabirente  
ebiegwa asore.
- 30 Chitogonyere ching'iti  
chi'ebitonto, amo

ne chimori chi'ebisaku  
ne riicho rie chieri;

Goika kera oyomo  
ekeyie kabwate  
chisekeli chie chifeta;  
agochirentere.

Aye Omonene Nyasae,  
serebania abwo  
bare n'okwegokia ase  
egetii gi'esegi.

31 Abanene mbarwe korwa  
Misiri; Etiopia  
neramborere Yehova  
amaboko aye.

32 Tera ase Nyasae, inwe  
amaruoti y'Ense;  
inwe tera ogotogia  
ase Omonene.

33 Ase oyoriinete na  
kogenda igoro  
ya igoro chiarenguo  
korwa agwo kare,  
  
Rora, nigo agotoma  
bosio 'riogi riaye,  
ee, eriogi ri'obobui  
bwaye obonene.

34 Raria chinguru chia Nyasae;  
bonene bwaye  
nigo bore igoro ya  
Israeli yaye.

Ne chinguru chiaye nigo  
chire as' amare.

35 Aye Nyasae, nigo ore  
bw'okogosa mono.

Na naye obw'okoirokia  
korwa aase ao  
aachenu. Naye Nyasae o  
Israeli yao.

Ere nigo are oria  
okorua chinguru  
na okobua as' abanto.  
Nyasae atogigwe.

### Zaburi 69 8.8.8.8. (L.M.)

Ase omoteri omonene buna Shoshanimu,  
Zaburi ya Daudi.

- 1 Aye Omonene Nyasae,  
ntoorie inche, ekiagera  
amache aro asoire  
as' omoyo one ime.
- 2 Inche nkrimera inde  
as' etintira endito,  
ime agwo aase aria  
ogotenena gotaiyo.  
  
Nasoire ase chindiba  
chi'amache amange, agwo  
ase etoigo y'amache  
egontuba 'nche kegima.
- 3 Inche nabeire nkorosa  
ase okorera kwane,  
na emiyo yane nigo  
yabeire ekwoma mono.  
  
Naende amaiso aane  
abeire orotutu na  
a-eire ekero 'nche  
inganyete Nyasae one.
- 4 Baria bangechete bosa  
engencho etaiyo nigo  
bare abange kobua  
chitukia chi'omotwe one.  
  
Abaganetie gonsiria,  
abwo bare ababisa  
baane engencho etaiyo,  
nigo bare ne chinguru.
- 5 Erio inkairania ebi  
intairete. Aye Nyasae,

- nomanyete oboriri  
bwane na ebibe biane;
- Oboriri bwane boigo  
ebibe biane birobio  
tibiri kobisekana  
korwa asore, Yehova.
- 6 Abamoganyete Nyasae,  
Omonene bw'Emeganda,  
tobatiga basookigwe  
as' engencho yane inche.  
  
Abagokorigia, aye  
Nyasae bw'Abaisraeli,  
tobatiga basookigwe  
as' engencho yane inche.
- 7 Naki as' engencho yao  
nanyorire emerumi;  
obosooku bwatubire  
obosio bwane kejima.
- 8 Na nabeire omogeni  
ase abanto baminto,  
na nabeire omoeti  
ase abana ba mama.
- 9 Risemi ri'enyomba yao  
riandire, na emerumi  
ya baria bakoramete  
yagure igoro yane.
- 10 Ekeru narerete na  
korosia omoyo one  
n'okweng'ata, ayio nigo  
abete 'bosooku bwane.
- 11 Naende inche nkeboya  
chianga chie chigunia, boigo  
inkaba moreng'anio  
as' abanto baria bonsi.
- 12 Abago-ikaransa 'se  
'geita nigo bagokwana  
mamincha yane; na nkaba  
ogotera kw'abatindu.
- 13 Ko asende, ogosaba  
kwane ingocha asore  
kore as' engaki eria  
yancheire, aye Yehova.  
  
Koranche, as' ekeene  
ki'ogotooreka kwao na  
as' obonge bw'amabera  
ao, nyigwe, aye Nyasae.
- 14 Aye, ntoorie korwa ase  
etintira; na tontiga  
ndimere; tiga ntoorigwe  
korwa 'se abangechete;  
  
Naboigo ntoorigwe korwa  
ase chindiba chi'amache.
- 15 Aye totiga etoigo  
y'amache entube inche,  
  
Gose totiga endiba  
emere inche; totiga  
engoro ero esieke  
omonwa oye asende.
- 16 Aye Omonene, nyigwe  
ekiagera obwanchani  
bwao, boigo amabera  
ao, birobio nebiya.  
  
Ase engencho y'obonge  
bw'amabeebe n'amabera  
ao, aye Omonene,  
onchoka gocha asende.
- 17 Tobisa obosio bwao  
korwa 'se 'mosomba oo,  
nyigwe as' obwango, naki  
ninde ase emechando.
- 18 Inchuo ang'e as' omoyo  
one, boigo oyoboorie,  
egere omboorie korwa  
ase ababisa baane.
- 19 Nomanyete ogochaywa  
kwane, boigo obosooku

- bwane na ogotasikwa  
kwane; ee, nobimanyete.
- Ababisa baane bonsi  
nigo bare bosio bwao.
- 20 Emerumi yabunire  
enkoro yane kegima.
- Naboigo na-inche nigo  
ing'ichire n'oborito  
boigo inche nkarigia ng'a  
bandoree amabeebe,
- Ko onde tarengue; na  
inkarigia abwo bare  
kondemia inche, korende  
abwo tinabanyorete.
- 21 Ne ribaga ri'endagera  
yane bakang'a endorwe,  
boigo bakang'a chinkama  
inywe as' erang'o yane.
- 22 Tiga 'mesa yabo ebe  
egesugunia 'se bosio  
bwabo na tiga obuya  
bwabo bobe oboreba.
- 23 Na tiga amaiso abo  
aukorigwe tibarora,  
na kora chibachwa chiabo  
chiiguswe kogenderera.
- 24 Umora ekeririanda  
kiao asebare; tiga  
okogechia kw'endamwamu  
yao kobabwaterere.
- 25 Tiga obomenyo bwabo  
botigare bosa; boigo  
totiga omonto onde  
amenye 'se chiema chiabo.
- 26 Naki nigo bagotesa  
oria kwaagete, na nigo  
bakoraria obororo  
obwo bw'abwo kwabetete.
- 27 Menta obobe igoro  
ase obobe bwabo; na  
boigo totiga basoe  
ase oboronge bwao.
- 28 Tiga barusigwe korwa  
as' egetabu ki'abare  
moyo; boigo tibarikwa  
amo n'abanyaboronge.
- 29 Ko nigo nde omotaka  
na obw'obororo. Nyasae,  
tiga 'gotooreka kwao  
konyimokererie 'goro.
- 30 Inche nintogie erieta  
ria Nyasae as' ogotera,  
na nimoneneiyie mono  
n'ogoaka ng'a mbuya mono.
- 31 Aya nagokie Yehova  
goetania eeri gose  
eeri ensae ere ne  
chingunchara n'ebitaago.
- 32 Abakanyeku mbarore  
na bagoke. Ne chinkoro  
chialino nchibe moyo, inwe  
abamokorigia Nyasae.
- 33 Naki Omonene nigo  
akoigwa abataka, na  
tari gochaya abanto  
bare abasibwa baye.
- 34 Tiga Igoro na Ense  
bimotogie, ne chinyancha,  
na kera egento keria  
kegotaara ime agwo.
- 35 Naki Yehova natoorie  
Sayoni, boigo naagache  
emechie ya Yuda; erio  
mbamenyeo, bayetware.
- 36 Oroiboro rw'abasomba  
baye indoyeire buna

omwando; na abanchete  
'rieta riaye mbamenyeo.

**Zaburi 70** 8.6.8.6. (C.M.)

Ase omoteri omonene, Zaburi ya Daudi  
ase okoinyoria.

1 Aye Nyasae, inchuo bwango  
na ontoorie; inchuo  
bwango ase ogonkonya,  
aye Omonene.

2 Tiga abwo basookigwe  
na batantanigwe,  
abakorigia omoyo  
one, aye Nyasae.

Tiga abwo bairanigwe  
nyuma na bachaywe,  
baria bakogoka ase  
emechando yane.

3 Abwo bagoteba 'sende:  
Aha, Aha; tiga  
bairanigwe nyuma ase  
obosooku bwabo.

4 Bonsi abagokorigia,  
tiga bagoke na  
bachenge n'omasoko  
asore, Yehova.

Na tiga baria banchete  
'gotooreka kwao  
batebe botambe: Tiga  
Nyasae aneneigwe.

5 Korende inche nomonto  
omoremewa na  
omotaka; aye Nyasae,  
inchuo bwango 'sende.

Aye nogokonywa kwane  
n'omotooria one;  
ase igo, Omonene  
Nyasae, totebana.

**Zaburi 72** 8.6.8.6. (C.M.)

Zaburi ase Sulemani.

1 Kae omoruoti 'bina  
biao, aye Nyasae,  
n'oboronge bwao ase  
'mwana bw'omoruoti.

2 Nagambie abanto bao  
n'oboronge, boigo  
nanache ekina ase  
abataka bao.

3 Ebitunwa n'ebigoro  
mbirentere 'banto  
omorembe goetera  
ase oboronge.

4 Nasenyente omochandi;  
natoorie abana  
b'omoremewa; nagambie  
'bataka b'abanto.

5 Mbakoiroke koreng'ana  
buna risase na  
omotienyi bikobao  
as' ebriaare bionsi.

6 Ere nache inse buna  
embura igoro  
y'obonyansi bwanachirwe,  
as' okobogokia;

Ee, buna omomyirira  
omonge na buna  
embura enyinge eyio  
ekonyiyia Ense.

7 Ase amatuko aye  
omonyaboronge  
ere nache koreereta  
buna obonyansi,

Na obonge bw'omorembe  
mbobeo goika  
as' engaki y'omotienyi  
otabe aroro.

- 8 Boigo nagambe korwa 'se  
enyancha eyemo  
goika enyancha ende,  
nagambe aroro;  
  
Amaene okogamba  
kwaye nkobe korwa  
ase orooche na gochia  
'se chinsinyo chi'Ense.
- 9 Abamenyete erooro  
mbatung'ame bosio  
bwaye; n'ababisa baye  
mbamene orotu.
- 10 Abaruoti b'ebisinka  
amo n'abaruoti  
korwa ase Tarisisi  
mbarente ebiegwa.  
  
Abaruoti bakogamba  
igoro ye chinse  
chia Sheba na Seba boigo  
imbarue ebiegwa.
- 11 Ee, 'baruoti bonsi mbagwe  
inse bosio bwaye;  
boigo chinse chionsi chi'Ense  
inchimokorere.
- 12 Naki natoorie 'motaka  
oyio okorera,  
oyotabwati mokonyi,  
na omoremerwa.
- 13 Nabe n'amabeebe ase  
abaremerwa na  
abataka, na natoorie  
'moyo y'abataka.
- 14 Ere naboorie emiyo  
yabo korwa ase  
obotindi na korwa 'se  
obong'ainereria.  
  
Boigo amanyinga abo  
nabe ne rigori
- ase amaiso aye, ee,  
n'engencho enene.
- 15 Omoruoti, ere nabe  
moyo, n'etahabu  
ekorwa ense ya Sheba  
nerugwe asare;  
  
Na ogosaba ngokorwe  
as' engencho yaye  
botambe. Nasesenigwe  
omobaso boira.
- 16 Na obonge bwe chinyeke  
mbobe ase ense,  
nonya nase ebitunwa  
'bitambe igoro;  
  
Okwama kwaye inkobe  
gokonyegerao;  
ee, okwama nkonyegere  
buna Lebanoni;
- Na buna obonyansi bwe  
riroba, abanto  
b'omochie imbareerete,  
ee, mbamentekane.
- 17 Erieta riaye nerieta  
rigendererete  
go-ika kare na kare;  
ndibeo botambe.  
  
Erieta riaye nerieta  
rigendererete  
kobao buna risase  
rigendererete.
- N'abanto mbasesenigwe  
ime yaye; boigo  
chinse chionsi nchimoroke  
omosesenigwa.
- 18 Tiga Omone Nyasae  
asesenigwe, na  
Yehova o Israeli  
tiga atogigwe.

- Nere bweka okonyara  
gokora ebinto  
ebinene bi'amakumia  
na ebi'obonene.
- 19 Erieta riaye nerieta  
ri'obonene; tiga  
rirorio botambe ribe  
rigosesenigwa.
- Obonene bwaye tiga  
boichore as' Ense  
engima kogenderera.  
Amina, n'amina.
- Amasabo a Daudi, mosinto o Yese,  
aerire.
- 27 Naki rigereria, 'banto  
abwo bare aare  
korwa asore mbasire;  
mbasire kegima.
- Gwasaririe abatari  
abegenwa bonsi,  
ee, abwo bagotayaya  
korwa ase ore.
- 28 Korende asende nigo  
ere buya mono  
ng'a ing'ike ang'e ase  
Omonene Nyasae.
- Inche nasemeirie ase  
Omonene Nyasae,  
erinde ndarie 'meremo  
yonsi gwakorire.

**Zaburi 73** 8.6.8.6. (C.M.)  
Zaburi y'Asafu.

- 23 Kwambwatire okoboko  
kwane gw'okorio, na  
nigo ingendererete  
koba amo naye.
- 24 Na nondaae n'obosemia  
bwao; nyuma y'ayio  
aye nong'ire 'nche gochia  
ase obonene.
- 25 Ning'o imbivate ime ya  
Igoro? Na onde  
taiyo as' Ense nganetie  
otatiga aye.
- 26 Chinyama chiane n'enkoroo  
yane bia-erire.  
Omonene nechinguru  
chi'enkoroo yane 'nche.  
  
Goika kare na kare  
Nyasae omonyene  
negetari kiane; nere  
egetari kiane.

**Zaburi 74** 8.8.8.8. (L.M.)  
Masikili y'Asafu.

- 1 Inee, aye Nyasae, naki  
aye gwatotugutire  
goika kare na kare?  
Nase ki gwatotigire?  
  
Nase ki ekeririanda  
kiao kegwoka erioki  
mamincha ye ching'ondi chie  
riicho ri'borisia bwao?
- 2 Nyasae, koranche, oinyore  
omosangererekano  
oo omonyene oyio  
kwagoretete agwo kare,  
  
Enyimbo y'omwando oo  
oyio aye kwabooretie,  
egetunwa gia Sayoni  
agwo aase omenyete.
- 3 Imokereria 'magoro  
ao igoro gochia 'se

- 'gosarigwa okwo kore  
kogenderera botambe;  
  
Ee, nonya nebinto bionsi  
ebio omobisa oo  
akorire bobe aase  
aachenu y'ogosasima.
- 4 Ababisa bao nigo  
bakorum a as' egati  
y'emosangererekano  
oo; ee, nkorum bare.  
  
Na nigo bagotenenia  
chibendera chiabo koba  
ebimanyerero biabo;  
ee, imbachitenenetie.
- 5 Omonto nagakumire  
ekero are koimokia  
ebisire biaye 'goro  
as' emete ye rinani.
- 6 Ko bono nkobuna bare  
n'ebisire ne chinyundo  
'binto ebio biabachetwe  
aaria 'se Hekalu ime.
- 7 Barabwo batugutire  
omorero gochia ase  
Obomenyo Obochenu  
bwao; bakorire igo.  
  
As' okobotuguta 'nse  
ye riroba, bakorire  
'bomenyo bw'erita riao  
koba ogotacheneka.
- 8 Nigo bakwanete ime  
ye chinkoro chiabo: Tiga  
tobabune bonsi amo  
na tobamige kegima.  
  
Boigo basambire aase  
ao ao onsi agwo  
ase Omonene Nyasae  
agosasimwa as' ense.
- 9 Intwe titori korora  
ebimanyerero biaito;  
na bono mobani onde  
bwensi taiyo gati yaito;  
  
Gose onde taiyo gati  
yaito oyio omanyete  
ngoika ririri aya  
aragenderere koba.
- 10 Aye Omonene Nyasae,  
Inee, ngoika ririri  
omobisa arasookie  
naboigo kogochecheria?  
  
Ngoika kare na kare  
oyore mamincha yao  
aragendere korama  
'rieta riao, aye Nyasae?
- 11 Na nase ki okorusia  
okoboko kwao kore  
ogw'okorio? Gotaborie  
korwa 'se 'gekuba kiao.
- 12 Naki korwa kare, Nyasae  
nere omoruoti one;  
as' egati y'Ense nigo  
akorenta 'gotooreka.
- 13 Ngwatananete enyancha  
ase chinguru chiao, na  
nkwabunete emetwe ye  
chinchoka ime y'amache.
- 14 Ngwasenyentete 'metwe ya  
Leviatani; nkwyeruete  
ekaba endagera 'se  
abamenyete erooro.
- 15 Ngwatubogetie ensoko  
na etoigo; aye nigo  
gwakamogetie chindooche  
chinene n'okobua kwabo.
- 16 Omobaso noyoo, na  
obotuko nobwao; na

- aye nigo kwaroisetie  
oborabu ne risase.
- 17 Nkwachibegete chimbebe  
chionsi chi'Ense; nkwaroisetie  
engaki ye riberera  
na engaki y'obokendu.
- 18 Omonene, inyora ng'a  
omobisa ochecheirie  
na ng'a 'banto abariri  
baramire 'rieta riao.
- 19 Aye torua omoyo bwe  
riruma riao gochia 'se  
eng'iti y'orosana; ee,  
toyorua ase eng'iti.  
  
Aye koranche tibweba  
obogima bw'abataka  
bao goika kare na  
kare; tobeba barabwo.
- 20 Rora 'kobwatana kwao,  
naki aase y'omosunte  
as' Ense nigo aichire  
ne chinyomba chi'obotindi.
- 21 Tomotiga omomigwa  
airane osoogete, ko  
omotaka oremeire  
tiga 'togie 'rieta riao.
- 22 Aye Nyasae, rwanerera  
okwamererania kwao;  
imoka na rwanerera  
ensemo ere eyao.  
  
Naboigo inyora buna  
omonto ore 'moriri  
akogochecheria kera  
rituko kogenderera.
- 23 Aye Omonene Nyasae,  
tobaisa kweba okwoga  
gose eriogi ri'abanto  
bare ababiswa bao.
- Amaene riroroche  
ri'abwo bakoimokerera  
igoro mamincha yao  
riamentekire botambe.
- Zaburi 78** 8.6.8.6. (C.M.)  
Masikili y'Asafu.
- 1 Abanto baane, igwera  
amachiko aane;  
tegereria 'mato aino  
as' aya ngokwana.  
  
Igwa 'mang'ana y'omonwa
- 2 one. Ninygore  
omonwa one, ninkwane  
as' omoreng'anio,  
  
Ninkwane emebayeno
- 3 emekoro, eyio  
twaigwete na twamanyete;  
ee, ntwayemanyete;  
  
Ne chisokororia chiaito  
nchiayetotebetie.
- 4 Titokoyebisa korwa  
as' abana babo.  
  
As' ekegori kegochia-  
gocha 'ntwe ntorarie  
ogotogia kw'Omonene  
ne chinguru chiaye.
- Ase ekegori ekio  
ntorarie 'meremo  
yaye y'amakumia eyio  
ere akorire.
- 5 Agakong'ia oborori  
ase Yakobo, na  
akabeka amachiko  
ase Israeli,  
  
Ayio ere achigete  
chisokoro chiaito

- erio chiyamanyekanie  
as' abana babo.
- 6 Erio ekiaare kegochia-gocha keyamanye;  
ee, abana baraiborwe  
boigo mbayamanye.  
  
Abana abwo mbaimoke  
bakwane 'borori  
bwaye n'amachiko aye  
as' abana babo;
- 7 Erio barabwo mbabeke  
'gosemeria kwabo  
'se Nyasae, na tibakweba  
'meremo ya Nyasae;  
  
Boigo barabwo mbarende  
amachiko aye;
- 8 egere tibaba buna  
chisokoro chiabo.  
  
Nigo kiarenge ekiaare  
ekemwenu mono,  
na nigo kiare ekiaare  
getare koigwera.  
  
Tikiarenge nechinkoro  
chindonge. Tikiare  
n'obwegenwa ase Nyasae  
as'emeika yabo.
- Nonya mbosio bw'ebisaku  
bia Benjamin na Manase  
n'egesaku kia Efraimu,  
aye inchuo ototoorie.
- 3 Aye Omونene Nyasae,  
toiranie asore; kora  
obosio bwao borabe,  
erio intwe ntotoorigwe.
- 4 Omونene bw'Emeganda,  
Nyasae, ngoika ririri  
orabe n'endamwamu 'se  
'gosaba kw'abanto bao?
- 5 Nigo okobarageria  
n'omogati bw'amariga,  
naboigo kwabanyoisirie  
amariga 'mange mono.
- 6 Gwatomkorire twabeire  
abakwomanerwa nabwo  
bamenyete mbarabare,  
nonya nabaamate baito.  
  
Na abanto abwo bare  
ababisa asetore  
nigo bagochecheria na  
goseka egati yabo.
- 7 Aye Nyasae bw'Emeganda,  
toiranie asore; kora  
obosio bwao borabe,  
erio intwe ntotoorigwe.
- 8 Aye nigo kwarentete  
omosabibu korwa 'se  
Misiri, na ogaseria  
'banto baria b'ebisaku,  
  
Na okayosimekao.
- 9 Okayoraberia aase,  
okarimeria emeri  
inse; ogaichora ense.
- 10 Ebitunwa bigatubwa  
n'ekiriri kiaye; boigo
- Zaburi 80** 8.8.8. (L.M.)  
Ase omoteri omونene buna Shoshanimu-  
Eduti. Zaburi y'Asafu.
- 1 Tegerera, Omorisia  
o Israeli, na oigwe,  
aye okoraa Yusufu  
buna riicho rikoraagwa.  
  
Aye omenyete gati  
y'abakerubi, moreka.
- 2 Imokereria chinguru  
chiao as' amaiso aito,

- chinsagia chikaba buna  
emecharake emiya.
- 11 'Mosabibu okarandia  
chinsagia chiaye gochia 'se  
enyancha, boigo chinsagia  
chiaye chinyia gochia rooche.
- 12 Nase ki gwatagorete  
orobago rwaye? Bonsi  
abagoeta enchera  
eyio bayosangereria.
- 13 Na embeche ye rinani  
nigo ekoyoria mono,  
na eng'iti y'orosana  
nigo ekoyoria boigo.
- 14 Aye Nyasae bw'Emeganda,  
irana, twagosoroire;  
rigereria inse korwa  
aaria Igoro na rora;
- Na renda omosabibu  
15 oyo; boigo otaarere  
'mogondo bw'omosabibu  
oyio gwasimegeteo,
- Oyio n'okoboko kwao  
gw'okorio gwasimegete;  
n'orosagia gwakong'etie  
'sore aye omonyene.
- 16 Osambirwe n'omorero;  
onachirwe inse; nase  
ogotogonya kw'obosio  
bwao basirire igo.
- 17 Tiga okoboko kwao  
kogenderere igoro  
as' Omonto bw'okoboko  
kwao gw'okorio botambe;
- Ee, igoro y'Omwana o  
mwanyabanto, oyio aye  
gwakong'etie ne chinguru  
'sore aye omonyene.
- 18 Igo titokogotiga;  
toe intwe obogima  
oboyia erinde intwe  
ntorangerie 'rieta riao.
- 19 Omonene bw'Emeganda,  
Nyasae, toiranie asore;  
borabie obosio bwao,  
erio intwe ntotoorigwe.

**Zaburi 82** 8.8.8.8. (L.M.)

Zaburi y'Asafu.

- 1 Omonene Nyasae ere  
nigo agotenena 'se  
omoganda omonene  
bw'abagambi abakong'u.
- Nigo akonacha 'bina  
as' egati ye chinyasae.
- 2 Ngoika ririri inwe  
moranache 'bina bobe,  
  
Na morabe mokonacha  
ase enchera etari  
endonge na gwanchereria  
abanto abasareku?
- 3 Rwanerera omotaka  
na entakana; korera  
boronge omochandeku  
naboigo omoremerwa.
- 4 Inwe tooria omotaka  
naboigo omoremerwa;  
inwe batoorie korwa 'se  
'koboko kw'abasareku.
- 5 Tibamanyeti, tibari  
n'obong'aini; igo nigo  
bagotaara 'se 'mosunte,  
bakona-ko-una-una;  
  
Ase igo amaroso  
onsi ase Ense nigo

- akonyegerigwa korwa  
aase abo a boronge.
- 6 Nakwanire ng'a inwe ne  
chinyasae more, na inwe  
mwensi nabana ba Nyasae  
Oyore Igoro Mono.
- 7 Korende inwe imokwe  
buna mwanyabanto bonsi,  
na inwe imogwe buna  
abagambi bande bonsi.
- 8 Aye Nyasae, imoka na  
gambia Ense; ekiagera  
aye noire omwando bwe  
chinse chionsi n'ebisaku.
- Aye naye Omonene  
bw'Emeganda, boigo  
aye nomoruoti one;  
naye Nyasae one.
- 4 Imbasesenirie abwo  
bamenyete ase  
enyomba yao: botambe  
mbagotogie aye.
- 5 Nasesenirie omonto  
'konyora chinguru  
chiaye korwa ase ore;  
ee, nasesenirie;
- Ne chinchera nigo chire  
as' enkoro yaye.
- 6 Nigo bagoeta ase  
rigoko ria Baka,
- Na nigo bakoriroisia  
ensoko; n'embura  
ero nigo egoichoria  
amatibo onsi.
- 7 Nigo bakomenta korwa  
chinguru gochia 'se  
chinguru chinde botambe  
'se 'rogendo rwabo.
- Barabwo bonsi imbabé  
bakororekana  
bosio bw'Omonene Nyasae  
ime ya Sayoni.
- 8 Aye Omonene Nyasae  
bw'Emeganda, igwa  
ogosaba kwane; nyigwe,  
Nyasae o Yakobo.
- 9 Yehova, rora enguba  
yaito; rigereria  
ase obosio bw'Omoakwa  
Amaguta oo.
- 10 Naki rituko erimo  
'se chigoora chiao
- Zaburi 84** 8.6.8.6. (C.M.)  
Ase omoteri omonene buna Gititi, Zaburi  
ase basinto ba Kora.
- 1 Omonene bw'Emeganda,  
naki obomenyo  
bwao obwo omenyete  
bore oboseera!
- 2 Ee, omoyo one nigo  
ore n'amaiga na  
ogoyire obe ase  
chigoora chia Nyasae.  
  
Naboigo enkoro yane  
ne chinyama chiane  
nigo bikorera ase  
Nyasae ore moyo.
- 3 Ee, enchiro ero nigo  
'konyora enyomba,  
n'egesingororo nigo  
gekonyora 'geswa,  
  
Agwo ase gekobeka  
amege aye; 'se  
ebisasimero biao  
nao kemenyete.

- mbuya kobua 'matuko  
eribu eyemo.
- Nachorire gottenena  
ase omoriibo  
bw'egesieri ki'enyomba ya  
Nyasae one inche,
- Kobua komenya ime  
ye chiema chi'obobe  
na go-ikaransa ase  
enyomba y'obobe.
- 11 Naki Omonene Nyasae  
neribaso boigo  
nenguba; narue eneema  
n'obonene boigo.  
  
Tagotanga gento kende  
kere 'kiya korwa  
ase baria bagotaara  
ase oboronge.
- 12 Omonene bw'Emeganda,  
ekeene bori  
nasesenirie omonto  
ogosemeretie.
- 4 Yehova bw'ogotooreka  
gwaito, toonchore na  
tanga endamwamu yao  
korwa asetore.
- 5 Inee! Aye nogechigwe  
na-intwe botambe?  
Inee! Goika kare na  
kare nogechigwe?
- Inee! Aye notambeyie  
endamwamu yao  
ase ebigori bionsi?  
Noyegendererie?
- 6 Inee! Togotokora 'ntwe  
abayia naende,  
erio 'banto bao babe  
n'omogoko 'sore?
- 7 Aye Omonene Nyasae,  
tororere intwe  
amabera; boigo toe  
'gotooreka kwao.
- 8 Ninigwe 'nche eki Nyasae  
ore Omonene  
arakwane, naki ere  
nakwane 'morembe  
  
Ase abanto baye na  
abachenu baye,  
ko tobatiga bairane  
ase oboriri.

**Zaburi 85** 8.6.8.6. (C.M.)

Ase omoteri omonene. Zaburi ase basinto  
ba Kora.

- 1 Omonene, nogokirie  
n'ense yao; nigo  
kwairanetie obosibwa  
bwa Yakobo oo.
- 2 Aye nigo kwaberete  
obobe bw'abanto  
bao; nigo gwatubete  
'bibe biabo bionsi.
- 3 Nkwarusetie endamwamu  
yao yonsi; korwa  
okoyia gw'ekeririanda  
kiao, gwe-onchoire.
- 9 Ekeene, 'gotooreka  
kwaye nigo kore  
ang'e as' abanto baye  
abamoirogete;  
  
Ase ayio obonene  
mbobe bomenyete  
ase ense yaito ime,  
mbororekaneo.
- 10 Amabera n'ekeene  
mbia-oumeranete.

- Oboronge n'omorembe  
mbianyunyuntanete.
- 11 Na ekeene ngekine  
korwa as' ense na  
'boronge mborigererie  
korwa as' Igoro.
- 12 Bori, Omonene narue  
ayare amaya,  
boigo ense yaito nerue  
ebimeri biaye.
- 13 Oboronge mbotang'ane  
bosio bwaye, boigo  
botoraae as' enchera  
y'amagoro aye.
- Ee, amabera ao na  
obwanchani bwao nigo  
bire ebinge 'se baria  
bonsi bagokorangeria.
- 6 Omonene, tegerera  
ogosaba kwane; igwa  
eriogi ri'ogosorora  
kwane nkorera asore.
- 7 Inche nindakorangerie  
'se rituko ri'emechando  
yane, naki noranyigwe  
naboigo nong'iranerie.
- 8 As' egati ye chinyasae,  
ende teri buna aye;  
ee, kende tikeri buna  
emeremo yao, Nyasae.
- 9 Ebisaku bionsi bi'Ense  
kwaroisetie imbichiche  
bisasime as' obosio  
bwao, aye Omonene;  
  
Birobio mbichiche ase  
obosio bwao, na mbiee  
obonene 'rieta riao,  
aye Omonene Nyasae.
- 10 Naki aye naye ore  
omonene, boigo nigo  
ogokora amakumia;  
aye naye Nyasae bweka.
- 11 Aye Yehova, koranche  
ng'orokererie enchera  
yao, egere intaare  
ase ekeene kiao;  
  
Aye Omonene Nyasae,  
bwatania enkoro yane,  
egere inche nyiroke  
erieta riao rinene.
- 12 Aye Omonene Nyasae  
one, nigo ndagotogie

**Zaburi 86** 8.8.8.8. (L.M.)

Ogosaba kwa Daudi.

- 1 Tegereria 'goto kwao,  
aye Omonene, nyigwe;  
naki inche nomotaka  
naende omoremerwa.
- 2 Renda omoyo 'ne, naki  
inche nomochenu; Nyasae  
one, tooria omosomba  
oo 'yogosemeretie.
- 3 Aye Omonene Nyasae,  
indorere amabera,  
naki nigo inkorera  
asore rituko rionsi.
- 4 Omonene, gokia 'moyo  
bw'omosomba oo, naki  
nasore naimokereirie  
omoyo one igoro.
- 5 Naki aye, Omonene,  
naye ore omuya, na  
oyore ang'e kwabera,  
na noichire n'obwanchani.

n'enkoru yane yonsi na  
ngoakere ng'a mbuya mono;

Naende inche nindae  
erjeta riao 'bonene  
na amasikani onsi  
goika kare na kare;

13 Naki obwanchani bwao  
asende nobonge; boigo  
ngwatooretie omoyo 'ne  
korwa inse ya Cheanamu.

14 Aye Yehova, abanto  
bare aberori nigo  
baimokereirie igoro  
mamincha yane kegima.

N'omoganda bw'abatindi  
origirie omoyo 'ne;  
boigo tibara kobeka  
bosio bwabo nonya ng'ake.

15 Korende aye Yehova,  
aye naye Nyasae ore  
obw'eneema na oichire  
n'amabeebe na obuya;

Aye naye Nyasae ore  
n'oboremereria, boigo  
aye noichire n'obonge  
bw'amabera n'ekeene.

16 Aye onchora obosio  
bwao gocha asende na  
indorere amabera;  
inche nomosomba oo;

Tooria 'mwana bw'omosomba  
oo omokungu; karue  
chinguru chiao n'okobua  
ase omosomba oo.

17 Omونene, inyorokie  
'kemanyererio ki'obuya,  
egere abangechete  
barore na gosookigwa.

Tiga basookigwe bori,  
naki aye Omonene  
gwankonyire na kondemia,  
kwandoreire amabeebe.

### Zaburi 87 8.6.8.6. (C.M.)

Zaburi gose Ogotera, ase basinto ba Kora.

1 As' egati y'ebitunwa  
bire ebichenu,  
agwo nao oboroso  
bwaye boteneine.

2 Yehova nigo anchete  
'biita bia Sayoni  
goetania chiema echio  
chionsi chia Yakobo.

3 Amang'ana y'obonene  
akwanirwe 'goro  
yao, Sayoni, omochie  
bw'Omonene Nyasae.

4 Ase baria bamanyete  
inche, ninyatore  
igoro ya Misiri na  
ense ya Babeli.

Rora Filisti na Turo  
na rora Etiopia;  
omonto oyo aroro  
nao aiboretwe.

5 Na nekwanwe igoro ya  
Sayoni, ng'a ere  
Oyore Igoro Mono  
ere nayokong'ie.

6 As' engaki Omonene  
Nyasae arakore  
'mobaro bw'abanto, ere  
nigo ararike:

Ng'a omonto oyo nigo  
aiboretwe aaria

- 7 Sayoni. Na abateri  
imbabe aroro;  
  
'Bagosoria b'amatera  
mbabeo. Chinsoko  
chiane chionsi nchire ime  
yao aye bweka.
- Zaburi 89** 8.6.8.6. (C.M.)  
Masikili y'Etani Omoezara.
- 1 Goika kare na kare  
nintere igoro  
y'amabera y'Omonene;  
inche ninyatere.  
  
Naboigo nimanyekanie  
obwegenwa bwao  
n'omonwa one botambe  
as' ebiaare bionsi.
- 2 Naki inche nakwanire:  
Goika kare na  
kare amabera ao  
nabe akoagachwa.  
  
Amaene obwegenwa  
bwao nobokong'ie  
aaria Igoro botambe;  
ee, mbogenderere.
- 3 Naroisirie 'kobwatana  
n'omochore one;  
natianire ase Daudi,  
omosomba one.
- 4 Natianire: Nindokong'ie  
ororeria rwao  
goika kare na kare;  
ee, indokong'igwe;  
  
Na ninkong'ie ekerogo  
kiao ki'obonene  
egere kebe gochia 'se  
ebiaare n'ebiaare.
- 5 Aye Omonene Nyasae,  
igoro nchitogie  
amakumia ao onsi  
ayio gwakorire;  
  
Boigo obwegenwa bwao  
mbotogigwe ase  
omosangererekano  
bw'abachenu ime.
- 6 Naki ning'o ore aaria  
Igoro 'ranyare  
koreng'anigwa na Nyasae  
oyore Yehova?  
  
Ase egati y'abana  
b'babui, ning'o  
'ranyare koreng'anigwa  
n'Omonene Nyasae?
- 7 Yehova nagwenerete  
airokwe mono 'se  
omosangererekano  
bw'abachenu ime.  
  
Naboigo nagwenerete  
asikwe botambe  
ase baria bonsi abwo  
bamuetanaine.
- 8 Ning'o ore Omonene  
omokong'u buna  
aye ore, Omonene  
Nyasae bw'Emeganda?  
  
Na amaene, Yehova,  
obwegenwa bwao  
na obuya bwao nigo  
bigoetanaine.
- 9 Nigo okoyegambera  
enyancha enene  
egoturubanigwa na  
emerindo yaye;  
  
Ekerero 'merindo eyio  
ekoimokerera,

- aye oyetoereria,  
na yatoerera.
- 10 Nkwabunanete Rahabu  
ebing'ese, buna  
omonto o-akirwe na  
oitirwe kegima.  
  
Na gwasebereranetie  
ababisa bao  
n'okoboko kwao okwo  
kore ne chinguru.
- 11 Igoro nechiao, boigo  
Ense neyao, na  
Ense na bionsi bireo  
inkwabikong'etie.
- 12 Ngwatongete Sugusu na  
Irianyi; Tabori  
na Herimoni mbigoke  
as' erieta riao.
- 13 Nigo obwate 'koboko  
kw'obobui, boigo  
okoboko kwao nigo  
kore ne chinguru.  
  
Boigo okoboko kwao  
gw'okorio, korokwo  
nkoimokereirie igoro;  
ee, nigoro kore.
- 14 Amaene, oboronge  
na ebina mbire  
obomenyo bw'ekerogo  
kiao ki'bonene.  
  
Amabera ao, amo  
n'ekeene kiao,  
mbitang'ane bosio bwao,  
aye Omonene.
- 15 Mbasesenirie abanto  
abwo bamanyete  
eriogi ri'omogoko; ee,  
imbasesenirie.
- Abanto abwo, barabwo  
imbataare ase  
'borabu bw'obosio bwao,  
aye Omonene.
- 16 Rituko rionsi mbagoke  
as' erieta riao;  
mbaimokerigwe ase  
oboronge bwao.
- 17 Ekiagera aye nigo  
ore obonene  
bwe chinguru chiabo, boigo  
obw'okobua kwabo.
- Na orogunchara rwaito  
na okobua gwaito  
mbiimokigwe igoro 'se  
ogwancherwa kwao.
- 18 Naki Yehova nenguba  
yaito, n'Omochenu  
bw'Abaisraeli nere  
omoruoti oito.
- 19 Erio ogakwana ase  
amaroro gochia  
ase Omochenu oo,  
aye ogateba:  
  
Nabekire ogokonya  
ase oria ore  
n'okobua okonene ne  
chinguru chinene.
- Na inche naimokereirie  
igoro oyomo  
ochoirwe korwa ase  
egati y'abanto.
- 20 Inche nanyorire Daudi  
omosomba one;  
namoakire amaguta  
aane amachenu.
- 21 Boigo okoboko kwane  
ngokong'igwe amo

- nere; boigo nimokong'ie  
n'okoboko kwane.
- 22 Omobisa oye, ere  
takomokobesia;  
omwana bw'obosareku  
takomochand' ere.
- 23 Ninsenyente ababisa  
baye as' obosio  
bwaye; nimbae amaakwa  
abamogechete.
- 24 Ko obwegenwa bwane na  
amabera aane,  
birobio mbigenderere  
koba amo nere.  
  
Na orogunchara rwaye  
ndoimokererigwe  
igoro ase erieta  
riane; ndoneneigwe.
- 25 Na nimbeke okoboko  
kwaye as' enyancha,  
na okoboko kwaye kwa  
borio 'se chindooche.
- 26 Nabe okorera 'sende  
na ere natebe:  
Aye naye Tata one,  
naye Nyasae one.  
  
Nabe okorera 'sende  
na ere natebe:  
Naye ore egetare  
ki'ogontooria inche.
- 27 Boigo nimokore abe  
omotangi one,  
abe igoro kobua  
abaruoti b'Ense.
- 28 Inche nimoyarendere  
amabera aane  
go-ika kare na kare;  
nimoyarendere.
- Na okobwatana kwane  
ngokong'igwe nere  
go-ika kare na kare;  
nkobeo botambe.
- 29 Boigo inche nindokore  
oroiboro rwaye  
rogenderere kare na  
kare; ee, ndobeo.  
  
Ningekore ekerogo  
kiaye ki'obonene  
kebe buna 'matuko a  
Igoro enhenu.
- 30 Ko onye abana baye  
bakwanga 'machiko  
aane, gose tibataara  
as' ebina biane,
- 31 Gose onye bagosaria  
amachiko aane,  
na onye tibakorenda  
amachiko aane,
- 32 Erio inche nintaarere  
ogosaria kwabo  
n'enylimbo yane na 'bobe  
bwabo n'ebiranya.
- 33 Korende 'nche tinkorusia  
asare kegima  
obwanchani bwane gose  
amabera aane.  
  
Gose inche tingotiga  
obwegenwa bwane  
gose ekeene kiane  
bibe biko-era.
- 34 Tinkobuna 'kobwatana  
kwane; tingoonchora  
ing'ana rinde riarure  
as' omonwa one.
- 35 Ase obochenu bwane  
natianire ara

- rimo ng'a tingokwana 'se  
Daudi oborimo.
- 36 Boigo oroiboro rwaye  
indogenderere  
go-ika kare na kare;  
ndobeo botambe.  
  
Boigo ekerogo kiaye  
ki'obonene nkebe  
aroro buna risase  
rire bosio bwane.
- 37 Ingekong'igwe botambe  
buna omotienyi,  
buna kirori 'mwegena  
ime ya Igoro.
- 38 Ko aye gwatugutire,  
na kwagechire; na  
kwabeire n'endamwamu 'se  
omosomba oo,  
  
Nonya noyore omoakwa  
amaguta oo.
- 39 Kwangire okobwatana  
kw'omosomba oo.  
  
Boigo aye gwasaririe  
egutwa yaye 'se  
okoyetuguta inse  
gochia 'se riroba.
- 40 Gwatagoire gochia inse  
chindwaki chiaye ne  
chimbebe chiaye chionsi, ee,  
gwachitugutire.  
  
Gwatagoire amaagacho  
aye amakong'u  
abeire amatombé, ee,  
abeire chitui.
- 41 Baria bonsi bagoeta  
as' enchera eyio  
nigo bakmosakora;  
ere nobosoku;
- Nigo are obosooku  
bw'abaamate baye.
- 42 Kwagokirie ababisa  
abwo baye bonsi.  
  
Kwaimokererie igoro  
'koboko gw'okorio  
kw'abare mamincha yaye;  
ee, gwakorire bo.
- 43 Na kwairanirie obwoge  
bw'ormoyio oye o  
birende; na as' esegi  
toramotenenia.
- 44 Gwatigirie obonene  
bwaye; 'se riroba  
gwatugutire 'kerogo  
kiaye ki'obonene.
- 45 Na kweng'eirie amatuko  
y'obosae bwaye;  
naboigo kwamotubire  
n'obosooku mono.
- 46 Inee, Omونene Nyasae,  
ngoika ririri?  
Ngoika kare na kare  
aye orebise?  
  
Inee, ngoika ririri  
endamwamu yao  
eragenderere gwoka  
buna omorero?
- 47 Inyora, chingaki chiane  
ng'a nchire chinyeng'e.  
Ase ki kwabatongete  
bonsi babe bosa?
- 48 Monto ki ore moyo na  
ere otarore  
orotu rw'amakweri? ee,  
monto ki otakwe?  
  
Inee, ere naranyare  
gootoria omoyo

- oye korwa agwo ase  
'koboko kw'embeera?
- 49 Nyasae, obwanchani bwao  
obokoro, ng'ai  
bore, kwarierete Daudi  
'se 'keene kiao?
- 50 Aye Yehova, inyora  
ogochecherigwa  
kw'abasomba bao, okwo  
kore okonene.  
  
Nigo nkoremereria 'se  
egekuba kiane  
ogochecheria kw'abanto  
bonsi ababui,
- 51 Ee, nonya nogochecheria  
kw'ababisa bao;  
bachecheirie omosomba  
oo, Omonene.  
  
Ee, nigo bagochecheria  
na gosekerera  
amabarato y'omoakwa  
amaguta oo.
- 52 Goika kare na kare  
tiga Omonene  
asesenigwe botambe.  
Amina n'amina.
- Ee, korwa kare na kare  
aye naye Nyasae;  
go-ika kare na kare  
aye naye Nyasae.
- 3 Nigo okoirania 'banto  
gochia amaroba.  
Aye gwateba: Irana,  
inwe mwanyabanto.
- 4 Naki emiaka eribu  
'sore nigo enga  
buna igoro ekero  
ero ya-etire.  
  
Boigo emiaka eribu  
nigo enga buna  
'ngaki enke y'okorenda  
'kero kia botuko.
- 5 Buna eooro enene  
mono, aye nigo  
okobokorobanania  
'bogima bw'abanto.  
  
Na barabwo nigo banga  
okorara; mambia  
nigo banga obonyansi  
obwo bokomera.
- 6 Mambia nigo bogokina  
naboigo bwasicha;  
mogoroba bwanachwa 'nse,  
erio bwoma bwonsi.
- 7 Naki intwe twasirigwe  
n'endamwamu yao,  
na twaondokigwe ase  
'keririanda kiao.
- 8 As' oborabu bw'obosio  
bwao, kwabekire  
ebibe biaito, ee, nonya  
nobobisi bwaito.
- 9 Ekiagera amatuko  
aito onsi nigo

**Zaburi 90** 8.6.8.6. (C.M.)  
Ogosaba kwa Musa, omonto o Nyasae.

- 1 Omonene Nyasae oito,  
aye nigo ore  
obomenyo bwaito ase  
ebiaare n'ebiaare.
- 2 Ebitunwa bitaraba  
aroro na konya  
otarayetonga Ense,  
nigo kwarengeo.

- agoeta bwango ase  
endamwamu yao.
- Nigo togokoora 'miaka  
yaito yonsi buna  
ekerengererio keria  
gia-etire bwango.
- 10 Rora, 'matuko y'emiaka  
yaito yonsi nigo  
are 'miaka emerongo  
etano n'ebere.
- Ne chingaki chinde, onye  
chinguru chireo,  
yaba 'miaka emerongo  
etano n'etato,
- Nonya nerio, obwerori  
bw'amatuko ayio  
nemeremo y'obokong'u  
n'obororo boigo,
- Naki obwerori obwo  
nigo bogoeta  
bwango; na intwe 'banyene  
twairuruka boigo.
- 11 Ning'o 'manyete chinguru  
chi'endamwamu yao?  
Na ekeririanda kiao,  
ning'o 'kemanyete?
- Koreng'ana n'okoirokwa  
kwao, nabo nonya  
nendamwamu yao ere,  
aye Omonene.
- 12 Tworokererie tobare  
amatuko aito,  
erinde intwe tonyore  
chinkoro ching'aini.
- 13 Omonene, toiranere,  
ngo-ika ririri?  
Ororere abasomba  
bao amabeebe.
- 14 Toisanekie kera mambia  
n'amabera ao;  
na 'matuko aito onsi  
ntochenge, ntogoke.
- 15 Otogokie koreng'ana  
n'amatuko ayio  
gwatohandete n'emiaka  
twaroche 'mechando.
- 16 Rorekania emeremo  
yao 'se 'basomba  
bao n'obonene bwao  
as' abana babo.
- 17 Omonene Nyasae oito,  
tiga oboseera  
bwao na eneema yao  
bibe 'goro yaito.
- Na tokong'erie 'meremo  
y'amaboko aito;  
ee, 'meremo y'amaboko  
aito oyekong'ie.

**Zaburi 91**

8.8.8.8. (L.M.)

- 1 Omonto oyomenyete  
aase are obobisi  
bw'Oyore Igo Mono  
namenye as' omorembe;
- 2 Namenye 'nse y'ekiriri  
ki'Omogui. Ee, ninkwane  
igoro ya Nyasae: Nere  
eburi yane enkong'u;
- Na nere obotamero  
bwane; nere Nyasae one;  
asare nao ndabeke  
ogosemeria kwane 'nche.
- 3 Ere nagotoorie bori  
korwa ase oborwaire  
bogoita, na korwa ase  
oboreba bw'omotegi.

- 4 Nagotube n'amarionya  
aye; inse ye chimbaba  
chiaye nosemerie; nabe  
obotamero asore.  
  
Ekeene kiaye nkebe  
enguba yao n'eng'aya.
- 5 Tokiroka as' engencho  
y'okogoswa kwa botuko;  
  
Gose aye tokwoboa  
nonya ng'ake as' engencho  
y'omogwe okoiruruka  
as' engaki ya mobaso.
- 6 Tokiroka as' engencho  
y'oborwaire bogota na  
boigo bogotaara ase  
omosunte omonene.  
  
Gose tokiroka ase  
engencho y'ogosarigwa  
kogosiria na kogoita  
as' egati ya mobaso.
- 7 Eribu y'abanto negwe  
ase ensembo yao ne  
chiribu ikomi ase  
'koboko kwao gw'okorio;  
  
Korende nabaisa kogwa  
inse, oborwaire obwo  
na ogosarigwa okwo  
tibigocha ang'e naye.
- 8 Norigererie n'amaiso  
ao bor; ee, norore  
eng'eria embe egocha  
as' abasareku abwo.
- 9 Kwamobekire Yehova,  
Oyore Igoro Mono,  
ore 'botamero bwane,  
koba obomenyo bwao;
- 10 Ase ayio bobo bonde  
tibogokonyora gose
- amaakwa ande tagocha  
ang'e n'obomenyo bwao.
- 11 Naki as' engencho yao  
nachike abamalaika  
baye ng'a imbakorende  
'se chinchera chiao chionsi.
- 12 Erinde tosenyentera  
'kogoro kwao mamincha  
ye rigena, mbakoimokie  
ase amaboko abo.
- 13 Aye notache igoro  
ase endo ne rirubi;  
notiringe n'amagoro  
enchoka n'endo ensae.
- 14 Ase igo nimotoorie,  
ekiagera nabegete  
obwanchani bwaye 'sende  
naboigo nangokerete.  
  
Na nimoimokie igoro  
ekiagera namanyete  
erieta riane rinene;  
ee, ere narimanyete.
- 15 Nimbe amo nere ase  
emechando; nandangerie  
na erio nimoiranerie;  
nimotoorie; nimosike.
- 16 Naboigo nimoisanekie  
n'obogima obotambe;  
na ogotooreka kwane  
ninkoorokie gochia 'sare.

**Zaburi 92** 8.8.8. (L.M.)  
Zaburi gose Ogotera ase Rituko  
ri'Esabato.

- 1 Mbuya goakera Nyasae ng'a  
mbuya mono, na gotera  
as' erieta riao, aye  
Oyore Igoro Mono;

- 2 Naboigo mbuya koraria  
obwanchani bwao ase  
emambia, na obwegenwa  
bwao kera obotuko;
- 3 Mbuya kobiraria ase  
okobugia obokano  
bore ne chinga ikomi  
na as' obokano bonde;
- Naboigo as' okobugia  
obokano as' enhera  
y'ebirengererio bire  
ebinene na ebiya.
- 4 Naki aye, Omonene,  
gwankorire inche koba  
n'omochengo goetera  
emeremo eyio yao.  
  
As' engencho y'emeremo  
y'amaboko ao, inche  
nintere n'eriogi rire  
rinene neri'omogoko.
- 5 Nyasae, naki emeremo  
yao ere emenene!  
Ebirengererio biao  
mbire ebia ime mono.
- 6 'Monto ore omoriri  
tamanyeti, gose oria  
oyotari n'obong'aini  
takonyara koyamanya.
- 7 Ekero abasareku  
bagokina bwango buna  
obonyansi obobese,  
barabwo imbasirigwe;  
  
Na ekero abakori  
amabe barabwo bonsi  
bagosicha, mbasirigwe  
goika kare na kare.
- 8 Korende aye Yehova,  
aye nogendererete
- koba Igoro Mono, ee,  
goika kare na kare.
- 9 Naki rora, ababisa  
bao, aye Omonene;  
naki rora, ababisa  
bao mbache gosirigwa;
- Na abakori amabe  
bonsi barabwo imbabe  
bagoserebanigwa, ee,  
bonsi mbaserebanigwe.
- 10 Korende orogunchara  
rwane noroimokererie  
igoro buna orw'eeri;  
ning'akwe 'maguta 'mayia.
- 11 N'amaiso aane narore  
okobugwa kw'ababisa  
baane; naboigo amato  
aane naigwe 'goro y'ayio.  
  
Ee, amato aane naigwe  
'kobugwa kw'abasareku  
bare mamincha yane na  
abanyimokerete 'nche.
- 12 Omonyene oboronge  
nasiche buna omote  
bw'omokendo ogosicha;  
ee, nasiche buna oro.  
  
Omonyene oboronge  
nabe ogokina buna  
omote omocharake  
oyokorwa Lebanon.
- 13 Abasimekire ime  
as' enyomba y'Omonene  
mbareerete aaria ase  
chigoora chia Nyasae oito.
- 14 Barabwo mbagenderere  
kwama ase obogotu  
bwabo; barabwo imbabe  
abanoru na gosicha,

15 As' okoorokia ng'a Nyasae  
nomonyaboronge, ere  
negetare kiane, ime  
yaye gosaria tikorio.

**Zaburi 93** 8.6.8.6. (C.M.)

- 1 Nyasae nere okogamba;  
nigo eboetie  
na nesogete chinguru  
n'obonene boigo;  
  
Nyasae nigo esogete.  
Ense boigo nigo  
eteneine bokong'u na  
tekonyegerigwa.
- 2 Korwa kare ekerogo  
kiao ki'obonene  
nigo geteneine; eke  
nigo gekong'irie.  
  
Na korwa kare na kare  
aye nao ore.
- 3 Amache aimokereire  
igoro, Yehova;  
  
Amache aimokereirie  
'riogi riaye 'goro;  
amache aimokereirie  
emerindo yaye.
- 4 Yehova ore igoro  
nabwate chinguru  
chinene kobua 'riogi  
ri'amache amange,  
  
Ee, kobua emerindo  
'menene y'enyancha.
- 5 Oborori bwao nigo  
bokong'irie mono.  
  
Obochenu bwagweneire  
as' enyomba yao  
go-ika kare na kare,  
aye Omonene.

**Zaburi 94**

8.6.8.6 (C.M.)

- 1 Aye Omonene Nyasae,  
'gesiomba nekiao.  
Aye Nyasae, egesiomba  
nekiao. Moreka.
- 2 Eimokererie igoro,  
Omogambi bw'Ense,  
na karue eng'eria embe  
ase aberori.
- 3 Aye Yehova, ngoika  
ririri ababe,  
ngoika ririri 'babe  
abwo baretoogie?
- 4 Gose ngoika ririri  
barakwane nonya  
ngoteba ebinto bire  
ebikong'u mono?  
  
Gose ngoika ririri  
abakori 'bobe  
bonsi baragenderere  
gwtogia asore?
- 5 Nigo bakobasenyenta  
abanto bao na  
komiga omwando oo,  
aye Omonene.
- 6 Nigo bagoita abana  
batabwati 'baise,  
boigo baita omomenyi  
na omoboraka.
- 7 Ko nigo bagokwana ng'a  
Nyasae takorora;  
gose Nyasae o Yakobo  
takomanya ayio.
- 8 Manya, inwe abariri  
egati y'abantu.  
Inwe 'bariri, ndiriri  
morabe 'bang'aini?

- 9 Oyobegete ogoto,  
inee, tari koigwa?  
Oyobombete eriso,  
inee, takorora?
- 10 Ere oyokorongeyia  
'banto b'ebisaku,  
inee, takogorora? Ee,  
ere nagorore.  
  
Na oyokworokereria  
mwanyabanto babe  
n'okomanya, inee, ere  
takomanya onsi?
- 11 Omonene namanyete  
ebirengererio  
bia mwanyabanto, ng'a nigo  
bire bosa bosa.
- 12 Nasesenirie botambe  
'monto oyio, aye  
Nyasae, okorongeyia na  
komworokereria.  
  
Ee, nasesenirie 'monto  
oyio, aye Nyasae,  
okworokereria korwa  
as' amachik' ao.
- 13 Egere aye omoe  
ogotimoka, ee,  
korwa ase amatuko  
y'emechando yaye;  
  
Nonya ngo-ika ekero  
engoro entambe  
eraremwe as' omonto  
ore 'mosareku.
- 14 Naki Omonene ere  
takobatuguta  
'banto baye nonya ng'ake,  
takobatuguta.  
  
Gose ere tagotiga  
15 omwando oye. Ko
- ebina mbinachwe ase  
'boronge naende.
- Erio abaronge bonsi  
'se chinkoro chiabo  
mbabobwatie oboronge;  
ee, imbabobwatie.
- 16 Ning'o oraimokerere  
'goro as' engencho  
yane mamincha y'ababe?  
Ning'o oraimoke?
- Ee, ning'o oratenene  
as' engencho yane  
mamincha y'abasareku  
n'abakori 'bobe?
- 17 Onye Nyasae atabete  
omokonyi one,  
omoy' one nigo ore  
as' obokiriru.
- 18 Ekero inche ngokwana:  
Okogoro kwane  
nigo kogotereria, ee,  
ngotereria kore;  
  
As' engaki eria eria,  
amabera ao  
aro nigo ansiirete,  
aye Omonene.
- 19 Ase engaki y'obonge  
bw'ebirengererio  
biane bire ime yane,  
ebio bigonchanda,  
  
Erio okoremia kwao  
okwo kore 'konge  
nigo gokogokia 'moyo  
one ime yane.
- 20 Inee, 'kerogo ki'obobe,  
gekorenta 'bobe  
ase amachiko aye,  
nkebwataane naye?

- |    |  |    |  |
|----|--|----|--|
| 21 | Mamincha y'omoyo bw'oria<br>omoronge nigo<br>bagosangererekana<br>amo komogambia.        | 4  | Aase are inse mono<br>y'Ense nigo are<br>ase okoboko kwaye;<br>ee, aro nayaye.               |
|    | Boigo kogamba mamincha<br>y'amanyinga aria<br>atabwati komocha, ee,<br>engencho etaiyo.  | 5  | Obotambe bw'ebitunwa<br>nobwaye boigo; na<br>enyancha yonsi neyaye,<br>na nayeroisetie;      |
| 22 | Ko Yehova nigo are<br>'gekengero kiane;<br>Nyasae one negetare<br>kiane ngotamera.       | 6  | N'amaboko aye nigo<br>abombete ense  |
| 23 | Ee, nere obotamero<br>bwane. Na narente<br>obobe bwabo igoro<br>yabo abanyene.           | 7  | enyomo. Inchuo, twekumbe<br>na tomosasime.   |
|    | Ere nabasirie ase<br>'bosareku bwabo,<br>Omonene Nyasae oito<br>ere nabasirie.           |    | Tiga totung'ame bosio<br>bw'Omonene Nyasae,<br>omotongi oito; naki<br>nere Nyasae oito;      |
|    |  |    | Na nigo tore abanto<br>b'oborisia bwaye;<br>na nigo tore ching'ondi<br>chi'okoboko kwaye.    |
| 8  | Inchuo, toterere Nyasae<br>oyore 'getare<br>ki'ogotooreka gwaito; ee,<br>totogie Yehova. | 9  | Rero, komoraigwe 'riogi<br>riaye, timokong'ia<br>chinkoro chiaino buna 'se<br>aase a Meriba; |
|    | Na tiga intwe to-ake<br>'riogi ri'omogoko  |    | Timochikong'ia chirochio<br>buna 'se rituko<br>riria aaria Masa agwo<br>as' erooro ime,      |
| 2  | asare; na tiga toche<br>as' obosio bwaye.  | 10 | Ekero chisokororia<br>chiaino chianteemete,<br>chikandenga na korora<br>emeremo yane.        |
|    | To-ake ng'a mbuya mono<br>na goaka eriogi<br>ri'omogoko asare na<br>totere zaburi.       |    | Ase engaki y'emiaka<br>emerongo ene<br>nkagechigwa n'ekegori<br>keria, na ngateba:           |
| 3  | Naki Nyasae nomoruoti<br>'monene kobua<br>chinyasae chionsi, na nere<br>Nyasae omونene.  |    | Aba nabanto bagochia<br>'nsemo 'se chinkoro  |

- chiabo, ne chinchera chiane  
tibachimanyeti.
- 11 Igo natianire ase  
endamwamu yane  
ng'a tibagosoa ase  
'gotimoka kwane.
- Zaburi 96** 8.8.8. (L.M.)
- 1 Moterere Omونene  
ogotera okoyia, ee,  
moterere Omونene,  
inwe mwensi b'Ense yonsi.
- 2 Moterere Omونene,  
sesenia erieta riaye,  
raria 'gotooreka kwaye  
rituko ase rituko.
- 3 Raria obonene bwaye  
ase egati y'abanto  
b'ebisaku, n'amakumia  
aye as' abanto bonsi.
- 4 Ekiagera Omونene  
nigo are omونene,  
na nigo agwenerete  
gotogigwa mono mono.  
  
Nagwenerete koirokwa  
kobu-a chinyasae chionsi,
- 5 'kiagera chinyasae chionsi  
chie chinse nemegwekano.  
  
Korende Yehova nere
- 6 oroisetie erioba, na  
ogosikwa n'obobui  
nigo bire bosio bwaye.  
  
Chinguru na oboseera  
nigo bire ime y'aase  
aye are aachenu, ee,  
ime y'obomenyo bwaye.
- 7 Inwe moe Omونene,  
inwe chiamate chi'abanto,  
inwe moe Omونene  
obonene ne chinguru.
- 8 Inwe moe Omونene  
'bonene bw'erieti riaye,  
morentane okoruegwa,  
inchuo 'se chigoora chiaye.
- 9 Mosasime Yehova 'se  
oboseera bw'obochenu,  
iguswa ase obosio  
bwaye, inwe Ense yonsi.
- 10 Inwe kwana as' egati  
y'abanto b'ebisaku ng'a  
Omونene Nyasae nere  
okogamba ase Ense.  
  
Ense boigo nekong'igwe  
egere tenyegerigwa;  
na nanachere abanto  
ekina 'se oboronge.
- 11 Tiga erioba rigoke,  
na tiga Ense echenge,  
tiga enyancha erume  
n'ebinto bionsi bireo.
- 12 Tiga 'megondo egoke  
na bionsi bire aroro;  
nerio emete yonsi ye  
rinani ero nechenge.
- 13 Nechenge ase obosio  
bwa Yehova, naki ngocha  
are, naki ngocha are  
konachera Ense 'kina.  
  
Ere nanachere 'banto  
ekina as' ekeene  
kiaye; nanachere Ense  
ekina as' oboronge.

**Zaburi 97** 8.8.8. (L.M.)

- 1 Omونene ere nigo  
akogamba; tiga Ense  
egoke na ebisinka  
ebinge bichenge mono.
- 2 Amare na omosunte  
nigo bimoetanaine;  
oboronge n'keeene  
mbire obomenyo bwaye;  
  
Amaene oboronge  
n'keeene nigo bire  
oboroso bw'ekerogo  
kiaye ki'obonene bwaye.
- 3 Bosio bwaye omorero  
nigo okogenda; nigo  
ogosamba ababisa  
baye 'se kera ensem.
- 4 Okomesa gwe chinkoba  
chiaye nkamorekerete  
Ense; Ense ekarora  
boigo ero ekaiguswa.
- 5 Bosio bwa Nyasae, 'bitunwa  
mbianyititogete buna  
obochoe, as' obosio  
bw'Omونene bw'Ense yonsi.
- 6 Igoro nkoraria chire  
oboronge bwaye, boigo  
abanto bonsi nkorora  
bare obonene bwaye.
- 7 Bonsi abagokorera  
'megwakan basookigwe,  
abwo bakwerora ase  
engencho y'emegwekano;  
  
Sasima Yehova, inwe  
chinyasae chionsi chie chinse.
- 8 Sayoni ekaigwa boigo  
ekagoka mono mono.
- 9 Naki aye, Omونene,  
nigoro ore kegima  
goetania Ense yonsi;  
aye kwaimokererigwe;  
  
Aye kwaimokererigwe  
igoro mono kobua  
chinyasae chinde; chirochio  
nchire chinyasae chia bosa.
- 10 Bogeche obobe, inwe  
abamwanchete Yehova;  
ere nigo akorenda  
'mioyo y'abachenu baye.  
  
Na nigo akobatooria  
korwa ase okoboko  
kw'abanto abasareku,  
ee, nigo akobatooria.
- 11 Oborabu n'omogoko  
nigo bikobusurerwa  
omonyaboronge boigo  
abaronge 'se chinkoro.
- 12 Aka ng'a mbuya mono 'se  
okoinyorwa kw'obochenu  
bwaye; gokera Yehova,  
inwe abanyaboronge.

**Zaburi 98** 8.8.8. (L.M.)

Zaburi.

- 1 Inwe terera Yehova  
'gotera kore okoyia,  
ekiagera okorire  
amang'ana y'ogokumia;  
  
'Koboko kwaye gw'okorio,  
boigo okoboko kwaye  
'gochenu, kwamonyoreire  
obobui obonene.

- 2 Nyasae omanyekanirie ogotooreka kwaye; na oorokirie oboronge bwaye ase ebisaku.
- Oorokirie oboronge bwaye maiso marore 'se amaiso y'abanto bare korwa ase ebisaku.
- 3 Oinyoire 'mabera aye boigo obwegenwa bwaye na ekeene gochia 'se enyomba ya Israeli;
- Ne chinsinyo chi'Ense chionsi chiarorire 'gotooreka okwo kore korwa ase Omonene Nyasae oito.
- 4 Ense yonsi, aka 'riogi ri'omogoko 'se Yehova; aka 'riogi rinene na goka; tera ogotogia.
- 5 Terera Yehova ase okobugia obokano, as' okobugia 'bokano, na eriogi ria zaburi.
- 6 N'ebirombeta n'eriogi ri'egetureri, moake 'riogi ri'omogoko bosio bw'Omonene, Omoruoti.
- 7 Tiga enyancha na bionsi bimenyete ime yaye birume; na boigo Ense na biria bimenyeteo.
- 8 Na tiga chitoigo chiake chinkobi; na boigo tiga 'bitunwa bigoke amo
- 9 as' obosio bw'Omonene; Naki ere ngocha are konachera Ense 'kina;
- amaene nanachere Ense 'kina n'oboronge;
- Nabanachere abanto ekina ase enhera etari gwanchereria, ee, ngocha are gokora bo.
- Zaburi 99** 8.8.8.8. (L.M.)
- 1 Omonene ere nigo akogamba; ase igo tiga abanto baiguswe; tiga barabwo baiguswe.
- Na nigo aikaransete egati y'abakerubi; tiga Ense etinane na tiga etengechigwe.
- 2 Omonene nomonene aaria Sayoni; na ere oimokererigwe 'goro kobua abanto bonsi.
- 3 Tiga abanto batogie erieta riao rinene na eri'okoiroka, naki eri nerichenu mono.
- 4 Ne chinguru chi'omoruoti nigo chianchete ekina; nigo ogokong'ia 'kina 'tari gwanchereriaconde.
- Nigo ogokora 'kina n'oboronge 'se Yakobo.
- 5 Imokereria igoro Omonene Nyasae oito;
- Inwe mosasime ase egeten iki'amagoro aye, ekiagera ere nigo are omochenu.

- |  |   |
|--|---|
| <p>6 Musa na Aaroni ase<br/>'gati y'abakuani baye<br/>bakarangeria Yehova,<br/>ere akabairaneria;<br/><br/>Na Samweli as' egati<br/>y'abarangereti 'rieta<br/>riaye, namorangeretie,<br/>Nyasae akamoiraneria.</p> | <p>3 Inwe abanto, manya ng'a<br/>Omonene nere Nyasae.<br/><br/>Nere ototonete, na<br/>tari intwe abanyene.<br/>Ntore abanto baye ne<br/>ching'ondi chie riicho riaye.</p> |
| <p>7 Agakwana asebare<br/>ase esiiro ye riire;<br/>na barabwo bakarenda<br/>oborori bwaye bwonsi;<br/><br/>Ee, barabwo bakarenda<br/>omoyega abaete.</p>   | <p>4 Soa 'se eblita biaye;<br/>mo-ake ng'a mbuya mono;<br/>na ase okomotogia,<br/>soa 'se chigoora chiaye.<br/><br/>Mo-ake ng'a mbuya mono<br/>asare; morisesenie</p>     |
| <p>8 Omonene Nyasae oito,<br/>aye okabairaneria.<br/><br/>Aye inkwarenge Nyasae<br/>okabaa amabera; ko<br/>okabaa egesiomba 'se<br/>engencho y'amabe abo.</p>  | <p>5 erieta riaye 'kiagera<br/>Yehova nere omuya.<br/><br/>Obwanchani bwaye nobwa<br/>kare na kare; 'bwegewa<br/>bwaye mbogendererete<br/>ebiaare ase ebiaare.</p>        |

**Zaburi 100**      8.8.8.8. (L.M.)  
Zaburi y'ogotogia.

- |  |  |
|--|--|
| <p>1 Aka 'riogi ri'omogoko<br/>'se Yehova, inwe 'banto</p>   | <p>1 Inche nintere igoro<br/>y'amabera na ekina;<br/>aye Omonene Nyasae,<br/>nintere gocha asore.</p>  |
| <p>2 b'Ense yonsi: mokorere<br/>Omonene n'omochengo.<br/><br/>Inwe inchuo bosio bwaye<br/>ase okomoterera.</p> | <p>2 Ninkore as' obong'aini<br/>na ase enchera ere<br/>eng'ikeranu. Ndiriri<br/>aye orache asende?<br/><br/>Nintaare ime y'enyomba<br/>yane imbivate enkor<br/>ere eng'ikeranu, ee,<br/>nintaare as' oboene.</p> |
|  | <p>3 Tinkoba nkobeka gento<br/>kende gionsi kere bosa<br/>bosio bw'amaiso aane, ee,<br/>tinkobeka nonya ng'ake.</p>  |

**Zaburi 101**      8.8.8.8. (L.M.)  
Zaburi ya Daudi.

- |   |  |
|---|--|
| <p>1 Inche nintere igoro<br/>y'amabera na ekina;<br/>aye Omonene Nyasae,<br/>nintere gocha asore.</p> | <p>2 Ninkore as' obong'aini<br/>na ase enchera ere<br/>eng'ikeranu. Ndiriri<br/>aye orache asende?<br/><br/>Nintaare ime y'enyomba<br/>yane imbivate enkor<br/>ere eng'ikeranu, ee,<br/>nintaare as' oboene.</p> |
|   | <p>3 Tinkoba nkobeka gento<br/>kende gionsi kere bosa<br/>bosio bw'amaiso aane, ee,<br/>tinkobeka nonya ng'ake.</p>  |

- Ningechete ogokora  
kw'abakogenda ensem;  
korokwo tigokonyara  
gokombwaterera inche.
- 4 Enkoro enkorekanu  
nebe gekorwa asende;  
boigo inche tinkomanya  
omonto omosareku.
- 5 Inche nimokiri-kiri  
onde bwensi ogokwana  
bobisi mamincha y'oria  
ore omoamate oye.  
  
Tinkoremereria 'monto  
omoenenu naboigo  
omweanchi; ere nigo  
are omwerigereria.
- 6 Amaiso aane nabe 'se  
abwo bare abegenwa  
b'ense, erinde barabwo  
bamenye amo na-inche.  
  
Oria oyogotaara 'se  
enchera eng'ikera  
na as' enchera endonge,  
ere nankorere inche.
- 7 Omonto oyogokora  
obong'ainereria, ere  
takomenya nonya ng'ake  
as' enyomba yane ime.  
  
Na ere oyogoteba  
oborimo takobeera  
as' obosio bwane gose  
takoba ogokong'igwa.
- 8 Ninsarie bwango ababe  
b'ense bonsi, nimbanache  
'basareku bonsi korwa  
as' omochie bw'Omonene.
- Zaburi 102** 8.6.8.6. (C.M.)  
Ogosaba kw'omochandeku, ekero  
abuirwe, na akoumora okwemurungania  
kwaye bosio bw'Omonene.
- 1 Aye Omone, igwa  
ogosaba kwane;  
tiga okorera kwane  
go-ike asore.
- 2 Tobisa obosio bwao  
korwa 'sende ase  
rituko ekero inde  
ase emechando.  
  
Ko tegereria ogoto  
kwao gocha 'sende;  
'se rituko nkangereria,  
ng'iranerie bwango.
- 3 Naki amatuko aane  
a-erire buna  
erioki, na amauga  
aane nkoyia are.  
  
Ee, aro nigo akoyia  
buna aase 'riko.
- 4 Enkoro yane yaakirwe  
na yasusanire;  
  
Ee, ero yasusanire  
buna obonyansi,  
egera inyeba koria  
omogati one.
- 5 'Riogi ri'okweumia kwane  
riayabwatanirie  
amauga aane gochia  
'se risankwa riane.
- 6 Na nigo inga enyoni  
etachenegeti  
eyio emenyete aase  
aria y'orosana.  
  
Na buna enyakweumia  
eyio emenyete

- as' erooro ime, nabo  
inche inde boigo.
- 7 Nigo indendete, buna  
egesingororo  
ekio giatigirwe gioka  
kerama igoro.
- 8 Ababisa baane nigo  
bagonchecheria na  
kondentera obosooku  
omobaso boira.  
  
Abwo bangechete mono  
nigo bagotiana  
mamincha yane na nigo  
bakondagereria.
- 9 Naki nigo nkoria ribu  
buna omogati;  
nasang'anirie 'kenyugwa  
kiane n'amariga,
- 10 As' engencho y'endamwamu  
n'okobea kwao.  
Naki kwanyimokereirie  
na konduta inse.
- 11 Amatuko aane nigo  
anga 'morengari  
okeire; boigo nomire  
buna obonyansi.
- 12 Korende, aye Yehova,  
nobeo botambe,  
boigo okoinyorwa kwao  
as' ebiaare bionsi.
- 13 Notenene, ororere  
Sayoni 'mabera,  
naki engaki y'ogwancha  
Sayoni yaikire.  
  
Ee, engaki yachigetwe  
yaikire kegima.
- 14 Naki abasomba bao  
nigo bagogete,
- Nigo bagogete ase  
amagena aye;  
nigo bare n'amabeebe  
as' orotu rwaye.
- 15 Na ebisaku mbiiroke  
erieta ria Nyasae,  
n'abaruoti bonsi b'Ense  
obonene bwao.
- 16 Naki Yehova naagache  
Sayoni naende;  
narorekaneo ase  
obonene bwaye.
- 17 Nategerere 'gosaba  
kw'abaremerwa, na  
tagochaya ogosaba  
kwabo nonya ng'ake.
- 18 Aya narikwe gochia 'se  
ekiaare kegochia-  
gocha, nabwo baratongwe  
mbatogie Yehova.
- 19 Naki korwa obotambe  
bw'aase aye are  
aachenu, Yehova nigo  
aroche inse aa.  
  
Korwa 'se Igoro nigo  
arigereretie
- 20 inse Ense, erio aigwe  
'riogi ri'okweumia,  
  
Okweumia kw'omosibwa;  
boigo asibore  
abwo konya banacheirwe  
ekina ki'ogokwa.
- 21 Mbararie 'rieta ria Nyasae  
ime ya Sayoni  
n'ogotogia kwaye ime  
ya Yerusalem,
- 22 Ekero ekio abanto  
amo n'amaruoti

barasangererekane  
gokorera Nyasae.

23 Ere okeeirie chinguru  
chiane as' enchera,  
na bweng'eirie amatuko  
y'obogima bwane.

24 Ingakwana: Nyasae one,  
tondusia ekero  
inde as' egati-gati  
yamatuko aane.

Aye Yehova, emiaka  
yao tekoera;  
negendererete ase  
ebigori bonsi.

25 Agwo korwa kare, aye  
nigo kwabegete  
oboroso bw'Ense; aye  
inkwabokong'etie.

Na amaene igoro  
chionsi nigo chire  
emeremo gwakorete  
n'amaboko ao.

26 Birobio bonsi mbisire,  
ko aye nobeo  
goika kare na kare;  
nobeo botambe;  
  
Ee, bonsi mbigote buna  
eanga; na buna  
eganchwa nobionchore, na  
mbionchorwe kegima.

27 Korende aye botambe  
naye oria oria;  
na emiaka yao ero  
teri n'omoerio.

28 'Bana b'abasomba bao  
mbagenderere; na  
bosio bwao ororeria  
rwabo ndokong'igwe.

**Zaburi 103**

Zaburi ya Daudi.

8.8.8. (L.M.)

1 Omoyo 'ne, mosesenie  
Yehova; na bonsi ebio  
bire ime yane, togia  
erieta riaye richenu.

2 Omoyo 'ne, mosesenie  
Omonene; na tobaisa  
kweba aye ebitoki  
biaye bonsi bi'amakumia.

3 Noyogokwabera aye  
obobe bwao bwonsi na  
noyogokogwenia aye  
amarwaire ao onsi;

4 Noyokobooria 'bogima  
bwao korwa as' engoro;  
akobekera egutwa  
y'obwanchani n'amabera.

5 Noyogoisanekia 'monwa  
oo n'obuya; naboigo  
'bosae bwao bwakorwa  
'boyia buna obw'ensoti.

6 Omonene Nyasae nere  
ogokora oboronge  
na orua ebina ase  
bonsi abwo bakomigwa.

7 Ere akamanyekania  
chinchera chiaye 'se Musa  
n'ebikoro biaye ase  
abana ba Israeli.

8 Nyasae nomonyamabera,  
nobw'eneema, nomong'ora  
as' endamwamu, na nigo  
are n'obwanchani 'bonge.

9 Tari kwomana botambe;  
gose takogenderera  
as' ekeririanda kiaye  
goika kare na kare.

- 10 Taratokorera buna  
'bibe biaito biganeirie,  
gose taratoa buna  
ogosaria gwaito kore.
- 11 Na buna Igoro ere  
igoro mono korwa 'se  
Ense, nabo amabera  
aye aro are igo.  
  
Amabera aye, boigo  
obwanchani bwaye, nigo  
bire ebinene gochia  
ase abamoirogete.
- 12 Buna moocha ere aare  
korwa bosongo, naboigo  
akorusia ogosaria  
gwaito korwa asetore.
- 13 Boigo koreng'ana buna  
ise abana akoba  
n'amabeebe asebare,  
naboigo Yehova are.  
  
Yehova nigo akoba  
n'amabeebe gochia ase  
abanto bamoirogete,  
nonya nabamosigete.
- 14 Naki nigo amanyete  
buna totongire; boigo  
ere nigo akoinyora  
ng'a nigo tore orotu.
- 15 As' omonto, amatuko  
aye namake are na  
nare buna obonyansi,  
boigo nare buna riuga.  
  
Riuga erio ri'omogondo
- 16 nigo rikoreereta, ko  
erio embeo yaeta  
igoro yaye, riaeta.  
  
Ee, riaeta; aase aaria  
riarenge riabora; erio
- takorinyora naende  
as' engaki ende yonsi.
- 17 Ko korwa kare na kare  
goika kare na kare,  
'mabera a Nyasae nare  
ase abamoirogete.  
  
Boigo oboronge bwaye  
nigo bogendererete  
ase abana b'abana  
ba baria bamoirogete,
- 18 Ase abwo bakorenda  
'kobwatana kwaye, nase  
abakoinyora 'machiko  
aye erio bayakore.
- 19 Omونene okong'irie  
ekerogo kiaye aaria  
Igoro, na oboruoti  
bwaye mbogambe 'se bionsi.
- 20 Mosesenie Omونene,  
inwe 'bamalaika baye,  
abwo more ne chinguru  
na okobua okonene.  
  
Inwe aba mogokora  
amachiko aye, inwe  
aba mokoigwa eriogi  
riria rie ring'ana riaye.
- 21 Inwe emeganda yaye  
yonsi, sesenia Yehova;  
nainwe abasomba baye,  
mogokora 'gwancha kwaye.
- 22 Sesenia Yehova, inwe  
emeremo yaye yonsi,  
eyio ere kera aase  
agwo ase akogamba.  
  
Na aye omoyo one,  
mosesenie Omونene.  
Ee, aye omoyo one,  
mosesenie Omونene.

**Zaburi 106**

8.8.8.8. (L.M.)

- 1 Inwe abanto, motogie  
Yehova; inwe abanto,  
mo-akere Omonene  
Nyasae ing'a mbuya mono,  
Naki Yehova nomuya;  
naki amabera aye  
nigo agendererete  
go-ika kare na kare.
- 2 Inee, ning'o orakwane  
ogokora kw'obobui  
bwa Nyasae, gose koraria  
ogotogia kwaye gwonsi?
- 3 Imbasesenirie abwo  
bakorenda ebina, na  
ere oria ogokora  
'boronge chingaki chionsi.
- 4 Aye Omonene Nyasae,  
ong'inyore n'obwanchani  
obwo okoorokia ase  
abanto bare abao;  
Ntaarere n'ogotooreka  
kwao, aye Omonene,
- 5 erinde ndore obuya  
bw'abanto bao 'bachore;  
Erinde ingoke ase  
omogoko bw'egesaku  
kiao, na nyetogie amo  
n'abanto b'omwando oo.
- 6 Nigo twakorire 'bibe  
ne chisokoro chiaito, na  
nigo twakorire 'bobe,  
twakorire 'bosareku.
- 7 Bori chisokoro chiaito  
tichiayarengereretie  
amakumia gwakorete  
aaria ime ya Misiri;
- Boigo tichia-inyorete  
'bonge bw'amabera ao;  
ko tichiaigwerete aaria  
as' Enyancha Embariri.
- 8 Nonya naboigo Yehova  
agachitooria 'se 'ngench  
y'erieta riaye, erinde  
ararie okobua kwaye.
- 9 Boigo agatogonyera  
Enyancha Embariri na  
egakamokigwa; igo  
akabaraa 'se chindiba;  
Akabaraa goetera  
chindiba chintambe, buna  
ndiria chiarenge erooro  
etari n'amache ande.
- 10 Na akabatooria korwa  
ase okoboko kw'oria  
obagechete, ee, korwa  
ase oyobagechete.  
Akababooria korwa 'se  
okoboko kw'omobisa.
- 11 Na amache agatuba  
ababisa baria babo.  
Igo monto onde obo
- 12 tatiqarete. Na erio  
bakegena amang'ana  
aye, na bakamotogia.
- 13 Ase obwango barabwo  
bakeba 'meremo yaye;  
barabwo tibaganyete  
ase obosemia bwaye.
- 14 Ko bagakogania mono  
okogania aaria ase  
erooro, na bagateema  
Nyasae agwo as' erooro.
- 15 Akabaa ogosorora  
kwabo; ko ase emiyo

- yabo ere agatoma  
oboreu 'bonge mono.
- 16 Na bakarorera Musa  
ribero as' egetwori,  
naboigo ase Aaroni,  
omochenu bw'Omonene.
- 17 Riroba rikaigoka na  
rikamera Datani, na  
rigatuba ekecombe  
ki'omoganda bw'Abiiramu.
- 18 Na omorero ogoka  
ase ekecombe kiabo;  
na ogwoka kogasamba  
abasareku kegima.
- 19 As' Horebu bakaroisia  
omogwekano bw'emori  
oyobombire n'ekioma,  
na kayosasimao.
- 20 Igo bagaonchoreria  
obonene bwabo gochia  
as' omogwekano bw'eeri  
eyekoria obonyansi.
- 21 Barabwo bakeba Nyasae,  
Omotooria obo, oyio  
okorete amang'ana  
'manene aaria Misiri,
- 22 Emeremo y'ogokumia  
ase ense ya Hamu, na  
amang'ana y'okoirokia  
as' Enyancha Embariri.
- 23 Ase igo agakwana  
ng'a nabasirie, korende  
Musa omochore oye  
akagenda bosio bwaye;  
  
Agatenenao ase  
ogwatananeka, erio  
aonchore endamwamu  
yaye, erio tabasiria.
- 24 Ee, barabwo bagachaya  
ense eria engiya, na  
tibegenete ring'ana  
riaye gose eira yaye.
- 25 Ko bakemurungania 'se  
chiema chiabo, na barabwo  
tibaritegererete  
'riogi ri'Omonene Nyasae.
- 26 Igo akaimokereria  
igoro 'koboko kwaye  
mamincha yabo, erinde  
abaiyerie as' erooro,
- 27 Na arotugute inse  
ororeria rwabo ase  
egati y'ebisaku, na  
arosiare 'se chinse.
- 28 Na bakabwatana gochia  
ase Baali-Peori na  
bakaria ebing'wanso bie  
chinyasae chitari moyo.
- 29 Igo bakamogechia 'se  
endamwamu n'emeremo  
yabo, na erio amaakwa  
agatuboka 'sebare.
- 30 Erio Finehasi, ere  
agatenena na bwango  
agakora boronge, na  
igo 'maakwa agatangwa.
- 31 Boigo ogokora okwo  
gokabarwa oboronge  
asare, nonya ngochia 'se  
'bigori bionsi botambe.
- 32 Na bakamogechia Nyasae  
as' amache a Meriba,  
erio ekabeera Musa  
bobe as' engencho yabo,
- 33 Naki bagechetie 'moika  
o Musa, na agakwana

- as' ogotarengereria  
buya n'ebikoba biaye.
- 34 Barabwo tibasareti  
ebisaku buna Nyasae  
konya abachikire, ee,  
bori tibakorete bo.
- 35 Ko imbasang'ananete  
amo n'ebisaku ebio,  
na bakeorokereria  
ogokora kwabo 'kobe.
- 36 Naboigo bagokorera  
'megwekano yabo, eyio  
yabete egesugunia  
n'oboreba asebare.
- 37 Bakarua abana babo,  
abamura n'abaiseke  
boigo, koba ebing'wanso  
gochia ase ebirecha.
- 38 Na bagaitera 'manyinga  
atarenge na komocha,  
amanyinga y'abamura  
babo n'abaiseke babo,  
  
Ayio baruete 'bing'wanso  
gochia 'se emegwekano  
ya Kanani; igo ense  
'gasarigwa n'amanyinga.
- 39 Ase ayio goetera  
ase ogokora kwabo  
bagesoyia as' enhera  
embe y'ogotacheneka,  
  
Na barabwo bagakora  
obonyaka obonene,  
ee, bagatayaya ase  
ogokora kwabo 'kobe.
- 40 Na igo endamwamu ya  
Nyasae egoka mamincha  
y'abanto baye, na ere  
akagecha omwand' oye.
- 41 Na akabarua gochia 'se  
okoboko kw'ebisaku;  
na baria babagechete  
bakabagambera boigo.
- 42 Boigo ababisa babo  
bakabamiga; naende  
bakabugwa bakabekwa  
inse y'okoboko kwabo.
- 43 Chingaki chinyinge, Nyasae  
akabatooria, korende  
barabwo bakamogechia  
ase obosemia bwabo.  
  
Barabwo bakamogechia  
n'obosemia bwabo, erio  
bakarentwa inse ase  
engencho y'obobe bwabo.
- 44 Nonya naboigo Yehova  
nabechanderete ase  
'mechando yabo, ekero  
aigwete 'kerero kiabo;
- 45 Akainyora 'kobwatana  
kwaye as' engencho yabo,  
agaonchoka 'se 'ngench  
y'eneema yaye enene.
- 46 Boigo ere akagera  
bakarorerwa 'mabeebe  
nabwo bonsi babairete  
koba abasibwa babo.
- 47 Aye Omonene Nyasae  
oito, ototoorie intwe,  
naboigo tosangererie  
korwa ase ebisaku,  
  
Erio to-ake ng'a mbuya  
mono as' erieta riao  
richenu, boigo twetogie  
ase ogotogia kwao.
- 48 Asesenigwe Yehova,  
Nyasae o Israeli, ee,

oyore korwa kare na  
goika kare na kare.  
  
Naboigo tiga abanto  
bonsi batebe: Amina.  
Inwe togia Omonene.  
Togia Omonene Nyasae.

- 8 Batogie Yehova ase  
'buya bwaye n'emeremo  
yaye y'amakumia ase  
abana ba mwanyabanto.
- 9 Nigo akoyoisanekia  
'moyo 'bwate okogania  
na oyoigotia n'amaya  
omoyo ore n'enchara.
- 10 'Banto bamenyete ase  
omosunte omonene,  
abwo bamenyete ase  
ekiriri ki'amakweri,  
  
Abwo basibire ase  
emechando emerito,  
abwo basibire ase  
chinyangataare chi'echuma,
- 11 Naki mbabete mamincha  
y'amang'ana y'Omonene,  
mbachayete obosemia  
bw'Oyore Igoro Mono,
- 12 Akarenta 'nse chinkoro  
chiabo ase emeremo  
y'obokong'u; bakawa 'nse;  
tibabwate omokonyi.
- 13 Na bakarera Yehova  
ase emechando yabo,  
na akabatooria korwa  
ase obokong'u bwabo.
- 14 Akabuna chingataare  
chiabo na akabarusia  
korwa ase omosunte  
n'ekiriri ki'amakweri.
- 15 Batogie Yehova ase  
'buya bwaye n'emeremo  
yaye y'amakumia ase  
abana ba mwanyabanto,
- 16 Naki nabunete 'biita  
bi'etaai, akabutora

**Zaburi 107**

8.8.8.8. (L.M.)

- 1 Togia Omonene, naki  
nomuya; na amabera  
aye nagendererete  
go-ika kare na kare.
- 2 Tiga ababoorigwe na  
Yehova bakwane igo,  
abwo abooririe korwa  
'se 'koboko kw'omobisa.
- 3 Obasangereirie korwa  
ase chinse chionsi, korwa  
moocha, bosongo, sugusu  
naboigo korwa irianyi.
- 4 Bagaetanana ase  
erooro, ase enhera  
etare; tibanyorete  
'mochie 'se baare komenya.
- 5 Nigo babete n'enchara  
na erang'o ekabaria;  
emioyo yabo ekaba  
ekogoya ime yabo.
- 6 Na bakarera Yehova  
ase emechando yabo,  
na akabatooria korwa  
ase obokong'u bwabo.
- 7 Erio ere akabaraa  
ase enhera endonge  
go-ika bagaika agwo  
as' omochie bw'okomenya.

- chichuma chiria chi'ekioma  
chikaba ebing'ese pi.
- 17 'Banto abariri ase  
'ngencho y'ogosaria kwabo  
na as' engencho y'ebibe  
biabo bachandirwe mono.
- 18 Na emiyo yabo nigo  
ekogecha chindagera  
chionsi, na nigo bagoika  
as' ebiita bi'amakweri.
- 19 Na bakarera Yehova  
ase emechando yabo,  
na akabatooria korwa  
ase obokong'u bwabo,
- 20 As' ogotoma ring'ana  
riaye akabagwenia na  
akabatooria korwa 'se  
'gosirigwa kwabo gwonsi.
- 21 Batogie Yehova ase  
'buya bwaye n'emeremo  
yaye y'amakumia ase  
abana ba mwanyabanto,
- 22 Na tiga barue 'bing'wanso  
bi'ogoaka ng'a mbuya mono,  
na bararie emeremo  
yaye yonsi n'omochengo.
- 23 Abakogenda maate 'se  
enyancha ase chimeeri,  
as' ogokora 'meremo  
ase amache amange,
- 24 Aba nigo bakorora  
emeremo y'Omonene  
n'amakumia aye ase  
chindiba chi'amache ime.
- 25 Naki nigo agochika  
na koimokereria 'goro  
embeo entindi eyio  
ekoimokia emerindo.
- 26 Nigo bakogenda gochia  
igoro, barabwo nigo  
bakogenda inse mono  
ase chindiba chi'enyancha.  
Na emiyo yabo nigo  
ekogoya ime yabo  
na yanyitoka mono  
as' engencho y'emechando.
- 27 Buna omotindu, nigo  
bagotinana-tinana,  
bakoiguswa; obong'aini  
bwabo nigo bokoera.
- 28 Na bakarera Yehova  
ase emechando yabo,  
na akabatooria korwa  
ase obokong'u bwabo.
- 29 Nigo agotoereria  
ekembugu-mbugu, erio  
'merindo yonsi y'enyancha  
yatoerera kegima.
- 30 Erio bakagoka ase  
'ngencho y'ogotoerera;  
igo akabarenta 'se  
'kiambokero baganetie.
- 31 Batogie Yehova ase  
'buya bwaye n'emeremo  
yaye y'amakumia ase  
abana ba mwanyabanto.
- 32 Tiga bamobake ase  
omosangererekano  
bw'abanto, na bamotogie  
'se 'moganda bw'abagaaka.
- 33 Ere nigo agoonchora  
chindooche chiaba erooro;  
boigo oonchora chinsoko  
chionsi chiaba ense 'nyomo,
- 34 Naende ense entobu  
yaba ey'omonyo 'monge

- as' engencho y'ogosaria  
kw'abanto bamenyeteo.
- 35 Ere nigo agoonchora  
erooro yaba ritibo;  
na oonchora ense 'nyomo  
yaba chinsoko chi'amache.
- 36 Na nigo akobamenyia  
abanto b'enchara agwo,  
erinde baagache 'mochie  
aroro agwo bamenye,
- 37 Na babusure 'megondo  
na barabwo basimeke  
emesabibu, banyore  
okwama 'konene mono.
- 38 Nigo akobasesenia  
na obabuchia mono, na  
tagotiga omobaro  
bwe chitugo chiabo okee.
- 39 Erio nigo bagokeeigwa  
naboigo barentwa inse  
as' engencho y'okomigwa,  
emechando n'obororo.
- 40 Na nigo ako-umora  
ogochaya gochia ase  
abanene b'abanto, ee,  
as' abanene b'abanto.  
  
Na abaetanania 'se  
erooro, aroro agwo  
ase enchera etari  
nonya ng'ake asebare.
- 41 Korende Yehova ere  
nigo akoiokereria  
omonto omoremerwa  
korwa ase emechando.  
  
Omonene ere nigo  
akomobucheria mono  
chiamate chiaye na igo  
chiamenteka buna riicho.
- 42 Erio abanyaboronge  
mbayarore na kogoka;  
naboigo obobe bwonsi  
mbosieke omonwa oye.
- 43 Ning'o ore omong'aini?  
Tiga ayarengererie  
aya. Na igo mbamanye  
obwanchani bw'Omonene.

**Zaburi 108**

8.8.8.8. (L.M.)

Ogotera gose Zaburi ya Daudi.

- 1 Aye Yehova, enkoro  
yane nigo ekong'irie;  
na nintere na gotogia,  
nonya n'obonene bwane.
- 2 Boka, ekerigisa na  
obokano; ee, nimboke  
inche omonyene ase  
engaki bogokia moka.
- 3 Omonene, ningotogie  
as' egati y'abanto, na  
ningoterere 'gotogia  
as' egati y'ebisaku;
- 4 Naki amabera ao  
namanene goetania  
igoro, na ekeene  
kiao nkeigete amare.
- 5 Aye Nyasae, goetania  
igoro eimokererie;  
beka obonene bwao  
igoro as' Ense yonsi.
- 6 Tooria n'okoboko kwao  
gw'okorio na ng'iranerie,  
erinde abanto bare  
'banchwa bao batoorigwe.
- 7 Nyasae okwanire ase  
obocheni bwaye: Inche

- ningoke, inche ninchenge;  
ninyatanane Sekemu;
- Obotambe bw'omwenya o  
Sukoti inche nindenge.
- 8 Gileadi neyane, boigo  
Manase nero neyane;
- Na Efraimu ne chinguru  
chi'omotwe one; na Yuda  
nere omorua 'machiko  
aane as' engencho yane.
- 9 Na Moabu negetaabo  
kiane; na egekoroto  
kiane nindute igoro  
aaria as' ense y'Edomu;
- Goetera ase ense  
ya Filisti ningende na  
inche ning'ake eriogi  
ri'obobui obonene.
- 10 Ning'o orandete ase  
omochie okong'irie? Na  
ning'o orandaee gochia  
ase ense ya Edomu?
- 11 Inee, tari aye Nyasae  
oyio orandaee? Nonya  
konya gwatotugutire  
as' engaki yaetire.  
  
Inee, tari aye Nyasae  
oyio orandaee? Nonya  
konya aye toragenda  
bosio bw'abarwani baito.
- 12 Toe ogokonywa korwa  
ase emechando, naki  
'gokonywa kwa mwanyabanto  
nigo kore bosa bosa.
- 13 Ntokore as' obobui  
goetera Nyasae, naki  
nere oratiriringere  
inse ababisa baito.
- Zaburi 110** 8.8.8. (L.M.)  
Zaburi ya Daudi.
- 1 Omonene agatebia  
Omonene one: Aye  
ikaransa aiga ase  
'koboko kwane gw'okorio,  
  
Go-ika inche imbeke  
ababisa bao babe  
egeten iiao kere  
inse y'amagoro ao.
- 2 Yehova natome 'nyimbo  
ye chinguru chiao korwa  
Sayoni. Gamba egati  
y'ababisa bao bonsi.
- 3 Abanto bao imbabe  
bagwancha ase rituko  
ri'okobua kwao; mbabe 'se  
oboseera bw'obochenu.
- Korwa ase okoiborwa  
kwa mambia, na korwa ase  
enda y'ogokia, 'basae  
bao mbabe buna riime.
- 4 Omonene omonyene  
otianire na orure  
oborori bwaye; ere  
tagoonchoka nonya ng'ake:  
  
Naye ore omokuani  
go-ika kare na kare,  
koreng'ana n'obokuani  
obwo bwa Melkizedeki.
- 5 Omonene omonyene  
nigo agendererete  
koba ase okoboko  
kwao gw'okorio botambe;
- Nasenyente abaruoti  
'se rituko ri'endamwamu
- 6 yaye. Ere nanachere  
'banto b'ebisaku 'bina;

- |   |  |
|---|--|
| <p>Na naichorie kera aase<br/>n'emebere ekwete na<br/>nasenyente abagambi<br/>be chinse chinyinge mono.</p> <p>7 Nanywe korwa as' orooche<br/>as' enchera; ase igo<br/>nabe okoimokereria<br/>omotwe oye igoro.</p>   | <p>6 Na okobua kw'emeremo<br/>yaye oorokirie 'banto<br/>baye, ng'a nae omwando<br/>bw'ebisaku asebare.</p> <p>7 Amachiko aye onsi<br/>nay'obwegenwa; egasi<br/>y'amaboko aye nere<br/>ekeene n'oboronge.</p>   |
| <p><b>Zaburi 111</b>      8.8.8.8. (L.M.)</p> <p>1 Inwe togia Omonene.<br/>Ee, nintogie Omonene<br/>n'enkor yane yonsi 'se<br/>omosangererekano;<br/><br/>Nimotogie Omonene,<br/>agwo ase ekeombe<br/>ki'abant bare boronge<br/>ime ye chinkoro chiabo.</p> <p>2 Ogokora kw'Omonene<br/>nigo kore okonene,<br/>gokorigigwa na baria<br/>bonsi bagokogokera.</p> <p>3 Ogokora kwaye nigo<br/>kore okw'amasikani;<br/>boigo ogokora okwo<br/>inkore okw'obonene.<br/><br/>Boigo oboronge bwaye<br/>nigo bogendererete<br/>goika kare na kare;<br/>mbobeo kogenderereta.</p> <p>4 Okorire emeremo<br/>yaye eyio y'ogokumia<br/>koinyorwa; Nyasae naichire<br/>n'amabeebe na eneema.</p> <p>5 Oire abamoirogete<br/>endagera; na nainyore<br/>okobwatana kwaye, ee,<br/>goika kare na kare.</p> | <p>8 Amachiko aye nigo<br/>akong'irie botambe; na<br/>nigo agokoreka 'se<br/>ekeene n'oboronge.</p> <p>9 Otomire okobooria<br/>gochia as' abanto baye;<br/>ochikire 'kobwatana<br/>kwaye kobeo botambe.<br/><br/>Na erieta riaye nigo<br/>rire richenu, rirorio<br/>ndire eri'amasikani<br/>na eri'okoirokwa mono.</p> <p>10 Okoiroka Omonene<br/>nigo kore 'mochakano<br/>bw'obong'aini; nigo kore<br/>'mochakano bw'obong'aini.<br/><br/>Na bonsi abakorenda<br/>amachiko aye nigo<br/>babwate obomanyi, ee,<br/>'bomanyi bore obuya.<br/><br/>Ogotogia kwaye nogwa<br/>kare na kare, na nkore<br/>goika kare na kare.<br/>Nigo kogendererete.</p> |
- Zaburi 116**      8.6.8.6. (C.M.)
- 1 Ninyanchete Omonene  
ekiagera ere  
oigure eriogi riane  
n'amasabo aane.

- 2 Nimirangerie ekero  
inde moyo, naki  
ere oonchoire ogoto  
kwaye gocha 'sende.
- 3 Ebisibo bi'amakweri  
bikang'etanana;  
n'obororo bwa Cheanamu  
bokanyora inche:  
  
Inkanyora emechando  
n'omoichano boigo.
- 4 Erio nkarangeria 'rieta  
ri'Omonene Nyasae:  
  
Yehova, nagosoroire,  
tooria omoyo 'ne.
- 5 Nyasae nomonyaboronge  
na noyo bw'eneema.  
  
Nyasae oito nigo are
- 6 n'amabera. Nyasae  
nigo akorenda abwo  
batari 'bang'aini.  
  
Inche nigo narentetwe  
inse mono ase  
emechando, na Yehova  
agantooria inche.
- 7 Omoyo 'ne, irana 'se  
'motimoko oo,  
naki Yehova okoire  
amaya amange;
- 8 Naki nigo gwatooririe  
omoyo one na  
obogima bwane korwa  
ase amakweri,  
  
Na amaiso aane korwa  
ase amariga,  
boigo amagoro aane  
korwa as' okogwa.
- 9 Na nintaare as' obosio  
bw'Omonene Nyasae
- as' ense y'abare moyo;  
nintaare aroro.
- 10 Nigo negenete; ase  
igo nakwanire;  
nigo nachandetwe mono  
na nkamigwa mono.
- 11 Inche nigo nakwanete  
as' obwango bwane:  
Mwanyabanto bonsi nigo  
bare abarimo.
- 12 Ninki indamoiranerie  
Omonene ase  
ebitoki biaye bionsi  
arure asende?
- 13 Ninyimokie egekombe  
ki'ogotooreka na  
indirangerie erieta  
ri'Omonene Nyasae.
- 14 Ase amasio y'abanto  
baye bonsi, bono  
inche ning'ikeranie 'se  
Nyasae chiira chiane.
- 15 As' amaiso y'Omonene,  
ogokwa kw'abanto  
baye abachenu nigo  
kore okwa beene.
- 16 Yehova, nagosoroire  
ekiagera inche  
nomosomba oo; inche  
nomosomba oo,  
  
Na omwana bw'omosomba  
oo omokungu;  
gwansiboire korwa ase  
ebisibo biane.
- 17 Na ning'wanse ekeng'wanso  
ki'ogotogia 'sore,  
na inche nindirangerie  
'rieta ri'Omonene.

- |    |   |   |   |
|----|---|---|---|
| 18 | Ase amasio y'abanto<br>baye bonsi, bono<br>inche ning'ikeranie 'se<br>Nyasae chiira chiane, | 4 | Bono tiga 'bairogete<br>Yehova bakwane<br>ing'a amabera aye<br>nareo botambe.       |
| 19 | 'Se chigoora chi'enyomba ya<br>Nyasae; gati-gati<br>yao, Yerusalem. Ee,<br>motogie Yehova.  | 5 | Engaki eria narenge<br>n'emechando yane,<br>nkarangeria Omونene;<br>akang'iraneria. |

### **Zaburi 117**

8.6.8.6. (C.M.)

- |   |  |
|---|--|
| 1 | Inwe ebisaku bionsi,<br>motogie Yehova;<br>ee, inwe abanto bonsi,<br>mobake Yehova,  |
| 2 | Naki amabera aye<br>n'obwanchani bwaye<br>nigo bire ebinene<br>mono asetore,<br><br>N'ekeene ki'Omonene<br>Nyasae nigo kere<br>go-ika kare na kare.<br>Motogie Yehova. |

Ere akang'iraneria  
boigo akambeka  
aase are aagare na  
ayare aagiya.

- |   |   |
|---|---|
| 6 | Nyasae nare as' ensem<br>yane; tinkoiroka.<br>Ninki 'banto baranyare<br>gokora asende?  |
| 7 | Omonene Nyasae ere<br>nigo are ase<br>ensem yane amo na<br>baria bagonkonya;<br><br>Na nimbe nkona korora<br>okobugwa kw'abwo<br>bare ababisa baane<br>abwo bangechete. |

### **Zaburi 118**

8.6.8.6. (C.M.)

- |   |   |
|---|---|
| 1 | Inwe togia Omونene<br>naki nomuya na<br>boigo amabera aye<br>nareo botambe.       |
| 2 | Bono tiga Israeli<br>ekwane ng'a kare<br>na kare 'mabera aye<br>nagendererete.    |
| 3 | Na bono tiga enyomba<br>y'Aaroni ekwane<br>ng'a 'mabera aye nigo<br>agendererete. |

- |    |  |
|----|--|
| 8  | Imbuya komotamera<br>Yehova kobua<br>kobeka ogosemeria<br>ase mwanyabanto.                         |
| 9  | Ee, mbuya komotamera<br>Yehova kobua<br>kobeka ogosemeria<br>ase abagambi.                         |
| 10 | Chinse chionsi chi'Ense nigo<br>chiang'etananete;<br>korende as' erieta ria<br>Nyasae ninchisirie. |
| 11 | Nigo chiang'etananete,<br>nchiang'etananete,   |

- korende as' erieta ria  
Nyasae ninchisirie.
- 12 Nigo chiang'etananete  
buna chinchoke, ko  
inchiarimetigwe buna  
'morero bw'amagwa;  
  
Ee, nigo chikorimigwa  
buna omorero;  
naki ninchisirie ase  
erieta ria Nyasae.
- 13 Aye nigo gwantwomete  
bokong'u egere  
ingwe, korende Yehova  
ere agankonya.
- 14 Omونene ne chinguru  
chiane n'ogotera  
kwane; naboigo obeire  
'gotooreka kwane.
- 15 Eriogi ri'omogoko na  
eri'ogotooreka  
nigo rire ase chiema  
chi'abanyaboronge.  
  
Na okoboko gw'okorio  
kw'Omonene Nyasae  
nigo kogokora bori  
ase obobui.
- 16 Ee, okoboko gw'okorio  
kw'Omonene nigo  
koimokererie igoro;  
ee, nigoro kore.  
  
Ee, okoboko gw'okorio  
kw'Omonene Nyasae  
nigo kogokora bori  
ase obobui.
- 17 Tingokwa, korende nimbe  
moyo, na nindarie  
ogokora kw'emeremo  
y'Omonene Nyasae.
- 18 Omونene ondongeirie  
bororo, ee, ere  
ondongeirie; ko tanduete  
ase amakweri.
- 19 Inyigorere ebiita  
bi'oboronge; erio  
nsoe imeo na ntogie  
Omonene Nyasae;
- 20 Egeita eke negeita  
ki'Omonene agwo  
ase abanyaboronge  
barasoereo.
- 21 Ningotogie, ekiagera  
aye kwanyigure  
naboigo aye kwabeire  
'gotooreka kwane.
- 22 Rigena riria 'baagachi  
babete bakwanga,  
nario riabeire rigena  
rinene ri'ekoona.
- 23 Oko nogokora kore  
okw'Omonene na  
okore okw'amakumia  
as' amaiso aito.
- 24 Eri nerituko erio  
Nyasae aroisirie;  
tiga intwe togoke na  
tochenge imeo.
- 25 Yehova, nagosoroire:  
Nyasae, tooria bono.  
Ee, nagosoroire: toma  
amagenderero.
- 26 Ere oria oyogocha  
ase erieta ria  
Yehova nasesenirie,  
ee, nasesenirie.  
  
Twabasesenirie inwe  
korwa as' enyomba

- y'Omonene Nyasae; inwe mwasesenekire.
- 27 Nyasae nere Omonene, boigo nere oria oyotobareirie intwe oborabu bwaye.  
Inwe siba ekeng'wanso nechingori gochia ase chingunchara echo chi'egesasimero.
- 28 Aye naye Nyasae one; nimbe nkogotogia; ninkoimokererie 'goro; naye Nyasae one.
- 29 Inwe aka ing'a mbuya mono gochia ase Omonene, ekiagera Yehova nomuya;  
Naki amabera aye nagendererete go-ika kare na kare; nabeo botambe.
- 4 Aye gwatochikire ng'a intwe toyarende mono amachiko ao onsi; ee, toyarende n'omokia.
- 5 Onye ndiria oboeto bwane ne chinchera chiane biare koraagwa gochia 'se amachiko ao onsi!
- 6 Rirorio tingosookigwa ekero nasikire na indabe ndigereretie amachiko ao onsi.
- 7 Ningotogie n'oboronge bw'enkoro, ekero inche ndabe ne-orokereirie 'bina biao bi'oboronge.
- 8 Inche nimbe inkorenda amachiko ao onsi; aye tobaisa gontiga, tontiga inche kegima.

Bethi 8.8.8.8. (L.M.)

**Zaburi 119**

Alefū 8.8.8.8. (L.M.)

- 1 Mbasesenirie abare abaronge as' enchera, abwo bagotaara ase amachiko y'Omonene.
- 2 Mbasesenirie abanto barendete oborori bwaye, abakomorigia ne chinkoro chiabo chionsi.
- 3 Boigo barabwo tibari gokora bobo bonde; na nigo bagotaara ase chinchera chire echiate.
- 9 Inee, naki omosae arachene 'nchera yaye? Ngoetera okoigwera ring'ana riao botambe.
- 10 Nakorigirie n'enkoro yane yonsi; tontiga 'nche ng'ombogane nonya ng'ake korwa 'se amachik' ao.
- 11 Naribisire ring'ana riao as' enkoro yane ime, egere tinkora ebibe mamincha yao.
- 12 Aye Omonene Nyasae, botambe nosesenirie; koranche ng'orokererie amachiko ao onsi.

- |   |  |
|---|--|
| <p>13 Goetera 'se 'bikoba biane, nararirie 'bina biao bionsi ebio bire korwa as' omonwa oo.</p> <p>14 Nagokire as' enchera y'borori bwao buna omonto akogokera obonda bwonsi bw'enibo.</p> <p>15 Nindengererie igoro y'amachiko ao onsi, naende nimbe ngosika chinchera chire echiao.</p> <p>16 Inche nimbe nkwegokia 'se amachiko ao ayio gwachikire; amaene tinkweba ring'ana riao.</p>   | <p>22 Aye rusia korwa 'sende obosooku n'ogochaywa, ekiagera narendire oborori bwao bwonsi.</p> <p>23 Na abagambi b'abantu barabwo baikaransire amo egere bakwane bobo mamincha yane 'nche;</p> <p>Korende inche nomonto ore omosomba oo, nigo inkorengereria igoro y'amachik' ao.</p> <p>24 Oborori bwao nigo bore okwegokia kwane, na borobwo nigo bore buna abasemia baane.</p>  |
| <p>Gimeli            8.8.8.8. (L.M.)</p> <p>17 Kora amaya amange ase omosomba oo, egere imbe moyo na indende ring'ana riao.</p> <p>18 Igora amaiso aane egere inche indore amang'ana y'amakumia korwa 'se amachik' ao.</p> <p>19 Nigo inde omoeti na omogeni as' Ense eye, as' ayio tobaisa kombisa 'machiko ao.</p> <p>20 Omoyo 'ne oro nigo obunekire n'amaiga as' ebina biao ase chingaki chionsi botambe.</p> <p>21 Gwatogonyeire abanto 'berori baragereirie, nonya nabwo batigire kobwatia 'machiko ao.</p> | <p>Daleti            8.8.8.8. (L.M.)</p> <p>25 Ing'a obogima 'boyia koreng'ana ne ring'ana riao, naki omoyo 'ne obwatanire n'orotu.</p> <p>26 Na-orogetie chinchera chiane asore, na nigo kwanyigwete. Ase ayio ng'orokie amachik' ao.</p> <p>27 Nkore imanye enchera y'amachiko ao; erio ninkwanere emeremo yao yonsi y'amakumia.</p> <p>28 Omoyo 'ne okumbirwe as' engencho y'borito; koreng'ana ne ring'ana riao imbeke chinguru.</p> <p>29 Aye rusia korwa 'sende enchera y'borimo, na boigo as' eneema yao ing'a amachiko ao.</p> |

- 30 Nachorire oboeto  
bw'ekeene, na ebina  
biao nabibekire 'se  
obosio bwane botambe.
- 31 Nabwaturie oborori  
bwao; aye Omonene,  
tontiga imbekwe ase  
obosooku nonya ng'ake.
- 32 Inche niminyoke ase  
enchera y'amachik' ao  
ekero oraneneiyie  
enkoro yane, Yehova.
- Hee 8.8.8.8. (L.M.)
- 33 Yehova, ng'orokererie  
enchera y'amachik' ao;  
na ninyarende goika  
as' engaki y'omoerio.
- 34 Aye ing'a obomanyi,  
na nimbwate amachiko  
ao; boigo ninyarende  
n'enkoror yane engima.
- 35 Inkore ingende ase  
oboeto bw'amachiko  
ao, ekiagera agwo  
nao inche inkwegokia.
- 36 Tegereria 'nkoro yane  
ase oborori bwao,  
boigo toyetiga ebe  
n'okogania kwe ribero.
- 37 Onchora amaiso aane  
tarigereria ebinto  
bosa; ing'a obogima  
'boyia as' enchera yao.
- 38 Rikong'ie ring'ana riao  
ase omosomba oo,  
oyio obeire n'omokia  
ase okoiroka kwao.
- 39 Onchora korwa asende  
obosooku bwane obwo  
nyirogete; ekiagera  
ebina biao nebiya.
- 40 Rora, ninganetie mono  
amachik' ao n'omokia;  
ing'a obogima 'boyia  
ase oboronge bwao.
- Keti 8.6.8.6. (C.M.)
- 57 Aye Omonene, aye  
negetari kiane;  
nakwanire ng'a nindende  
amang'ana ao.
- 58 Koreng'ana ne ring'ana  
riao, ing'a 'neema.  
Nkarigia n'enkoror yonsi  
ogwancherwa kwao.
- 59 Nkarengereria chinchera  
chiane; nga-onchora  
'magoro aane gochia 'se  
oborori bwao.
- 60 Inkayerera naboigo  
tinatebanete  
as' okorenda n'omokia  
amachiko ao.
- 61 'Meganda y'abasareku  
ero yang'ibeire,  
korende inche tindeba  
amachiko ao.
- 62 Ase obotuko gati  
inche nimboke na  
ning'ake ng'a mbuya mono  
asore, Yehova.
- Ase engencho y'ebina  
biao bia boronge,  
ning'ake ng'a mbuya mono  
asore botambe.

- 63 Inche nigo imbwataine  
n'abakoirogete  
bonsi, na n'abarendete  
amachiko ao.
- 64 Aye Omonene, Ense  
neichire n'eneema  
yao; ing'orokererie  
amachiko ao.
- Teti 8.8.8.8. (L.M.)
- 65 Aye Nyasae, koreng'ana  
ne ring'ana riao, aye  
gwakoreire omosomba  
oo obuya obonge.
- 66 Ng'orokererie imanye  
kogamba buya na imbe  
n'obomanyi, ekiagera  
negenire 'machik' ao.
- 67 Nyuma ntarachandwa, inche  
nigo nachiete ensembo;  
ko bono narirendire  
ring'ana rire eriao.
- 68 Aye nomuya naboigo  
nigo ogokora buya;  
as' ayio ng'orokererie  
amachiko ao onsi.
- 69 Aberori baroisirie  
'borimo mamincha yane,  
ko nindende amachiko  
ao n'enkoror engima.
- 70 Chinkoro chiabo inchire  
chinoru buna 'bitinya,  
ko inche nigo nkwegokia  
ase amachiko ao.
- 71 Mbuya asende ng'a inche  
inachandetwe, erinde  
ng'eorokererie buya  
amachiko ao onsi.
- 72 Amachiko akorwa 'se  
omonwa oo namaya  
'sende kobua chiribu  
chi'etahabu ne chi'efeta.
- Yodi 8.8.8.8. (L.M.)
- 73 Amaboko ao aro  
nandoisetie na kombomba;  
ing'a okomanya erio  
imanye amachik' ao.
- 74 Ekiagera nsemeretie  
ring'ana riao, abanto  
bakoirogete mbachenge  
ekero bakondora 'nche.
- 75 Yehova, nimanyete ng'a  
'bina biao nebironge,  
naboigo ng'a gwanchandire  
ase obwegenwa bwao.
- 76 Tiga amabera ao  
andemie, koreng'ana ne  
ring'ana riao asende,  
inche omosomba oo.
- 77 Tiga amabeebe ao  
anchichere, erio imbe  
moyo; naki amachiko  
ao nokwegokia kwane.
- 78 Tiga aberori bonsi  
basookigwe, ekiagera  
bankoreire oborimo  
engencho ende etaiyo;  
  
Korende nindengererie  
amachiko ao onsi,  
ee, inche nimbe nkoinyora  
amachiko ao onsi.
- 79 Tiga abakoirogete  
baonchoke gocha 'sende,  
naboigo abamanyire  
oborori obwo bwao.

- 80 Na tiga enkoro yane  
ebe 'tari na komocha  
ase amachiko ao;  
erio inche tinookigwa.
- Kafu 8.6.8.6. (C.M.)
- 81 Omoy' one ogoyire  
as' ogotooreka  
kwao; ko ninsemere  
'se ring'ana riao.
- 82 Amais' aane arosire  
ase okoganya  
ring'ana riao. Ndiriri  
aye orandemie?
- 83 Naki 'nche nabeire buna  
ekerandi ase  
erioki; ko tindayeba  
amachiko ao.
- 84 Amatuko y'omosomba  
oo narenga? Na  
ndiriri orarue 'kina  
as' abagonchanda?
- 85 Aberori bakunyire  
chingoro asende,  
eyio etari koreng'ana  
n'amachiko ao.
- 86 Amachiko ao onsi  
namegenwa; nigo  
bagonchanda bobe ase  
oborimo; nkonye.
- 87 Imbarenge ang'e ase  
ogonsiria ase  
Ense; ko tinatigete  
amachiko ao.
- 88 Inkore omoya ase  
obwanchani bwao;  
igo 'borori bw'omonwa  
oo nimborende.
- Lamedi 8.8.8.8. (L.M.)
- 89 Aye Yehova, ring'ana  
riao nigo riteneine  
bokong'u aaria Igoro  
goika kare na kare.
- 90 Obwegenwa bwao nigo  
bore ase ebigori  
bionsi; gwakong'irie Ense  
nero negendererete.
- 91 Koreng'ana n'ogochika  
kwao mbireo rituko  
eri; naki bionsi nigo  
bire abasomba bao.
- 92 Onye ogochika kwao  
gotabete omogoko  
one, nanga nasirete  
ase emechando yane.
- 93 Tinkweba 'machiko ao,  
naki goetera aro  
kwabong'eire obogima  
oboyia gocha asende.
- 94 Inche nigo 'nde oyoo;  
ntoorie inche, ekiagera  
nabeire nkona-korigia  
'machiko are ayao.
- 95 Abanto abasareku  
bamboereire bansirie:  
korende nindengererie  
oborori bwao bwonsi.
- 96 Narorire omoerio  
bw'oboikeranu bwonsi; ko  
kera ogochika kwao  
nkore okogare mono.
- Memi 8.8.8.8. (L.M.)
- 97 Aa! Inaki inyanchete  
amachiko ao! Nigo

- nkorengereria igoro  
y'aro rituko rigima.
- 98 Kwang'ainirie goetera  
amachik' ao kobua  
ababisa baane, naki  
nare na-inche botambe.
- 99 Ee, nimbwate okomanya  
kobua 'borokia baane  
bonsi, naki oborori  
bwao nkoborengereria.
- 100Na nimanyete amange  
kobua abanto bare  
abagotu, naki nigo  
ndendete amachik' ao.
- 101Natangire amagoro  
aane korwa ase kera  
enchera embe, erinde  
indende ring'ana riao.
- 102Inche tindaba ngoonchoka  
korwa as' ebina biao,  
ekiagera aye nigo  
kwanyorokereirie buya.
- 103Amang'ana ao, naki  
namansu ase ogoncha  
kwane! kobua obooke  
as' omonwa one ime!
- 104Nanyorire obomanyi  
goetera amachiko  
ao; igo ningechete  
kera 'nchera y'oborimo.
- Nuni            8.6.8.6. (C.M.)
- 105Ring'ana riao netaya  
ase amagoro  
aane na oborabu 'se  
oboeto bwane.
- 106Inche natianire, boigo  
ning'ikeranie, ng'a
- nindende ebina biao  
bionsi bia boronge.
- 107Nigo nchandegete mono;  
Omonene, ing'a  
obogima koreng'ana  
nering'ana riao.
- 108Nyasae, koranche anchera  
okorua kw'ogwancha  
kw'omonwa one; ng'orokie  
'bina biao bionsi.
- 109Omoyo 'ne nore ase  
okoboko kwane  
botambe; ko tindi kweba  
amachiko ao.
- 110Ababe bantegeire 'nche  
'boreba, korende  
ting'ombogananeti korwa  
as' amachik' ao.
- 111Nairire 'borori bwao  
buna omwando 'ne  
botambe; enkoro yane  
negokirie nabwo.
- 112Na-egekire enkoro  
yane eikeranie  
amachik' ao botambe,  
go-ika 'moerio.

**Zaburi 121**            8.6.8.6. (C.M.)  
Ogoteri kw'ebitambokero.

- 1 Ninyimokererie 'maiso  
aane gochia ase  
'bitunwa. 'Gokonywa kwane  
ing'ai korarwe?
- 2 Ogokonywa kwane inche  
nigo gokorwa 'se  
Yehova, oyotongete  
Igoro na Ense.

- |   |   |  |
|---|---|--|
| 3 | Tagwancha gotererigwe<br>okogoro kwao;<br>ere oyokorendete<br>tari gosundoka.         | oyio o-agachirwe 'se<br>okobwatanigwa.   |
| 4 | Rora, ere 'yorendete<br>Israeli, ere<br>tari gosundoka rinde<br>na tari korara.       | 4 Agwo nao ebisaku<br>bigotiira gochia,<br>ebio bire ebisaku<br>bi'Omonene Nyasae,       |
| 5 | Nyasae nekiriri kiao<br>ase okoboko<br>kwao gw'okorio; Yehova<br>nomorendi oo.        | Gochia ase oborori<br>bwa Israeli, na<br>goaka ng'a mbuya mono 'se<br>erieta ria Nyasae. |
| 6 | Risase tirikogoaka<br>'kero kia mobaso,<br>n'omotienyi tokogoaka<br>'kero kia botuko. | 5 Ebirogo bi'okonacha<br>ebina mbireo,<br>ebirogo bi'obonene<br>bi'enyomba ya Daudi.     |
| 7 | Omonene nakorende<br>korwa as' amabe<br>onsi; na omoyo oo<br>ere nayorende.           | 6 Sabera Yerusalem<br>ebe n'omorembe.<br>Abagwanchete, barabwo<br>imbagenderere.         |
| 8 | Korwa bono na go-ika<br>kare na kare, ee,<br>nakorende kogosoka,<br>kogosoa boigo.    | 7 Omorembe obe ime<br>ye chindwaki chiao<br>n'ogotoerera kobe<br>'se chinyomba chiao.    |
|   |   | 8 As' engencho y'abaminto<br>n'abasani baane,<br>bono ninkwane: 'Morembe<br>obe ime yao. |

### **Zaburi 122**

8.6.8.6. (C.M.)  
Ogotera kw'ebitambokero na ogwa Daudi.

- 1 Inagogete ekero  
bantebetie: Tiga  
togende ase enyomba  
y'Omonene Nyasae.
- 2 Ee, aye Yerusalem,  
amagoro aito  
natenene aaria ime  
as' ebita biao.
- 3 Yerusalem nomochie  
omoseera mono,

- 9 Ase engencho y'enyomba  
y'Omonene Nyasae  
oito, nindigie amaya  
abe amo naye.

### **Zaburi 123**

8.8.8.8. (L.M.)  
Ogotera kw'ebitambokero.

- 1 Inche ninyimokererie  
igoro amaiso aane  
gocha asore, Yehova,  
oyomenyete Igoro.

- |  |  |
|--|--|
| <p>2 Rora, buna 'maiso ayio<br/>y'abasomba abasacha<br/>akorora okoboko<br/>kw'abanene abwo babo,<br/><br/>Buna 'maiso y'omosomba<br/>omoiseke are ase<br/>okoboko kw'omokungu<br/>ore omonene oye;<br/><br/>Naboigo amaiso aito<br/>aganyete Omonene<br/>Nyasae oito, ee, goika<br/>atororere 'mabera.</p> <p>3 Tororere amabera,<br/>Omonene, tororere<br/>'mabera, naki twaichorwe<br/>mono mono n'ogochaywa.</p> <p>4 Emiyo yaito yaichorwe<br/>mono n'ogochecherigwa<br/>kw'abeisanegete, boigo<br/>n'ogochaywa kw'aberori.</p> | <p>oroche ndwaetanetie<br/>igor y'emiyo yaito.</p> <p>5 Erio nanga 'mache ayio<br/>arenge kobera mono<br/>naetanetie emiyo<br/>yaito, boigo koyetuba.</p> <p>6 Yehova asesenigwe,<br/>oyotatoruete intwe<br/>koba buna enyama 'se<br/>amaino abo amoge.</p> <p>7 'Miyo yaito ero nigo<br/>yanyorete 'botamero<br/>buna enyoni korwa 'se<br/>'gesugunia ki'abategi.<br/><br/>Ee, egesugunia ekio<br/>nkiabutogete; as' ayio<br/>intwaminchoretie korwa<br/>as' egesugunia ekio.</p> <p>8 Ogokonywa gwaito nigo<br/>kore ase erieta ria<br/>Yehova, oyoroisetie<br/>Igoro na Ense boigo.</p> |
|--|--|

### **Zaburi 124**

8.8.8.8. (L.M.)

Ogotera kw'ebitambokero na ogwa Daudi.

- 1 Onye Omonene ere  
atabete as' ensem  
yaito, tiga bono 'banto  
ba Israeli bakwane;
- 2 Onye Nyasae atabete  
amo naintwe ekero  
'banto baimokererete  
igoro mamincha yaito;
- 3 Nanga imbatomerete  
gatore moyo, ekero  
endamwamu yabo ero  
yogete mamincha yaito.
- 4 Erio nanga 'mache aro  
natokorobananetie;

### **Zaburi 125**

8.6.8.6. (C.M.)

Ogotera kw'ebitambokero.

- 1 Baria bamosemeretie  
Omonene nigo  
banga buna egetunwa  
ekio gia Sayoni,  
  
Ekio getanyegegerigwe,  
korende goika  
kare na kare kerokio  
nkebeo botambe.
- 2 Ebitunwa bietanaine  
Yerusalem, na  
Yehova naetanaine  
'banto baye bonsi.

- Ere nabaetanaire korwa bono, nonya ngo-ika kare na kare nabaetanaire.
- 3 Naki enyimbo y'ababe tekogenderera koba igoro y'omwando bw'abanyaboronge; Egere abanto bare boronge barabwo tibarambora 'maboko abo as' obobe.
- 4 Omونene, kora 'maya ase abaya na abanyaboronge ime ye chinkoro chiabo.
- 5 Ase baria bakogenda bogeka gochia 'se chinchera chire echiaabo chi'obokorekanu, Omونene nabaraae bosio n'abakori 'mabe, ko 'morembe nobe ase Israeli.
- Yehova obakoreire amang'ana amanene.
- 3 Omونene okorire amang'ana amanene asetore, ase ayio nigo tore n'omochengo.
- 4 Aye Yehova, onchora obosibwa bwaito, buna gwachiiranetie chindooche ase ense ya Irianyi.
- 5 Abanto bakobusura as' amariga, barabwo mbabe bakogesa ase omogoko bw'ogotera.
- 6 Ere oria ogosoka okoiyeria amariga, okoira chimbusuro chie rigori rire rinene, Bori nairane naende ore n'omochengo, ere narentane emesaima yaye yonsi amo nere.

**Zaburi 126** 8.8.8.8. (L.M.)  
Ogotera kw'ebitambokero.

- 1 As' engaki Omونene airanetie abasibwa ba Sayoni, intwabete buna baria bakorota.
- 2 Na erio emenwa yaito egaichorwa n'amaseko, ne chimeme chiaito boigo chigaichorwa n'amatera.  
As' engaki eyio, 'banto b'ebisaku bagakwana:

**Zaburi 127** 8.8.8.8. (L.M.)  
Ogotera kw'ebitambokero ase Sulemani.

- 1 Onye tari Omونene oko-agacha enyomba, abako-agacha nigo bakoyeagacha bosa.  
Onye tari Omونene omonyene okorenda omochie, oyokorenda nigo akorenda bosa.
- 2 Nigo ere bosa ase more koimoka emambia; nere bosa asemore konyorwa gochia korara.

- Mbosa asemore koria  
endagera y'obororo;  
korende nigo akoa  
abanchwa baye chitoro.
- 3 Rora, abana nomwando  
okorwa ase Yehova,  
naboigo okwama kw'enda  
inkore eng'eria yaye.
- 4 Na abana b'obosae  
nigo banga chinsara 'se  
'koboko kw'omonto ore  
omobui omonene.
- 5 Nasesenirie omonto  
oria ekerere kiaye  
geichire chinsara echoio,  
ee, ere nasesenirie;  
  
Abanto banga omonto  
oyio tibagosookigwa  
ekero bagosomera  
ababisa as' egeita.
- yao buna 'mezeituni  
ere emerere.
- 4 Rora, as' enchera eyio  
oyomoirogete  
Yehova nasesenigwe,  
ee, nasesenigwe.
- 5 Yehova nagosesenie  
korwa Sayoni, na  
norore Yerusalem  
egendererete.  
  
Amaene, amatuko  
onsi y'obogima  
bwao norore obuya  
bwa Yerusalem.
- 6 Ee, nobarore abana  
b'abana bao na  
noyorore omorembe  
ase Israeli.

### Zaburi 128 8.6.8.6. (C.M.)

Ogotera kw'ebitambokero.

- 1 Ee, nasesenirie kera  
'monto 'moirogete  
Yehova, oyogotaara  
'se chinchera chiaye.
- 2 Naki norie emeremo  
y'amaboko ao;  
aye nosesenigwe na  
nekbere buya.
- 3 Omokungu oo nabe  
buna 'mosabibu  
orabe okwama ase  
'nyomba yao ime.  
  
Abana bao imbabé  
betanaine 'mesa

### Zaburi 130 8.6.8.6. (C.M.)

Ogotera kw'ebitambokero.

- 1 Korwa 'se chindiba ime  
naboigo korwa 'se  
engoro, nigo nkorera  
asore, Yehova.
- 2 Nyasae, igwa 'riogi riane:  
tiga 'mato ao  
ategerere eriogi  
ri'amasabo aane.
- 3 Nyasae, ning'o oranyare  
gotenena, onye,  
Yehova, kware gokora  
'mobaró bw'ebibe?
- 4 Korend' aye Omonene,  
okwabera nkore  
asore, erinde aye  
onyare koirokwa.

- 5 Omoyo 'ne noganyete,  
ninganyete Nyasae;  
na inche ninsemersetie  
'se ring'ana riaye.
- 6 Omoyo 'ne noganyete  
Yehova kobua  
'banto baria baganyete  
ogokia kwa mambia;  
  
Ee, kobua 'banto baria  
baganyete bokie.
- 7 Igo tiga Israeli  
esemerie Nyasae,  
  
Ekiagera amabera  
nare 'se Yehova,  
na okobooria okonge  
nkoreo asare.
- 8 Omonene Nyasae nere  
bweka oraboorie  
Israeli korwa ase  
'bibe biaye bionsi.
- gochia ase omokoba  
bwe chiganchwa chiaye.
- 3 Obomo 'bwo nigo bonga  
riime ri'Erimoni  
rigotonya 'se 'bitunwa  
bia Sayoni 'goro.  
  
Agwo Nyasae ochikire  
ogosesenigwa  
okwo kore obogima  
obwo botaeere.

**Zaburi 134** 8.8.8.6. (C.M.)  
Ogotera kw'ebitambokero.

**Zaburi 133** 8.6.8.6. (C.M.)  
Ogotera kw'ebitambokero *na* ogwa Daudi.

- 1 Rora buna ere buya  
n'okogokia 'ker  
'banto 'bambo bakomenya  
amo baigwanaine.
- 2 Okoigwana okwo nigo  
konga amaguta  
amaya akweakwa 'se  
omotwe igoro,  
  
Ayio akonyororoka  
gochia 'se chinderu,  
nonya ngochia inse ase  
chinderu chi'Aaroni.
- Amaguta ayio nigo  
akonyororoka

- 1 Rora, inwe mosesenie  
Omonene, inwe  
mwensi more abasomba  
b'Omonene Nyasae;  
  
Abwo bagotenena na  
bakomokorera  
as' enyomba y'Omonene  
ase obotuko.
- 2 Imokereria igoro  
amaboko aino  
aaria aase aachenu, na  
sesenia Yehova.
- 3 Tiga Omonene, oyio  
'roisetie Igoro  
na Ense, agosesenie  
korwa 'se Sayoni.

**Zaburi 135** 8.6.8.6. (C.M.)

- 1 Togia Omonene; togia  
'rieta ri'Omonene;  
momotogie Omonene,  
abasomba baye.
- 2 Aba mogotenena 'se  
enyomba ya Nyasae,

- ase chigoora chi'enyomba  
y'Omonene oito,
- 3 Motogie Yehova, naki  
Yehova nomuya;  
ee, togia erieta riaye,  
naki rire 'riansu.
- 4 Naki Nyasae bwechoreire  
Israeli koba  
oyoye o beene bori,  
na Yakobo boigo.
- 5 Naki inche nimanyete  
ing'a Omonene  
omonyene nigo are  
omonene mono.  
  
Nimanyete Omonene  
oito ere nigo  
are igoro kegima  
ye chinyasae chionsi.
- 6 Kende gionsi Omonene  
agokirie, nakio  
nagekorete ime ya  
Igoro na Ense,  
  
Ne chinyancha ne chindiba  
chionsi. Ere nigo  
agotiiria 'mare korwa  
'se chinsinyo chi'Ense.  
  
Okomesa gwe chinkoba  
nigo agokora  
egere kobwatekane  
n'embura enyinge.  
  
Korwa as' ebigachero  
biaye ere nigo  
akorenta embeo na  
omwaga ogusa.
- 8 Abana abatangi ba  
Misiri naitete,  
boigo naitete chintangi  
chie ching'iti chiabo.
- 9 Ere nigo atomete  
ebimanyerero  
n'amakumia amanene  
as' egati yao,  
  
As' egati yao, aye  
Misiri, na ase  
Farao na bonsi abare  
abasomba baye.
- 10 Oyo-agete 'bisaku  
ebinene, boigo  
oyoitete abaruoti  
bareng'e n'okobua:
- 11 Ee, Sihoni omoruoti  
bw'Abaamori, boigo  
Ogi omoruoti oyio  
bw'ense ya Basani.  
  
Agasiria amaruoti  
onsi a Kanani.
- 12 Akarua as' Israeli  
ense yabo yonsi.  
  
Na ense yabo ekaba  
omwando omuya,  
omwando ase abanto  
baye Israeli.
- 13 Aye Omonene, 'rieta  
riao indibeo  
goika kare na kare;  
ee, ndibe aroro.  
  
Aye Omonene Nyasae,  
okoinyorwa kwao  
nkogendererete ase  
ebigori bionsi.
- 14 Naki Nyasae nanachere  
'banto baye 'kina,  
narorere abasomba  
baye amabeebe.
- 15 Emegwekano y'abanto  
b'ebisaku nigo

- ere chifeta na nigo  
ere chitahabu.
- Na emegwekano eyio,  
ero nigo ere  
egasi y'amaboko a  
mwanyabanto bosa.
- 16 Nigo ebwate emenwa  
ko teri gokwana;  
nigo ebwate amaiso  
ko teri korora.
- 17 Na nebuate amato ko  
teri koigwa; nonya  
nokoeyana tikori  
as' emenwa yabo.
- 18 Abakoyeriosis nigo  
banga buna ero,  
naboigo kera oyomo  
oyesemeretie.
- 19 Enyomba ya Israeli,  
sesenia Yehova;  
inwe enyomba y'Aaroni,  
sesenia Yehova.
- 20 Inwe enyomba ya Lawi,  
sesenia Yehova;  
abamoirogete Nyasae,  
sesenia Yehova.
- 21 Tiga Omونene Nyasae  
asesenigwe na  
boigo tiga atogigwe  
korwa 'se Sayoni.  
  
Yehova asesenigwe  
oria omenyete  
Yerusalem. Motogie  
inwe Omونene.
- amabera aye nare  
goika kare na kare.
- 2 Togia Nyasae bwe chinyasae,  
naki amabera aye  
nigo agendererete  
goika kare na kare.
- 3 Mo-akere Omونene  
bw'abanene ng'a imbuya  
mono, naki amabera  
aye nareo botambe.
- 4 Nere bweka ogokora  
amakumia amanene,  
naki amabera aye  
nigo agendererete.
- 5 Nere oyio otongete  
Igoro as' obong'aini,  
naki amabera aye  
nigo agendererete.
- 6 Noyoramborete ense  
ase amache igoro,  
naki amabera aye  
nigo agendererete.
- 7 Nere oyio oroisetie  
emebaso emenene,  
naki amabera aye  
nigo agendererete.
- 8 Risase rigambe ase  
mogaso, naki eneema  
yaye negendererete  
goika kare na kare.
- 9 Ching'enang'eni naboigo  
omotienyi bigambe 'se  
botuko, naki eneema  
yaye nereo botambe.
- 10 Noyoagete Misiri  
ase abatangi babo,  
naki amabera aye  
nigo agendererete.

- 11 Na oyorusetie 'banto  
ba Israeli korwa 'se  
bare, naki amabera  
aye nareo botambe.
- 12 N'okoboko ogokong'u  
n'okoboko koramboire,  
naki amabera aye  
nigo areo botambe.
- 13 Nere oyobaganete  
Enyancha Embariri pi,  
naki amabera aye  
nigo agendererete.
- 14 Nere oyio oetetie  
Israeli as' egati  
yaye, naki amabera  
aye nareo botambe.
- 15 Farao n'omoganda oye  
mbameretwe as' Enyancha  
Embariri, naki 'neema  
yaye nereo botambe.
- 16 Nere oyio oraaete  
'banto baye goetera  
erooro, naki eneema  
yaye negendererete.
- 17 Nere oyio oagete  
abaruoti abanene,  
naki amabera aye  
nigo agendererete.
- 18 Noyoitete abaruoti  
b'obonene, ekiagera  
amabera aye nare  
goika kare na kare.
- 19 Ee, noyoitete Sihoni  
omoruoti bw'Abaamoni,  
naki amabera aye  
nigo areo botambe.
- 20 Nere oyoitete Ogi  
omoruoti o Basani,
- 21 Noyoruete ense yabo  
ekaba omwando, naki  
amabera aye nare  
goika kare na kare.
- 22 Erio ekaba omwando  
o Israeli 'mosomba  
oye, naki amabera  
aye nareo botambe.
- 23 Noyio otoinyorete 'se  
okoba gwaito gwa inse,  
naki amabera aye  
nigo agendererete.
- 24 Na noyotaboretie  
korwa ase ababisa  
baito, naki amabera  
aye nareo botambe.
- 25 Noyokorua endagera  
'se chinyama chionsi, naki  
amabera aye nare  
goika kare na kare.
- 26 Togia Nyasae o Igoro,  
naki amabera aye  
nigo agendererete  
goika kare na kare.

**Zaburi 137**

8.8.8.8. (L.M.)

- 1 Intwaikaransete ang'e  
ne chindooche chia Babeli,  
ee, ntwarerete ekero  
tware koinyora Sayoni.
- 2 Intwe nigo twasungete  
amakano aito onsi  
igoro y'emesobeti  
egati y'emete eyio.

3 Naki aase aaria, baria  
batwosete 'ntwe, barabwo  
bakaba bagotoboria  
ng'a totere ogotera;

Na baria batochandete  
bakagania tochenge na  
bagateba: Totere  
ogotera gwa Sayoni.

4 Inee, naki torakore  
totere 'ntwe ogotera  
kw'omonene Nyasae oito  
as' ense ere engeni?

5 Na aye Yerusalem,  
onye ingokweba, tiga  
'koboko kwane gw'okorio  
kwebe obomanyi bwaye.

6 Na onye tingokoinyora,  
tiga oromeme rwane  
n'amang'ang'ura y'omonwa  
one erio bibwatane,  
  
Ee, onye Yerusalem  
teri omogoko one  
omonene goetania  
ebinto bionsi asende.

7 Aye Omonene Nyasae,  
inyora abana baria  
b'Edomu ase rituko  
riria ria Yerusalem,  
  
Engaki eria ekero  
batebete: Yotagore,  
yotagore nonya ngoika  
inse y'oboroso bwaye.

8 Omoiseke o Babeli,  
nosarigwe; na nagoke  
oyokogoakana buna  
aye gwatokorerete.

9 Na nagoke oyokoira  
abana bao abake

na erio obasenyenta  
as' amagena igoro.

### Zaburi 138 8.8.8.8. (L.M.)

1 Nindagotogie n'enkor  
yane yonsi; na bosio bwe  
chinyasae, ningoterere  
amatera y'ogotogia.

2 Ninsasime gochia ase  
Hekalu yao enchen  
na ntogie erieta riao  
as' engencho y'ekeene;

Nas' engencho y'obwanchani  
bwao; naki kwaneneirie  
ring'ana riao igoro  
as' erieta riao rionsi.

3 Ekero narangeretie,  
aye okang'iraneria;  
ogankong'ia ne chinguru  
as' omoyo one ime.

4 Abaruoti bonsi b'Ense  
mbagotogie, Omonene,  
ase engaki baraigwe  
'mang'ana y'omonwa oo.

5 Ee, mbatere 'se chinchera  
chi'omonene, ekiagera  
obonene bw'omonene  
nigo bore obonene.

6 Nonya Omonene ore  
igoro, nigo aroche  
omonto omoitongo, ee,  
ere nigo amoroche.

Korende Yehova nigo  
akomanya korwa aare  
omont' ore omwerori ;  
ee, nigo akomomanya.

- 7 Nonya ngotaara 'se 'gati  
y'emechando, aye nong'e  
obogima; norambore  
okoboko kwao bosio,  
Ee, mamincha y'endamwamu  
y'ababisa baane, aye  
norambore okoboko  
kwao gw'okorio gontoorie.
- 8 Omonene naikeranie  
amang'ana aane; aye  
Omonene, amabera  
ao nareo botambe;  
Nareo goika kare  
na kare; aye totiga  
emeremo y'amaboko  
ao; tobaisa koyeba.
- 5 Aye kwang'etananire  
magega na bosio;  
kwabekire okoboko  
kwao 'goro yane.
- 6 Ase inde, obomanyi  
obwo nigo bore  
obw'amakumia 'manene  
kong'etania inche.  
Obomanyi obwo nigo  
bore obotambe  
gochia 'goro; tinkonyara  
koboikeria obwo.
- 7 Ing'ai ndagende indue  
as' Omoika oo?  
Ing'ai ndatame gochia  
indue bosio bwao?

**Zaburi 139**

8.6.8.6. (C.M.)

Ase omoteri omonene, Zaburi ya Daudi.

- 1 Nyasae, kwandiga-rigirie  
na kwamanyire 'nche.
- 2 Nigo omanyete 'ker  
ing'ikaransete.  
Aye nigo omanyete  
okoimoka kwane,  
boigo ekerengererio  
kiane korwa aare.
- 3 Nigo okoriga-rigia  
enchera yane na  
nigo okoriga-rigia  
okorara kwane;
- 4 Na nonarete chinchera  
chiane chionsi. Naki  
ing'ana tiriri ase  
oromeme rwane,  
Ko rora, aye Yehova,  
nigo omanyete
- 8 Onye nkogenda igoro,  
ee, ninsa koriina  
gochia Igoro, aroro  
aye nao ore.  
Onye nkware oborere  
bwane aaria ime  
ya Cheanamu, rigereria,  
aye nao ore.
- 9 Na ninsa koiruruka ne  
chimbaba chi'ogokia  
na imenye aare ase  
chinsinyo chi'enyantha,
- 10 Nonya naroro, 'koboko  
kwao nkondaae na  
'koboko kwao gw'okorio,  
korokwo nkombwate.
- 11 Kondatebe, Omosunte  
nontube kejima,  
nonya nobotuko mbobe  
oborabu 'sende.

- 12 Ee, 'mosunte tokobisa  
kende korwa 'sore;  
koren' obotuko bwonsi  
nigo borabete;  
  
Nigo borabete buna  
mobaso. Asore,  
omosunte n'oborabu  
nigo bigwekaine.
- 13 Naki nigo gwatongete  
chinyigo chiane na  
nigo gwantubete ime  
as' enda ya mama.
- 14 Ningotogie ekiagera  
nigo indoisirie  
as' enchera y'okirokia  
na ey'amakumia.  
  
Emeremo eyio yao  
ney'amakumia na  
omoyo 'ne nomanyete  
ayio buya mono.
- 15 Amauga aane onsi  
tabisekanete  
korwa asore ekero  
'nche naroisetigwe.  
  
Inkaroisigwa bobisi;  
inkabombwa ase  
chinsemo chia inse y'Ense  
ase obong'aini.
- 16 Naboigo amaiso ao,  
aro akarora  
omobere one 'ker  
otaraikerana.  
  
Amatuko aane onsi  
nigo arigetwe  
na agakong'igwa ime  
y'egetabu kiao.
- 17 ee, nyuma nonya nerimo  
ritaraba 'roro.
- 18 Boigo ebirengererio  
biao, naki bire  
ebie rigori rinene  
gocha 'sende, Nyasae!  
  
Naki bire 'binge ase  
omobaro obo!
- 19 Onye nkobibara, nigo  
bire 'binge mono.  
  
Nebinge bire kobua  
omokenye bwonsi.  
Ekero nkoboka, nigo  
inde amo naye.
- 20 Nyasae, amaene noite  
'bakori amabe;  
ase igo, inwe 'banto,  
karwe asende 'nche!  
  
Inwe abamogoitera  
amanyinga, genda!
- 21 Naki nigo bagokwana  
mamincha ya Nyasae.  
  
Ababisa bao nigo  
bagokwana bobe,  
na nigo bagokorera  
'rieta riao bosa.
- 22 Inee, aye Omonene,  
inche tingecheti  
abanto bakogechete?  
Ee, nimbagechete.  
  
Inee, tingechirie boigo  
n'abanto ababe  
bakoiokerera 'goro  
mamincha ya Nyasae?
- 23 Nigo mbagechete mono  
n'okogecha kore  
ogoikeranu; babeire  
ababisa baane.

- |  |  |
|--|--|
| <p>23 Aye Nyasae, ndiga-rigie<br/>na igo omanye<br/>enkoro yane; ondenge<br/>na onteeme inche.</p> <p>24 Omanye 'birengererio<br/>biane; na orore<br/>gose enhera y'obobe<br/>nere ime yane.</p> <p>Omonene Nyasae one,<br/>ondaae naboi go<br/>ong'ire ase enhera<br/>ya kare na kare.</p>  | <p>4 Inkarigereria ase<br/>okoboko kwane<br/>gw'okorio na nkarora, ko<br/>onde tareng eo;</p> <p>Bori monto onde bwensi<br/>tamanyete inche;<br/>na kera obotamero<br/>bokambora boigo;</p> <p>Inche nkarora ng'a monto<br/>onde tareng eo<br/>o-echanderete 'moyo<br/>one nonya ng'ake.</p>   |
| <p><b>Zaburi 142</b>      8.6.8.6. (C.M.)<br/>Masikili ya Daudi. Ogosaba ekero arenge<br/>ime ye rikuruma.</p>   |  |
| <p>1 Nkarera as' Omonene<br/>n'eriogi riane; ee,<br/>as' eriogi riane, inche<br/>ngasorora Nyasae.</p> <p>2 Boigo as' obosio bwaye,<br/>inche nka-umora<br/>okwemurungania kwane,<br/>ee, nakorire bo.<br/><br/>Boigo inche nkaorokia<br/>emechando yane<br/>amo n'obokong'u bwane<br/>as' obosio bwaye.</p> <p>3 Ekero omoika one<br/>ogoyete ime<br/>yane, erio nkwamanyete<br/>oboeto bwane.<br/><br/>Bakambekera bobisi<br/>oboreba ase<br/>enhera naetete, ee,<br/>bakabombekera.</p> | <p>5 Aye Omonene, inche<br/>nkarera asore;<br/>na ngateba: Aye naye<br/>'botamero bwane,</p> <p>Ee, inche ngateba: Aye<br/>naye egetari<br/>kiane aiga ase ense<br/>y'abwo bare moyo.</p> <p>6 Tegerera okorera<br/>kwane, ekiagera<br/>narentirwe inse mono,<br/>narentirwe inse.<br/><br/>Ntoorie korwa as' abanto<br/>bakominyokia 'nche,<br/>'kiagera nigo bare ne<br/>chinguru kombua.</p> <p>7 Rusia omoy' one korwa<br/>as' echela, erio<br/>ntogie erieta riao, ee,<br/>inche ninditogie.<br/><br/>Abanyene oboronge<br/>imbang'etanaine,<br/>ekiagera nonkorere<br/>amaya amange.</p> |

**Zaburi 143**

Zaburi ya Daudi.

8.6.8.6 (C.M.)

- 1 Aye Omonene, igwa  
ogosaba kwane;  
tegerera oigwe ase  
'gosorora kwane.  
  
Ng'iranerie as' engencho  
y'obwegenwa bwao  
na koreng'ana n'obonge  
bw'oboronge bwao.
- 2 Na tosoa as' ekina  
n'omosomba oo,  
nakia obosio bwao  
omoronge taiyo.
- 3 Omobisa otesire  
omoyo one, na  
osenyentire 'bogima  
bwane gochia inse,  
  
Nonya nase riroba; na  
gonkora imenye  
ase omosunte buna  
abakwete kare.
- 4 Na omoika one ime  
yane obuirwe;  
ime yane 'nkoro yane  
yairianyekire pi.
- 5 Nigo nkoinyora 'matuko  
a kare; na nigo  
nkorengereria igoro  
y'emeremo yao.  
  
Na nigo nkiranerera  
emeremo yao  
yonsi n'ogokora kwao  
kw'amaboko ao.
- 6 Nigo nkorambara 'sore  
amaboko aane;  
na omoyo one nore  
n'erang'o asore,
- Ninde n'erang'o asore  
enga buna ense  
yarang'ire ne riroba  
rirang'ete 'mbura.
- 7 Aye Omonene Nyasae,  
ng'iranerie bwango;  
omoik' one ime yane  
nkong'erera ore.  
  
Tobisa obosio bwao  
korwa 'sende, mbaise  
koba buna 'bakogenda  
as' engoro inse.
- 8 Nkore nyigwe obwanchani  
bwao as' emambia,  
nakia ningosemeretie.  
Imanyie enchera,  
  
Eyio go-ika intaare,  
nakia omoy' one  
nigo nkoyoimokereria  
igoro asore.
- 9 Omonene, ntoorie korwa  
ase ababisa  
baane; nigo ingotama  
asore ombise.
- 10 Inyorokererie inche  
inkore ogwancha  
kwao, ekiagera aye  
naye Nyasae one.  
  
Omoika oo nomuya;  
aye ndaae gochia  
ase ense y'oboronge.  
Indaae gochiao.
- 11 Aye Omonene, ase  
engencho y'erieta  
riao, ing'a obogima  
oboyia naende.  
  
As' engencho y'oboronge  
bwao, aye rusia

omoyo one korwa 'se  
emechando eye.

- 12 As' engencho y'amabera  
ao amanene,  
nacha kegima abare  
ababisa baane.  
  
Naboigo siria abanto  
bonsi bagochanda  
omoy' one, naki inche  
nomosomba oo.

**Zaburi 145** 8.8.8.8. (L.M.)  
Ogotogia gwa Daudi.

- 1 Omonene Nyasae one,  
inche ninkoimokererie  
igoro as' ogotogia  
kwane, aye Omoruoti,  
  
Na inche nindisesenie  
erjeta riao botambe;  
ee, inche nindisesenie  
go-ika kare na kare.
- 2 Na nimbe nkogosesenia  
kera rituko, naboigo  
ninditogie 'rieta riao  
go-ika kare na kare.
- 3 Yehova nomonene na  
ere atogigwe mono;  
boigo obonene bwaye  
tibokoriga-rigigwa.
- 4 Ekiaare ngetogie 'gasi  
yao gochia as' ekende,  
na mbirarie ebikoro  
biao bire ebi'okobua.
- 5 Ninkwanere ogosikwa  
kw'obonene bw'oboseera  
bwao, na 'meremo yao  
eyere ey'amakumia.

- 6 Na abanto mbakwanere  
obobui bw'ebikoro  
biao bi'okoirokia; boigo  
hindarie 'bonene bwao.
- 7 Barabwo mbararie mono  
okoinyora kw'obonene  
bw'obuya bwao; mbatere  
'goro y'oboronge bwao.
- 8 Yehova noyo bw'eneema  
na ere nigo aichire  
n'amabeebe; nigo are  
oyo bw'amabera 'mange;  
  
Omonene nomong'ora  
as' okoba n'endamwamu.
- 9 Yehova nomuya ase  
emeremo yaye yonsi;  
  
Boigo amabeebe aye  
nigo are igoro 'se  
emeremo yaye yonsi  
eyio ere akorire.
- 10 Omonene, emeremo  
yao yonsi negotogie;  
boigo abachenu bao  
mbabe bakogosesenia.
- 11 Abachenu mbakwanere  
obonene bw'oboruoti  
bwao, naboigo mbakwane  
igoro y'okobua kwao,
- 12 Egere bamanyekanie  
gochia ase abana ba  
mwanyabanto ebikoro  
biaye bionsi bi'obobui;  
  
Barabwo mbamanyekanie  
obonene bw'ogosikwa  
kw'oboruoti bwaye ase  
abana ba mwanyabanto.
- 13 Oboruoti bwao mbore  
oboruoti bwa kare na

kare; okogamba kwao  
nkobe as' ebiaare bionsi.

14 Nyasae nigo agosiira  
abwo bonsi bakogwa 'nse  
na agororokia bonsi  
abakumbirwe gochia 'nse.

15 Amaiso a bionsi nigo  
akorigereretie; na  
kwabia endagera yabo  
ase engaki eisaine.

16 Aye nigo okoigora  
okoboko kwao, erio  
gwaisanekia 'kogania gwa  
kera 'gento kere moyo.

17 Nyasae nomonyaboronge  
'se chinchera chiaye chionsi;  
ere nomochenu ase  
ogokora kwaye gwonsi.

18 Nyasae nare ang'e ase  
bonsi bakomorangeria,  
bonsi bakomorangeria  
as' enchera y'ekeene.

19 Naikeranie okogania  
kwa baria bamoirogete:  
na naigwe 'kerero kiabo,  
boigo ere nabatoorie.

20 Nyasae nigo akorenda  
baria bonsi bamwanchete;  
korende abasareku  
bonsi ere nabasirie.

21 Omonwa one nokwane  
ogotogia kw'Omonene;  
ee, omonwa one nobe  
ogotogia Omonene.

Na tiga chinyama chionsi  
chisesenie na chitogie  
erieta riaye richenu  
go-ika kare na kare.

**Zaburi 146**

8.8.8.8. (L.M.)

- 1 Inwe motogie Yehova.  
Aye omoyo 'ne, togia
- 2 Yehova. Ekero inde  
moyo, nintogie Yehova.  
  
Na nintere ogotogia  
gochia ase Nyasae one  
ekero inche imbwave  
obomoyo ime yane.
- 3 Timosemeria abanto  
bare abagambi gose  
omwana o mwanyabanto  
otanyare kobakonya.
- 4 Na okoeyana kwaye  
nigo gokorua asare;  
nigo akoirana ase  
riroba ase arwete.  
  
Ekero ere akure,  
'se rituko erio erio  
ebirengererio biaye  
bionsi nigo bigosira.
- 5 Omonto oria obwate  
Nyasae o Yakobo ase  
ogokonywa kwaye, ere  
nomonto osesenirie.  
  
Ogosemeria kw'omonto  
oyio nigo kore ase  
Omonene Nyasae oye,  
oroisetie 'binto bionsi;
- 6 Oyoroisetie Igoro  
na Ense na enyancha na  
boigo oyobirosisetie  
bionsi ebire imeo;  
  
Na oyogendererete  
korenda ekeene na  
boigo obwegenwa bwaye  
goika kare na kare.

- 7 Oyokorua ekina 'se  
abanto abachandirwe,  
oyokorua endagera  
ase abare n'enchara.  
  
Omonene ere nigo  
agosibora 'basibwa.
- 8 Na amaiso y'eme-uko  
Yehova oyaramokia.  
  
Omonene ere nigo  
akogororokia baria  
bakumbirwe, Omonene  
nanchete 'banyaboronge.
- 9 Omonene ere nigo  
akorenda abageni;  
akonya entakana na  
oyore omoboraka;  
  
Korende enchera ere  
ey'abakori amabe  
ney'abasareku nigo  
akoyeonchorana pi.
- 10 Omonene Nyasae ere  
nabe ogendererete  
ase okogamba kwaye  
goika kare na kare.  
  
Nyasae, nonya Nyasae oo,  
ase ebigori bionsi  
nagambe, aye Sayoni.  
Inwe togia Omonene.
- nigo kore ogoseera,  
boigo ngotogwenerete.
- 2 Yehova nasangererie  
abanto ba Israeli  
abwo bare goserigwa;  
naagache Yerusalem.
- 3 Ere nigo akogwenia  
abanto abwo chinkoro  
chiabo chiabunekire na  
kobo 'maote abo.
- 4 Namanyete omobaro  
bwe ching'enang'eni; ere  
nigo akorua 'marieta  
ye ching'enang'eni chionsi.
- 5 Nyasae oito nomonene;  
ere nere obw'okobua  
okonene; okomanya  
kwaye tigokorengeka.
- 6 Nigo akoimokereria  
igoro abaitongo, ko  
Nyasae nigo akoyeria  
ababe ase riroba.
- 7 Inwe terera Yehova  
n'ogoaka ng'a mbuya mono;  
tobia Nyasae oito ase  
okobugia obokano.
- 8 Ere nigo atubete  
erioba n'amare; nigo  
akwarigania embura  
egere etwe as' Ense;

**Zaburi 147**

8.8.8.8. (L.M.)

- 1 Inwe togia Omonene,  
ekiagera nigo ere  
buya mono goterera  
Nyasae oito ogotogia;  
  
Ekiagera ayio naro  
amaya, na ogotogia
- Na komeria obonyansi  
as' ebitunwa igoro.
- 9 Nigo akoa ching'iti  
endagera yabo chiaria.
- Naende Yehova nigo  
akorageria amage  
y'ebigonkoru ekero  
akoba akomorera.

- 10 Ere tagokiri ase  
chinguru chi'ebarasi; ee,  
Omonene tagokiri  
as' amagoro y'omonto.
- 11 Nyasae nigo agokirie  
n'abanto bamoirogete  
na abwo basemeretie  
ase amabera aye.
- 12 Aye togia Omonene,  
aye Yerusalem, ee,  
aye Sayoni, motogie  
Omonene Nyasae oo,
- 13 Naki nigo akong'etie  
chichuma chi'ebiita biao;  
nasesenetie abana  
bao bare ime yao.
- 14 Nigo akogoisanekia  
n'engano enuke mono,  
na kobeka omorembe  
oba 'se chimbebe chiao.
- 15 Ere nigo agotoma  
amachiko aye ase  
Ense, erinde ring'ana  
riaye riminyoke bwango.
- 16 Nigo akorua esinoo  
egwekaine amarionya;  
nigo agoserebania  
eteluji buna ribu.
- 17 Na nigo agosiarera  
'magenta aye y'embura  
buna amatori; ning'o  
oranyare gotenena?  
  
Ning'o oraremererie  
ase obokendu bwaye?
- 18 Ere nigo agotoma  
ring'ana rire eriaye;  
  
Nere obinyititora  
birobio, boigo okora
- embeo yaye yagusa,  
na amache aminyoka.
- 19 Ere nigo akomanyia  
Yakobo ring'ana riaye,  
na Israeli ebina  
biaye n'amachiko aye.
- 20 Ere tana-gokorera  
ense ende buna igo;  
tibamanyeti ebina  
biaye. Motogie Yehova.



